

## Tusi Faitau Aso 2018

### Reading the Bible with your feet ... heart and head

#### ‘Faitau ma vae, ma le loto, ma le mafaufau’

E faatalofa atu i le paia ma le mamalu o le Ekalesia, o le silisili ese o le Atua alofa, ua tatou aulia ai lenei tausaga fou ma le manuia, i lona alofa ma lona agalelei. I lenei savaliga i lenei tausaga, o mea e tele o leā tatou feagai ai ma feau ma galuega, o faatinoga ma tiute tauave, o le malosi ma le atamai, o atina’e ma sailiga, o le tausiniō ma le olaga aoaoina, o le mana ma le malosi o le Atua na te tautaiā la tatou savaliga i lenei tausaga fou, ma le manuia i lona faatasi mai. Talofa lava.

O le tatou Tusi Faitau Aso ua avea ma Ta’iala le Ulutala e faapea: ‘Faitau ma vae, ma le loto, ma le mafaufau’. O le tusi IBRA (International Bible Reading Association) ua avea ma tusi e mafaufau ai tagata uma Kerisiano o le lalolagi, ua avea ma taiala e faatino ai le Tapuaiga i aso taitasi o lenei tausaga. O lenei ua faaliliu atu e lo tatou Ofisa, le Susuga ia Emau Petaia F.S. Setefano Pouli Lefale F.S. le faletua o Usugafono Uaea Satele, faapea ma lo’u tagata.

O Tusitala o lenei Tusi ua tusia e tagata mai Aferika i Saute, Initia, Argentina, Brazil, Nigeria, Samoa, Amerika, Caribbean, Sweden, faapea malo aufaatasi ma Peretania. O loo taoto ai le Upu taua mo Ta’ita’i o Mālō –‘A place to stay’- ‘O le ā’iga mo au’ - e pei ona faamatalaina e Hosea, Faataoto, Kolose, Mareko, faapea le Tusi a le fai Salamo, e pei ona faailoa mai e le Faatonu o Nathan Eddy.

O mafaufauga i lenei taiala, i nei vaitaimi ua tatou feagai ma Malo ua aga’i i finauga, ua faalialia ai le malosi o Ta’ita’i o Atunuu ma le maua se nofo fetausiai. Ua tatou maua tala mai Malo i Matu ma Sauté i Sudan, faapea Suria, ma Malo i le Middle East ua le nonofo lelei, e faapea foi Aferika ma ona Malo e 25 ua faia palota i nei tausaga e lua, aisea? E faapea foi ona vaaia o suiga Faaupu fai o Ta’ita’i o Malo i le atu Europa, i Malo soofaatasi ma Peretania faapea Amerika. O vaitaimi ua tula’i mai ai o fesili fou, ma fesili faigatā i Ta’ita’i o Malo, e foliga ua le maua, po ua tau mafaufau Ta’ita’i, i se tali mo tagata.

O le manatu lea o le Tusi Faitau Aso, e tatau ona toe silasila i le faiva Faa-Ta’ita’i faapea le Tusi Paia ma lona faailoa mai. O le a se vaaiga i se Ta’ita’i lelei? O a ni faailoga tāua ua avea ai se tagata e avea ma Ta’ita’i?

Ua avea pea le Upu Fou a le Alii mo i tatou i aso uma, peā faitau i le Afioga a le Alii i le loto, ma le mafaufau, ma o tatou vae. O le a le uiga o lea manatu? E taua tele o nei vaaiga, atoa ma le fetalai mai a le Atua, e tusa ma lona finagalo.

Ua faailoa mai e Lucy Winkett e avea ma Upu Tomua, e faailoa ai taiala mo le Tusi Faitau Aso mo lenei tausaga:

Pe a faitau le Tusi Paia ma le loto, e lagona le pai mai a le Upu i o tatou loto ma o tatou tino. Tatou te au faatasi ma le tagi a Mareta ina ua maliu lona tuagane o Lasalo, e faapea Iopu ma mafatiaga ina ua oo mai i lona ā'iga, e faapea foi le vaaiga ia Iona ma lona loto le fautuaina, faapea Sara ma lana 'ata'ata, e pei e le talitonuina o le a fanau mai se tama mo laua ma Aperaamo peitai, ua tatou iloa le pai mai o le mana faamalolo o Iesu Keriso i o tatou loto. E faapea le agaga o le Tusi Faitau Aso a le Alii, ma le pai mai o lona finagalo ao faitauina le Upu Fou mo lenei aso.

E faapea foi peā faitau ma le mafaufau atoa, o le a tele le fia su'esu'e ma le fia iloa o le gagana Eleni, faapea le gagana Eperu, e pei ona tusia ma faaliliuga e 'matua o faiva'(theologians), e fesoasoani mai ma faamatalaina a'oa'oga taua. Pea faitau ma le mafaufau, ona tatou maua lea o le tulafono o le alofa, e manatua ai le Atua na te faamatala maia lona finagalo i o tatou loto, e faia ai faaiuga lelei.

Pe a faitauina le Afioga a le Alii ma o tatou vae, tatou te faailoa atu le tala lelei mo i tatou ma aso uma. Ia le faia ma se manatu e tusa ma o tatou manatu, a ia faia e tusa ma le faaali mai a le Atua i ai tatou ma aso uma.

E faapea tala o tagata ua faailoa mai e le Tusi Faitau Aso, o tala o tagata ua liliuina, ma toe fuatai olaga, ua faamanuia mai le Atua e ala ia Keriso Iesu ma le Agaga ua faaolaina le tagata agasala, pea fai e talitonu ma faatuatua ia te Ia.

Ia faitau le Tusi Paia i ou vae, ma le mafaufau, ma le loto atoa – O le toe fuataiga o i tatou, e le mana o Keriso Iesu.

Ia manuia tele lau tapuaiga

L.Nuusila Samuelu. F.S.

## **‘O lo’u ā’iga o’u te nofo ai’**

### **A place to stay**

### **3 Welcoming**

( saunia e Pete Wheeler )

**Aso Sa Iulai 1, 2018 ‘O i tatou uma sa avea ma tagata ese’**

**We were all foreigners once**

**Tusi Faitau: Levitiko 19: 33 – 34.**

**Matua : Levitiko 19: 33 - 34,** *‘A āumau ia te oe se tagata ese i lo outou nuu, aua tou te faatiga ia te ia. O le tagata ese o loo āumau ia te outou, ia tusa lava ia ia te outou ma le tama a le eleele, e te alofa atu ia te ia e pei o oe lava ia te oe; auā sa āumau outou i le nuu o Aikupito; o a’u o le Alii lo outou Atua.’*

O lau uō sa valaauina lona toalua matou te aua’i faatasi i le lotu, sa taitaia ai e le faifeau. Ina ua ma’ea le lotu, e leai lava se tagata na faa-feiloai ane, pe talanoa ma le toalua o si ana uō. Ina ua tapē le molī, na iloa atu e se tasi o loo nofononofo le tamaita’i, ma faatalitali i se tasi o loo ia fa’atalia. Na faapea atu le teine na tapēina le molī,

‘Are you OK?’ ‘Yes, I’m just waiting for my husband’ she gently replied, ‘Oh!’ came the response, ‘If I’d known you were his wife, I would have spoken to you earlier!’

Aisea na fa’atua’i ai ona faa-feiloa’i ma fa’atalofa ma talia tagata ‘ese ua ulufale mai, ma fa’amālo ma le fīafia i tagata fou ua tatou ‘au fa’atasi i lenei fa’atasiga? Ou te manatu, ai ua lē aga i ai, ia pe fa’apea fo’i o le a aliali ai le fiailoa ma le fa’afiapoto.

Ou te mafaufau i mea’alofa tāua a le Atua ua ‘aumaia i ai tatou, e faa-feiloa’i, faa-talofa ma le loto fīafia peita’i, ua tatou le faataunu’uina ia fa’atinoga lelei.

I lenei tala, tatou te manatua ai le Atua alofa, o le Atua na saili mai i tatou ina ua sesē ‘ese i tatou mai le faatoaga i Etena ma lona alofa (Kenese 3: 9). O Iesu ua tatou maua ai le leleiga ma le fefo’ofoa’i, le alii ua faaofuina i tatou i lona ofu e aupito sili ona lelei mo i tatou uma. ( Luka 15: 22)

I lenei vaiaso, seia tatou manatua le loloto o le mataupu silisili a le Atua, ‘o le faa-feiloa’i’ ... aua o tatou uma sa avea ma tagata ‘ese, a ua mafuta faatasi ma Iesu i lona alofa tunoa.

**Tatalo:** Faapei ona e faa-feiloa’i mai i matou, ia faapea foi ona matou faa-feiloa’i atu i tagata uma. **Amene.**

## **Aso Gafua Iulai 2, 2018 “Ia soloia pa vaeloto”**

### **Bringing down the walls**

#### **Tusi Faitau: Efeso 2: 12 – 22**

**Matua: Efeso 2:13-14,** *‘A o ona po nei, ona o Keriso Iesu, o outou sa vava mamao anamua ua faa-latalataina mai ai i le toto o Keriso. Auā o ia lava o lo tatou leleiga, ua na faia ia tasi e sa faalua, na na soloia foi le pa vaeloto o le feitagai sa vaeluaina ai.’*

E ui ina ‘ese’ese aga a ā’iga peita’i, o a’u ma le tinā, ma te faamalolosi pea i fanau, ina ia feso’otai ma faafeiloa’i i tagata ‘ese. ma talia i latou e pei oni a latou uō. E faapea le Alii ma lona mafuta mai, e ui ina ua tatou o ‘ese ma ia, a’o Iesu Keriso ua momo’e mai, e pei o le tamā na momo’e mai ma fusi mai i lona atalii (Luka 15:20) Peā le faataunuaina le feso’ota’iga ma le faa-feiloa’i atu, ona mamao lo tatou va ma isi tagata, ma tatou atia’e pa puipui ma pa vaeloto o le feitagai.

O nei pa vaeloto, ua faamuamua ai aganuu, o tu ma aga faale atunuu, i lou ā’iga, a ua faagalogo ai le tāua o le galuega a Keriso. O tala a Pete Wheeler, i le tausaga na te’a nei, na ia asia Rwanda i va’aiga sa molimauina i le 1994, o le toatele o Kerisiano ua faamuamua le toe liliu i a latou tu faanu’u po, ua sāuaina ai tagata ‘ese mai atunuu na oo atu ma le talaiga.

E faapea foi saunoaga a Matini Luteru King, O le fa’atupulia o le feitagai ma le fevaevaea’i, ona o pa vaeloto o le faailoga lanu.

O le tusi ia Efeso, ua faailoa ai e Paulo le fevaevaea’i o Iutaia ma tagata mai nuu’ese. O tagata o nuu ‘ese sa mamao i latou ma le iloa o le Atua, na leai se faamoemoe latou te fesaga’i ai ma le Atua peita’i, o i latou ua avea ma tagata fou, o le atunu’u fou, ua faatasia i le fa’atuatua, ma le alofa tunoa e ala ia Keriso Iesu.

O le upu moni, o le auala laupapa ua feso’ota’i ai tagata uma, ina ua soloia o pa vaeloto e Keriso Iesu. O i tatou uma ua le ta’ua o se tagata ‘ese, a’o tagata uma o le lau’ele’ele, o lou ā’iga na aumaia e le Atua ma mafuta faatasi ma le feoeoea’i.

**Tatalo:** Faafetai Iesu ona o le taulaga togiola ua soloia ai pa vaeloto o le feitaga’i. Aumaia le loto tele e faaauauai o lou finagalo. **Amene.**

**Mafaufauga loloto;** Ia silasila i mea na tutupu ai o ia faafitauli, ma ia mātau ma le iloa.

### **Aso Lua Iulai 3, 2018 “O Aperaaamo ma tagata’ese e toatolu”**

#### **Abraham and the three strangers**

**Tusi Faitau: Kenese 18:1-8**

**Matua: Kenese 18: 1-2,** *‘Ua faaali mai le Alii ia te ia i aluna o Mamere, a o nofo o ia i le faitotoa o lona fale ie i le aoauli; a ua tepa ane foi o ia ma iloa atu, faauta fo’i, o loo tutū mai ia te ia tagata e toatolu; ua ia iloa atu, ona momo’e atu ai lea o ia i le faitotoa o lona fale ie e faafetaiai ia te i latou, ona ifo toele lea o ia.’*

So’o se mea e faia ai se faaipoipoga, e i ai le aga masani a le atunu’u e vala’aulia ai tagata e sisiva. Ina ua vala’auina a’u e lau uso ma te sisiva, o le siva a Nicki ua fiafia i lana siva, ua pipi’i mai ma lagona e lona tino le malie o lana fusi mai, ua o’u iloa, ua o’o Nick i le lagi ma mafatua ma Iesu – Ioe, ua malie lava lana siva ma le loto faagae’etia.

O se va’aiga i lenei siva, ua manatua ai le faia e le Atua o le tagata i lona faatusa, O le Tamā, ma le Atalii, ma le Agaga, ua pipi’i ma mafuta faatasi.

O le aulotu itiiti i Egelani na faia ai lenei siva, e le uma lou fiafia i taimi uma o’u te siva ai. O tagata ua mafuta faatasi ma le agaga o le Atua.

O Aperaaamo ma momo’e atu ma valaauina tagata ‘ese e toatolu. E manatua le ata o le *Trinity*, sa faia e le alii o Andrei Rublev, o le ata ua va’aia ai tagata ‘ese e toatolu, ma Aperaaamo o loo nonofo mai i luga o le laulau, ma le nofoa avanoa e pei e foliga, o lo’o vala’auina se tagata e ulufale ma faailoa lenei va’aiga matagofie. O le nofoa avanoa, ua

vala’auina ai tagata e ulufale ma a’ai ma mafuta ma sisiva ma le alofa, ua soso’o faatasi i lenei faiga’ai.

E faapea le agaga o le Tolutasi Paia o le Atua, o le mafutaga ua valaauina ai i tatou e a’ai ma mafuta faatasi i lana faiga’ai.

**Tatalo:** Faafetai le Atua i lou Tolutasi Paia ua valaauina ai i matou i le fiafia ma le mafuta faatasi ma lau Afio. A’oa’o mai i matou i ala uma matou te mafuta ai i lau afio.**Amene**

**Mafaufauga loloto:** Afai e te fia iloa atili le Tolutasi Paia o le Atua, ia, faitau le Tusi Paia.

**Aso Lulu Iulai 4, 2018 “O le vala’aulia ma le fa’asoa”**

**From welcome to hospitality...’**

**Tusi Faitau Ruta 2:1 – 14**

**Matua: Ruta 2: 10 -12** *‘Ona faapaū faō ai lea o ia, ua ifo toele, ua fai atu ia te ia, Se a le mea ua e alofa mai ai ia te au, ma e silasila mai ia te au, o au foi o le tagata ‘ese? Ua tali mai Poasa, ua fai mai ia te ia, Ua uma ona faaali mai ia te au mea uma ua e faia i le tinā o lau tane talu ina oti o lau tane; ma ua e tuulafoai i lou tamā, ma lou tinā, ma le nuu na fanau ai oe, a ua e sau i le nuu e te lei iloa anamua; ia totogi le Alii i lau galuega, ia tuuina mai ia te oe se tau tele mai le Alii le Atua o Isaraelu, ua e sau e faatuatua i lalo o ona apaau.’*

E faapea Isaraelu ma taiala e fa’asoa ai le agalelei i tinā ua oti a latou tane. O Naomi o le tinā ua oti o lana tane, ae o le tinā na nofo i le tagata Moapi, o le tinā ua manatu e toe fo’i i Isaraelu i lona nuu moni. O Ruta na le tu’ua le tinā, a ua mulimuli i le tinā, ma avea ai o ia ma tagata ‘ese, ua avea ma tagata moni o Isaraelu.

O Ruta ma lana tausiga, ua faamanuia i ai Naomi ona o le fa’asoa agalelei. E faapea foi Poasa, ina ua iloa e Poasa le fa’asoa alofa a Ruta i le tinā o Naomi. I lenei tala, ua manatua ai le tali a Poasa ia Ruta, faapea le tali a Ruta ia Naomi. Ua iloa e Poasa le maoa’e o le fa’asoa i le tinā e tusa ma le tulafono, na ia iloa ma mātāu ma le atamai, na faailoa ia Ruta taiala ua ia faatinoa ma avea ai o ia ma tagata moni o lona nuu.

E toatele foi fai-faleaitu, e fīafia e faia tala i tinā e pei oni tala e talie ai, ae fai mai Pete Wheeler, faafetai i le tinā o lo'u tinā, na fa'asoa maia le agalelei i lo'u ā'iga. I nei vaitaimi i atunuu i sisifo, ua le maua le fa'asoa ma le agalelei, sa mafuta ai o ā'iga potopoto i ia vaitaimi.

O le lui i lenei taeao, Po ua oo lau fa'asoa i le fa'asoa e lē gata mai ai? O iina e iloa ai le fa'asoa, e tumu i le agalelei. O le fa'asoa a le Atua e le gata ua vala'auina i tatou, a'o le Atua na te foa'i mai lona agalelei, opo'opo atu i tatou i ona apa'au alofa, toe fa'aleleia ma toe faatula'i i tatou i le filemū ma le soifuaga matagofie.

**Tatalo:** Le Alii e, ua o'o le togiola ina ia faamagaloina ai a'u. Fesoasoani mai ina ia o'u galue ma faatino galuega ma le lē faalogologotiga. **Amene.**

**Mafaufauga loloto:** O le a se auala ua faatino ai le fa'asoa ua sili atu, ma le mea na manatu i ai lou ā'iga? E lelei pea faatino i mea'ai.

**Aso Tofi Iulai 5, 2018 “Iesu, ulufale mai i fale nei”**

**Welcoming Jesus**

**Tusi Faitau: Luka 10: 38-42.**

**Matua: Luka 10:38-39,** *‘Ua latou o, ona afe atu lea o ia i le tasi aai; o le tasi fafine foi e igoa ia Mareta, ua talia o ia i lona fale. O lona uso foi e igoa ia Maria, ua nofo o ia i tafatafa o vae o Iesu, ma faalogo i lana fetalaiga.’*

O le agaga o le Atua o le fa'atasia lea o lana fanau, o le agaga e faafeiloa'i ai i ona tagata.

O a'u uō o Dan ma Benedict na vala'auina e ulufale i le fale kamuta, o loo faatau ai nofoa ma laulau ua foliga ua tuai. Na savalivali le alii o Dan ma va'ava'ai, ma ua le fia pupula i mea ua i le fale kamuta peitai, na tau lava va'ai i se laulau, ma savali mai i lē ona le fale, ma faailoa na te faatauina le laulau.

O se vaaiga uiga 'ese na tau atu i ai Dan, o loo faia le tatalo a le toeaina e ana le fale kamuta, ma Benedict. Na faalogologo Benedict i tala o le malaga faale faatuatua a lē ona le fale kamupa, ma faapea atu Benedict,

“e mafai ona e kamutaina lou faatuatua ina ia o’u iloa ai le Keriso moni?”

O le vala’auina o se tasi i lou fale ma ou eleele, ua e sauni e faalogo, ma tuu atu o taimi i le a’oa’o mai a lē ua valaauina, e pei ona nofo o Maria i vae o Iesu, ao a’oa’o mai – ma faalogo i a’oa’oga ma le faatinoga o le olaga silisili ma le taua.

E tele taimi tatou te maua ai o a’oa’oga i nisi, sa tatou le manatu i ai. O le fiafia o le Alii i lou olaga, ona ua atagia mai i lou tagata. O le olaga ua atagia ai le olaga fou ia Keriso Iesu.

O Mareta ua faamuamua o ona tiute e iloa ai lona tagata, o se tala e faigatā lona faamatalaina, auā e tāua foi le auunaga a Mareta peita’i, ou te manatua, o Mareta na valaauina Iesu e ulufale i lona ā’iga, sa tatau ona faamuamua ma faalogologo ia Iesu ma ana fetalaiga e pei ona faia e Maria.

**Tatalo:** Le Agaga Paia e, seia e faatumuina a’u i le olaga fou, ma ola ai ma talia lou vala’au mai. Ia o’u faalogo ma iloa tala’aga o tagata ua a’oa’o mai. **Amene**

**Mafaufauga loloto:** Ia maua se taimi e maua ai se a’oa’oga fou, ia fiafia e faitau i tusi, ma faalogologo i tala o olaga o tagata ua a’oa’o mai.

**Aso Faraile Iulai 6, 2018 “Feiloa’i, a’oa’o, fuata’i, ma ia faia pea”  
Welcome, Mentor, Transform, Repeat.**

**Tusi Faitau: Galuega 18:1-3**

**Matua: Galuega 18:ff.2b-3,** ‘... ua alu atu o ia ia te i laua; ona ua tasi foi lo latou faiva, ua nofo o ia ia te i laua, ma galue; auā o lo latou faiva le fai fale ie.’

O e manatua le laulau lea na o’u faailoa atu, le laulau na o atu ai Dan ma Benedict la te faatauina? O le laulau e foliga ua tuai peita’i, o le laulau lenā na amata ai le feiloa’iga ma tagata.

O le alii o Dan na ia va’ai i le laulau, e tatau ona toe fausia lelei, e le na o le laulau peita’i, ua avea Dan ma lona to’alua ma ā’iga e faafeiloa’i



ma mafuta faatasi ma tagata i luga o lenei laulau, o se olaga ua fiafia e faifai pea.

E faapea le feiloa'iga a Paulo ma le vala'auina e Akula ma Pisila ma galulue faatasi ma faia le faiva o le fauina o fale ie, e faapea fo'i le vala'auina o Timoteo, ina ia tu'uina atu atoa o le loto e faia ai le galuega.

Ina ua tatou taliaina tagata i o tatou loto, tatou te tatala o tatou loto i le a'oa'oga ma toe fuata'i le olaga sili ua a'oa'o mai. E faapea le laulau e le uma lona faailoa, o le laulau e faaauau pea. O le a se vaaiga taua ua faailoa mai i lenei tala?

Peā e faitau pea, ona iloa lea o le faamalosi atu a Akula ma Pisila ia Apolo, i le talaiga o le feau a le Atua. Na la iloa le fa'amoemoe ia Apolo, na vala'auina ai Apolo i lo la ā'iga, ma fafaga ma faia mea uma o loo fia maua, ina ia tu'uina atu e Apolo lona loto atoa i le talaiga ua vala'auina i ai. Na a'oa'o, ma faalototele atu ia Apolo, ma tu'uina atu e tala'i le tala lelei.

E faapea le fausaga o le fale ie – o le galuega a le Agaga na te fauina ma toe liliuina tagata mo le talaiga o le tala lelei. Ua e vaai i se fale i'e o lo'o talanoa ai tagata ma tupu mai ai o suiga lelei?

**Tatalo:** A'oa'o mai Iesu ina ia o'u taliaina tagata 'ese ma faailoa le talimalo e pei ona e faailoa mai. Ia faapea foi ona fiafia e faalogologo i le a'oa'oga a nisi ua mafuta mai. **Amene.**

**Mafaufauga loloto:** O ai na faailoa atu ia te o'e Iesu i lou olaga? Po'o le lauga, faapea talanoaga, po'o le tali talimalo i se tagata ese?

**Aso Toonai Iulai 7, 2018 “O ai o lo'o faatasi ma oe i le potu?”**

**Who are you in the room?**

**Tusi Faitau: 1 Korinito 16: 5 – 11.**

**Matua: 1 Korinito 16:ff. 10-11a,** *'Afai e alu atu Timoteo, ia outou faaeteete ina ia ia te outou o ia ma le le mata'u; auā ua faia e ia le galuega a le Atua pei o a'u nei lava. O le mea lea, aua ne'i ta'ufaatauvaina ai o ia e se tasi, a ia molia mai o ia e outou ma le saogalemu.'*

Ua tatou maua le talanoaga i le tagata ua ‘tuuina atu’ O le kerisiano e mafuta ma tapua’i faatasi e faapea foi le tāua o le tagata ua ‘aveina atu’ le tala lelei. O le avefeau ua tatou feiloai ma lagona le mafuta faatasi, ua iloa le olaga faa-Keriso ua tu’uese a ai pa vaeloto ma ave’esea le fefe e faailoa atu i le lalolagi le tala lelei.

E faapea le vala’auina e Paulo o Timoteo, e ui ina faatalia o ia, a ia aua le fefe ma ia faataunuu le talaiga ua vala’auina i ai. O le vala’auina o se tagata na te aumaia le tala ia Keriso Iesu, e faapea fo’i le tamaoa’iga o le tagata ua fa’atali atu.

E faapefea ona e fesoasoani i lē ua valaaina i lou atunuu, i le aulotu, faapea lou ā’iga? E faapefea ona atagia ai le Atua ua vala’auina le tagata mo lona finagalo? Peā feagai ma mafutaga faale aulotu, i pati, ma galuega, o mafutaga ma tagata i le potu, o ai i latou ua avea ma tagata ua folasia le alofa ma le tamaoaiga o le Atua?

Ou te manatu ina ia manatua o nei fesili taua e luita ai i tatou e le Agaga na te faafouina o tatou loto ma liliuina o tatou mafaufau, auā sa fai i tatou ma tagata ‘ese, a ua faafouina i tatou ia Keriso Iesu.

**Tatalo:** Seia e liliuina ma faafouina o matou loto, ina ia vala’auina ou tagata ma avea ma talimalo e pei ona faia e lau afio. **Amene.**

**Mafaufauga loloto:** O ai ua e manatu e faailoa le talimalo mo se tagata? E faigata le olaga ofoina atu

**O le Galuega a le Agaga”The creative Spirit’  
‘1... Faatinoga ma le siva’ ‘Forming and dancing’  
( saunia e Jane Gonzalez )**

**Aso Sa Iulai 8, 2018 “O tino mai le Atua” Bodies of God**

**Tusi Faitau: Kenese 2:15-23.**

**Matua: Kenese 2:18,20b,22,** *‘Ua fetalai mai foi le Alii le Atua, E le lelei ina toatasi le tagata; ou te faia sona fesoasoani e tatau ma ia. Ao Atamu, e lei maua se fesoasoani e tatau ma ia. O le ivi asoaso foi na toina e le Alii le Atua ia Atamu ua na fai a’i le fafine, ona ia aumaia lea o ia ia Atamu.’*

I lenei vaiaso ua faailoa mai lenei avanoa taua, tatou te toe manatua ai le galuega ma le mana o le Agaga Paia, ma le Atua ma ana galuega tetele na faia i le lalolagi. Ua faailoa mai le tamaoa'iga o le Atua ua lē manatua e tagata lana fuafuaga atamai, ma le faataotoina o le matagofie o mea na ia faia i lona potu ma lona silisiliese.

O le iloa o le Atua ma mea na ia faia, e iloa ai e le tagata ona tiute taua ua faatonu mai, ina ia pulupulu lima mea na ia faia, ma iloa ai le Atua o loo faatasi ma tatou.

O le tasi o mea matautia i nei vaitaimi, o le faatasia o ā'iga, i le va i le tamā ma le tinā.

O le tala lona lua i le faiga o le fafine mo Atamu, o loo taoto ai se faafitauli, ua avea le tinā ma fesoasoani i le tamā peitai, ua i ai le olaga soonafai e le tamā.

E faapea foi le tala ua tuuina atu e le Atua mea uma i le tamā na te tausia mea uma na ia faia peitai, ua manatu le tamā ia pulea ma faia o lona loto e tusa ma ona manatu, ma ua faaleagaina ai le tamaoa'iga o le foafoaga na faia e le Atua mo le tagata e soifua ai.

I le Kenese 1:28. O le a'oa'oga ina ia galulue faatasi le tamā ma le tinā. O tino ua faatasia ma le mafuta faatasi. O manu ua faia ma tuuina atu i le tagata na te pule ai, a'o le fafine ua faia e galulue faatasi ma mafuta faatasi, ma tauave tutusa a la matafaioi.

**Tatalo:** Faafetai le Alii ona o au mea na e faia. Ia avea a'u ma tagata e ava ma faaaloalo i tagata ma mea uma na e faia, **Amene.**

### **Aso Gafua Iulai 9, 2018 “Faailoa, faailoa i puipui”**

#### **Mirror, mirror on the walls**

#### **Tusi Faitau: Salamo 139: 7-18**

**Matua: Salamo 139: ff.13-14,** *‘Auā sa ia te oe o’u manatunatu; na e ufiufi ia te au i le manava o lo’u tinā. Ou te vivii atu ia te oe, auā ua faia a’u e ala ai ona matautia ma ofo tele ai; o mea na e faia, o mea mamana ia; ua ou matuā iloa e a’u nei mea.’*

O lo’u tinā sa faatalitali i lo’u fanau mai, sa matou nonofo faatasi ma le uso o lo’u tinā ma lona tuagane.

O Gerald o le tama aoga a le uso o lo'u tinā, pe ā ma le sefulu tolu poo le sefulu fa tausaga o lona matua, ma ua fiafia o ia i lana a'oga, ma faapea mai lo'u tinā, 'e te iloa, o le meaalofa a Gerald na su'i mo oe ae te lei fanau mai'.

Na fa'aaogāina lona atamai su'isu'i e su'i ai se pea se'evae, e ui ina faale lelei, aua malu ai o'u vae na o'u savali ai.E 'ese le taua o se mea ua faia mai ese tagata i lou ā'iga, e ui ina foliga faatauva. E 'ese le fiafia ma le loto maulalo, pea tuuina mai e se tasi se meaalofa e le'i fa'aaogāina se tupe e saili ai, a'o le taimi sa faia ai le meaalofa, ma le fiafia ma le fa'actete. E taua tele o se meaalofa na faia i ou lava lima ma avea ma meaalofa ua faailoa atu i tagata uma.I nei vaitaimi ua toatele tagata ua maua le taleni e faatino i o latou ā'iga i vaiga matagofie, faapea le faatupulaia o taleni.

O le Salamo i lenei taeao, ua faailoa ai le tamaoiga o le Atua na faia ai i tatou.O le tagata ua tula'i mai ma le matagofie o le tagata na faia ai, peita'i o le toatele o i tatou ua le mātauina ma lē lelei le vaai, ua palasi le nila, o nai mea nuti ua le manatu i ai, ua lē iloa ai le silisili ese o le Atua ma lana foa'i i le tagata.

Po'o a'oa'oina 'ea i tatou ina ia iloa le matagofie o mea na faia e le Atua?

**Tatalo:** Fesoasoani mai le Alii e, ina ia ou maua le ola e ofoina atu ia te Oe,**Amene.**

**Mafaufauga loloto:** Vaai i le faaata i lenei vaiaso ma faapea atu, 'O au na faia ma le matagofie e le Atua'. Ia faafetaia le Alii ma lona faamaoni.

**Aso Lua Iulai 10, 2018 “O le toto, o le afu, ma loimata”**

**Blood,sweat,and tears**

**Tusi Faitau: Esoto 35: 20-35.**

**Matua: Esoto 35:31-33,** *'ua faatumuina foi o ia i le Agaga o le Atua i le poto,ma le faautauta, ma le iloa lelei, e faia ai galuega uma lava; ina ia mafaufau o ia i galuega faigata, e galue o ia i le auro, ma le ario,ma le 'apa menea; e togitogi foi i maa e faamau ai, e togitogi foi i laau, e fai ai galuega faigata uma lava'.*

E i ai se upu taua mai aso ua mavae, e pei ona faailoa e le tusitala i lenei taeao e faapea, ‘Genius is one per cent of inspiration and ninety per cent perspiration’ – O Atisi (artists) uma ua tosina o latou lagona, i se tasi ua fa’amumūina o latou manatu i le foafoaga i le valiina o ata, fausia o faatagata, faapea le tusia o solo peitai, o le faataunu’uina o nei vaaiga, e a’afia ai le tele o itula ma le afu, e moomia ai le faalelei atili, faapea le toe fetu’unai, e a’afia ai le tigaina, le afu, ma loimata.

E iai nisi e muimui i le faatinoga o nei ata e tagata peitai, ua latou iloa mulimuli ane, o galuega na faia ma le tigaina, le afu, ma loimata o loo atagia ai le loto o le tagata na ia faia.

Ua tele galuega foliga i faatinoga i le faaleleina o tatou fale peitai, ua le maua le Agaga o le potō ma le mataisau na fai ai muamua o ia mea.

I le avea ma Kerisiano, ua tatou iloa o galuega a Atisi ma le mataisau o le potō, e mai le Agaga o le Alii lea.

O le faatinoga o se mea e le na o le faia, ao le agaga ua tuu atoa i ai ua aliali mai ai se galuega taua ma le silisiliese o lona matagofie, o faatinoga e lē o atagia ai le kopiina o se ata na faia ese isi, ao le galuega na faia mai le Agaga o le Atua.

O le Atisi ua faailoa mai le galuega na faia ma le potō ma le mataisau o le Upu moni - e ui ina tatou le fiafia i ai ma faagalogalo, ma lē taliaina peitai, e ese le faailoa mai e le Alii i vaaiga silisiliese.

Ua valauuina i tatou ina ia tatou iloa galuega mamana a le Atua ma faailoa atu i vaipanoa uma o le lalolagi. Po ua avea ea lou faatuatua e faaleleia ai mea o loo iai le feitaga’i ma le olaga fa’apito?

**Tatalo:** Le Alii e, ua e foa’i mai ia te au meaalofa taua ua ou maua i lenei ola. Seia e faailoa mai ina ia tuuina atu i le lau afio, le loto ma le auaunaga. **Amene.**

**Mafaufauga loloto:** Faa-avanoa sou taimi e mafaufau ai i le galuega faapitoa na e faia. O e lagona le fetalai mai o le Agaga i le na faatinoga?

**Aso Lua Iulai 11, 2018 “Aumaia ia te a’u le olioli i lo’u loto”**

**Give me joy in my heart**

**Tusi Faitau: Faataoto 8:22 – 36.**

**Matua: Faataoto 8: 30–31,** *‘na ou i ai ma ia, o a’u o le tufuga; na fai foi a’u mona fiafia i lea aso ma lea aso;sa ou olioli i ona luma i aso uma lava. Sa ou olioli i mea e mau ai tagata i lona lalolagi; o lo’u fiafia foi, sa i le fanau o tagata lea’*

E lei leva tele na o’u faatauina ai le computer, ma o’u maua ai se polokalame e a’oa’oina ai le tagata i le valiina o ata. Ua faailoa mai, e pule lava oe i le faaaogāina o le vali, poo le vali suau’u, poo le vali vai, e te filifili lava le ituaiiga o palasi e faaaogāina, o peni ma peni vali. Na ou fiafia i le valiga o ata, peita’i e le o a’u e atoatoa le taleni e pei o tagata ta’uta’ua i le valiina o ata, a ua maua le faatinoga e avea ai ma tusiata ma fiafia ai lo’u loto i le faatinoga.

E lei leva tele sa sailia ai le fia maua o ni tagata valiata mo tagata matutua. O nisi na a’amu i nei ata valiina peitai, ua faatupuina le olioli o le loto i le valiina o nei ata, ua faamalieina ai o matou loto i faiga o le faatinoga ma ua avea ma mea malie.

O le tusi faitau i le asō, ua faailoa atu e le tagata le silisili ese o le Atua ma le potō o le Alii na ia faia ai mea uma lava. O le Atua ma tagata fesoasoani ua avea ma upu malie ma faataoto le alafua, o le potō ma le silisiliese o lē na faia o ia mea. Afai ua olioli le Atua i lana lalolagi ma mea na ia faia i le potō ma le silisili ese, e faapena foi ona tatou olioli faatasi ma Ia peita’i, ua tele mea sesē i le lalolagi ua tatou faia.

O le fa’aoso’osoga ua avea ai le lalolagi ua faapogisaina, ma oo mai ai le iuga ua faaleagaina ai le lalolagi peitai, e le tatau ona pogisa i tatou i le faailoa mai o le potō ma le mataisau o le Atua na foafoaina le lalolagi ma le matagofie. E tatau ona faailoa atu le matagofie, le olioli, ma le fiafia faatasi ma faailoa le silisiliese o le Atua ma mea na ia faia.

**Tatalo:** Le Alii e, aumaia le olioli o lo’u loto ou te iloa ai le silisiliese ma le potō o lau afio ma le foafoaga na e faia. **Amene.**

**Mafaufauga loloto:** Ia maua sou taimi e te vaai ai i le Salamo e 8 – ‘A ou vaavaai atu i lou lagi, o le galuega a ou tamatamai lima - E faapefea ona e faailoa le olioli ma le fiafia i le Alii ma mea na ia faia?’

**Aso Lulu Iulai 12, 2018 “O le Alii o le siva” The Lord of the dance  
Tusi Faitau: 1 Nofoaiga a Tupu 15:25-28.**

**Matua: 1 Nofoaiga a Tupu 15:28,** *‘Ua avae e Isaraelu uma le atolaau o le feagaiga a le Alii ma le alalaga, ma le leo o le foafoa, ma pu, ma sumepalo, ua ta foi napeli, ma kitara.’*

Ina ua o’u aulia le 20 o o’u tausaga, o lo’u loto atoa ua tosina i le ta’aloga o le hockey. Na o’u ta’alo i la’u a’oga, ma le ‘au a lo’u atunu’u, faapea le univesete, na o’u fiafia ina ua ave’a a’u ma tagata o le ‘au manumalo. O’u te manatua, peā siko’a se tagata ma manumalo ai le ‘au, ona alalaga lea a tagata ma le fiafia. Pe a faatusatusa i o matou aso pe a manumalo, e faa’ete’ete na o le faatalofa, ae lē fusifusi mafeasogi ma tagata. Peita’i, i nei vaitaimi pe maua se siko’a, e fiafia ma faatino le fusifusi ma lima ua papa’i atu ‘oso’oso ma faata’avili ma fa’ailoa le loto fiafia.

Ioe, e le o tagata uma e maua le loto fiafia peitai, o’u te fiafia ina ia maua e le tagata ta’alo le fa’ailoa atu o le agaga fiafia, ma faailoa le olioli i lou loto.

O tagata e faailoa le mitamita ma fiafia e faatino le siva. E ‘ese’ese atunu’u i tū ma aga, o nisi e fiafia ma leo tetele ua lē manatua ai le fiafia ma le faanoanoa ia tatou aga, e pei o Mekala ua inoino ia Tavita, ona o le fefusia’i, patipati, ua lagona ai le ea ma le leo.

Ua faailoa mai le faitauga i leni taeao, le loto fiafia ma le alalaga o Isaraelu ina ua latou toe aumaia le atolaau i le mea e tatau ona tuuina ai.

O musika ma le pese ua pepese ma faailoa e faapea foi Tavita ua siva ma le fa’agae’etia. Ua faailoa le fiafia, o se faatinoga e tatau ona faia, e pei ona faia e Isaraelu i aso ua mavae. O le siva, e lei ave’a ma siva e faalumaina ai, a o le siva ua faailoa ai le lotomaulalo, ma le ofoina atu o le loto atoa i le Alii.

**Tatalo:** Le Alii e, ua matou tuuina atu i matou i lau Afio. Ia e talia i matou ma faia pea lou finagalo. **Amene.**

**Mafaufauga loloto:** ‘Ia latou vivii atu i lona suafa ma le siva ‘(Salamo 149:3).Mafaufau i lenei Salamo, ma siva ai a’o faia lau tatalo.

### **Aso Tofi Iulai 13, 2018 “O ata ma faailoilo” Image and icon**

#### **Tusi Faitau: Salamo 135**

**Matua: Salamo: ff. 15,16,18,** *‘O tupua o nuu ese,o ario ma auro ia, o galuega a lima o tagata. E fai o latou gutu a e le feganavai, e fai o latou mata a e le vaai...O e faia ia mea ua tutusa lava ma i latou, o i latou uma o e faatuatua i ai.’*

‘O ata ma faailoilo’ poo ‘image ma icon,’ o upu ua tatou faaaogāina i nei aso. O se fale fou ua fausia i lou ā’iga, ua faailoa i ata ma faasalalauga. O vaaiga ua faailoa ai ā’iga ma ulugalii ma le matagofie o fale o loo nonofo ai. O le va’aiga e tusa ma le olaga i nei taimi o lo’o tatou naunau i ai.

O faailoilo ma ata ua faatautaia i lenei olaga fou, e pei ua mulimuli i faata’ita’iga a le Lotu- o faailoilo i lavalava, faapea solo ma upu e tumutumu i ai tagata, faapea tu ma aganuu ua tumutumu i ai tagata e matamata ai.

O le faafitauli i ata ma icons, o le olaga ua atagia ai le soifuaga o tagata i nei ona po. Ua faamanatu mai e le Tusi Paia, ua avefa ma olaga ua tapua’i i ai tagata. O faatusa o tagata paia ua fiafia ma tapua’i i ai.

O le ifo i tupua e le tatau ona tatou ifo i ai, e le faaolaina ai i tatou. O le soifuaga ua fiafia i nei faatagata ma mafuta ma tatalo i nei faatusa, nai lo le faatinoga o le alofa i le Atua e tatau ona faailoa atu i ou tuaoi, faapea uso o loo fia maua se fesoasoani.

O le naunau o le loto faamālieina i le tamāoāiga ma le oloa o lenei olaga, ua mate ai le faamo’emo’e e faatino i ē o loo moomia se fesoasoani, a’e ua faataunu’u pea le olaga ua manatu i ai.

O le Tusi faitau i le asō, ua valaaaina ai i tatou ina ia filifili i le tapua’iga ua aumaia e Iesu, e faaolaina ai lou agaga, nai lo le ifo i tupua, ma saisaitia ai i tatou i le pogisa o le agasala.



O le naunau i le tupe ma le malosi e malu ai i lenei ola. Ua mafaufau i manuia o aso nei, nai lo le mafaufau mo tagata i aso uma.

Po’o e loto tele e faailoa o o’u tupua, ma tuuina atu lo’u loto i le Atua o loo i ai le alofa tunoa ma lona tamāoāiga, e tausia ai i tatou i aso uma lava?

**Tatalo:** Le Alii e, seia e ave’esea lo’u fefe ma le atuatuvaile. Faamanatu mai o loo savavali i matou ma oe i aso uma. **Amene**

**Mafaufauga loloto:** Ia faia se faatoaga e manatua ai i latou o loo fia maua se fesoasoani.

**Aso Toonai Iulai 14, 2018“O le tino aulelei” The body beautiful  
Tusi Faitau: 1 Korinito 6: 9-20.**

**Matua: 1 Korinito 6:19,** *‘Tou te le iloa ea, o lo outou tino o le malumalu lea o le Agaga Paia ua i totonu i ai te outou, o loo ua ia te outou mai le Atua, e le aiā foi outou ia te outou?’*

Na o’u faia le a’oa’oga, e talia ai tagata e ulufale mai i le Ekalesia mo fanau laiti o le aulotu. Na fesili mai se teine itiiti ia te au, “Aisea ua le talia ai e le aulotu le a’oa’oga o le olaga tu’ufa’atasia?”

E pei ua fesili mai le teine, o le a’oa’oga a le Lotu, e uiga i le faiā’iga, poo le faia o le faatinoga o le feusua’iga, sa tatau ona faailoina i lenei faatasiga.

A,,ua o’u maua le avanoa ma te talanoa ai ma lenei tamaita’i, ma faailoa ia te ia uiga taua ua a’oa’o mai i le Lotu.

E faigata ona a’oa’o atu i nei mea tāua. E pei foi o Kerisiano i Korinito, ua tatou feagai ma atunuu, e ese foi a latou tu ma aga e uiga i le alofa, ma faaipopoga, ma le faataunu’uga o le feusua’iga.

E pei o Kerisiano Korinito, e tatau ona a’oa’o atu i le lalolagi le olaga faapaiaina. O le olaga faia’iga, o le olaga fiafia e faataunuuna, auā ua faapaiaina e le Atua, o lē na faia mea uma lava ma lona Agaga ua i ai ma ona tagata, ma ia faia ma le ava i lē na faia.

O o tatou tino, e faia ma le fiasia, ma olioli i le faataunuaina o le faia'iga peitai, e lē talafegai le faatinoina ai o o tatou mana'o ma le lē ava i le isi tagata.. O le mafutaga faa-feusua'iga (sex) o le mea e paia, e faatino ina ua maea le faia o le faaipoipoga, ma faia ma le ava a le tane i lana avā.

Ou te manatu e lautele lenei a'oa'oga tāua, e le gata mai i le feusua'iga, auā e tele mea o loo faaleagaina le tino,e pei o le inuava, o vailaau faasaina, o le tele o le taumafa, poo le faatinoga ina ia faaitiiti le taumafa, ina ia foia le toto maualuga ma le suka ma le tino puputa.

Ioe e tele lava mea ua faaleagaina ai o tatou tino.

O nei mea uma e tatau ona tatou lagona ma faatauaina, ma faalogologo i le Agaga ma lona fetalai mai.

**Tatalo:** Le Alii e, ua e alofa mai ia te au, ma e aumaia le aulelei o o'u mata. Ia avea a'u ma tagata e pei ona e alofa mai, ina ia ou ava ma le migao i tagata ma mea uma na e faia, e tumau ai le tino aulelei mai lau afio'. **Amene.**

**Mafaufauga loloto:** Pe afai ua e lagona le lui ua tuuina mai, e lelei ona faifai loa.

**'O galuega faaolaola a le Agaga' The creative Spirit'  
2...tautala, pepese, ma ta'aalo.  
(saunia e John Birch)**

**Aso Sa Iulai 15, 2018 "O le loto ma le agaga" Heart and soul**

**Tusi Faitau: Salamo 33**

**Matua: Salamo 33: ff.2-3,** *'Ina vivii atu ia i le Alii i le kitara; ia fai pesega ia te ia i le napeli e sefulu ona manoa. Ina pepese atu ia ia te ia i le pese fou; ia outou ta malie ma le leo fiasia.'*

O a'u o se tama ua iva(9) ou tausaga, na o'u pese i le vaega o le leo maualuluga, o le taimi na tete ai lo'u moa peita'i, na o'u fiasia i la'u solo ina ua faailoa mai e le ta'ita'i lona lima, ma le fiasia i le manaia o lo'u leo.

Mai lea vaitaimi, ua o’u taitaia tapuaiga a le Lotu ma ou le faaaogāina le napeli e sefulu ona manoa, a ua o’u faaaogāina le kitara e 6 ona manoa.

O le tele o pese mai le 1970 o lo’o matou usuina nei, ma tusia pea, ma faailoa le silisiliese o le alofa o le Atua, a’o nisi pese ua galo atu o latou upu, a ua maua i isi pese fou ua faamatala atili ai le silisiliese o le Atua alofa i nei tupulaga. O le ‘ofu’ofogia lea ma le taua o le tapuaiga.

I le faaaogāina o le Salamo, na te le tosoaina manatu e lagolagoina le kitara ma le napeli le usuina o pese faapea le kitara ma le okeni i nei ona po.

O nei pese, tatou te fiafia e vivii i taimi uma e aunoa ma le napeli ma le kitara. O pese fou ua faamatala mai i o tatou loto le lalolagi ma mea o loo tatou nonofō ai, ma oo mai i le tagata tapua’i mea taua mo lo tatou ola.

E le gata i lea, o le mea taua o le faamalosi atu i le tagata tapua’i, e tula’i ma viia le Atua, i soo se mea e aogā ai, e faatino le vivii ma pesegea e ala i galuega lelei e avatu atu ai le viiga i le Atua.

**Tatalo:** Faafetai le Alii ona o i latou ua tusia ma a’oa’o mai pese, o taleni aogā ua matou fiafia ai e pepese ma viia ai le suafa o lau afio. Seia e faagae’etia e lou Agaga a matou taleni, matou te faia ai lenei auaunaga e viia ai o lau Afio. **Amene**

## **Aso Gafua Iulai 16, 2018 “O le vaifofō o le musika”**

### **Medicine music**

**Tusi Faitau: 1 Samuelu 16:14-23.**

**Matua: 1 Samuelu 16:16,** *‘Ia fetalai mai nei lo matou alii i au auauna i ou luma, matou te sailia se tagata ua poto e ta i le kitara; i le a oo mai le agaga leaga mai le Atua ia te oe, ona ta ai lea e ia i lona lima, e te lelei ai.’*

O loo taoto le agatonu o le Faitau aso i lenei taeao, pau si mea e tuliloaina, ua faapea mai ‘ua alu ese le Agaga o le Alii mai ia Saulo, ma faatumuina le loto o Saulo e le agaga leaga,’ o le mea lea ua faanoanoa

o lona loto. O le fesili, ‘Aisea ua le faia ai e le Alii se loto fou, aua tu’u pea e le Atua le agaga leaga ia Saulo?

O le vaaiga Faa-Feagaiga Tuai, e faia e le Atua lona finagalo na faatupu pea le agaga leaga. O le upu agaga leaga, e tele ona uiga peita’i, ua faaaogāina e faatatau i le tagata e leaga lona loto, ma faatupu le ita i vaaiga lē lelei.

Ua iloa e ana auauna le faafitauli ua tupu mai ia Saulo, ma faailoa i ai le musika o le fofō aogā e ave’esea ai lona loto vevesi. Ua valaauina Tavita, ma ua tatou maua le tala i puapuaga o Saulo, o le kitara ma le napeli na taina e Tavita ma maua ai le filemu, ma to’a ai le loto o Saulo.

E pele ia te a’u le musika, pea oo i taimi ua vesia le mafaufau, e pai mai ia te au le pese e malie ai lo’u loto i aso uma. Ou te masani e ta le ukulele faapea le kitara ma pese, o le vaifofō mo a’u i aso uma.

E lei leva tele na maua e foma’i ma faailoa mai, o le musika e tāua tele e avea ma vaifofō peā oo ina vevesi le mafaufau ma lē tonu o manatu, nai nisi faatinoga a foma’i ma fualaau, e faamaloloina ai le mafatia o le loto, peā sauni foi i se taotoga.

Ua faailoa mai e le tusi i lenei taeao, ina ua ta e Tavita lana napeli, ua maua e Saulo le loto to’a mālie.

**Tatalo:** Faafetai le Alii i vaifofō o le musika, i le loto fiafia ma le filemu i lo’u loto, pea oo ina oo mai o faafitauli faapea le loto le mautonu. **Amene.**

**Mafaufauga loloto:** Mafaufau i le faaaogāina o le musika e avea ma vaifofō pea tele le vesia o lou loto.

**Aso Lua Iulai 17, 2018 “Ua matala o latou gutu ma laulaufaiva”  
Setting tongues free**

**Tusi Faitau: Luka 1: 57-80**

**Matua: Luka 1: ff.64,65,** *‘Ona matala loa lea o latou gutu ma lona laulaufaiva, ona tautala lea o ia ma faafetai i le Atua. Ua oo ai le mata’u i e ua latou tuaoi uma. Ua soo foi le atu mauga uma o Iutaia i le tala i nei mea uma.’*

I le tusi faitau i lenei taeao,ua tatou maua se tala taua mai le Tusi Paia, o le tala mai augatamā ua avea o se vaega o le tapuaiga kerisano – o le ‘Benedictus’ poo le ‘pese a Sakaria’.

O Sakaria o le ositaulaga mai le ā’iga o Arona, na faaipoipo ia Elisapeta ma o se tala faanoanoa, auā ua avea ma tagata matutua ma le leai o se atalii, o le mafatiaga lea e tatalo atu ai i le Atua. Ona folafola lea e le Alii le fanau mai o le tama.

Ua faaletonu le faatuatua o Sakaria i le Atua, ona faagūgūina lea o ia e le Atua. Na fanau mai le tama ma fia maua o lona igoa, ona manatua lea e Sakaria le folafolaga a le agelu, e faaigoa le tama ia Ioane, ma toe matala ai lona gutu, ma avatu le faane’etaga i le Atua. O nei upu uma ua pei o se timu tō le masa’a mai o nei upu faafetai.

O Sakaria e le o se failauga ta’uta’ua a’o le’i o’o mai o lenei faamanuiaga, na o se tagata e pei foi o o tatou tagata e faamaoni i le fa’atinoga o lana galuega na valaauia i ai o ia.

E i ai le faaetetega e tautala ai i le tele o tagata, ma ua le faailoa ai le meaalofa taua a le Alii o loo i totonu o o tatou loto.

I taimi uma ua valaauina ai i tatou e tatalo, ia e manatua o loo e tu i luga ma lauga, pe tuu foi se peni ma tusia ai o au tatalo, o le Atua lava ua tatalaina o tatou gutu ma laulaufaiva, ma faatumulia le loto e le agaga ua fetalai mai, ma faia mea uma mo o’e e lona Agaga.

**Tatalo:** Faafetai le Alii ua e aumaia o upu sili faapea faamanuiaga i lo matou ola. Ia faagae’etia i matou ina ulufale lau upu a’o matou tatalo ina ia faaolaina ai tagata e toatele, **Amene**

**Mafaufauga loloto:** Faata’ita’i e faia au tatalo i aso uma. Tusitusi i le pepa mafaufauga o lou loto ina ia manuia tagata o lo’o e tatalo i ai.

**Aso Lulu Iulai 18, 2018 “Pe a oo ina galo atu le musika”**

**When the music fades**

**Tusi Faitau: Salamo: 137**

**Matua: Salamo 137: ff.3b-4,** *‘...ua inoino mai ia olioli, ua faapea mai, Ia outou pepese mai ia i matou ni pese a Siona. Pe faapefea oma matou pepese le pese i le Alii i le nuu ese?*

E tele taimi faigatā e musu ai le tagata e usu ina le pese- ona o mea faigatā ua taia ai le loto ma faamaulaloina, o le lē fiafia, o le lotoita, poo le nuu faama'ima'ia, poo le faatuatua ua vaivai lona faatinoga.

O ia taimi na tusia ai e le Salamo i taimi o le tafeaga, o loo tumu ai le loto faanoanoa, faapea ma le ita i tagata ua faapologaina i latou. Se mea ina a faigatā, o le usuina o le pese sa tatau ona usuina i le lo latou nuu ma fiafia ai,

Fai mai le tala a le alii o John Bitch, e faapea foi se lagona na ia maua i le usuina o lenei pese, ina ua toe mafaufau i le laina mulimuli, e pei ua mou atu le tapuaiga ma lona uiga.

O le tasi pese taua i le tapuaiga, ma tusia e Matt Redmond-'Peā mou atu le musika'- na tusia i le taimi ua mou ese le agaga o le Atua ma le Lotu ma le Tapuaiga.

O le faaiuga na faia, ia tu'uese le musika ma le faaleoteleina o leo i viiga, ae avatu le leo i le Atua e aunoa ma ni laau pese.

O se mea faigatā peitai, o le lagona ua avatu i le leo ma le viiga na faatumuina ai o matou loto, o le lagona ua faatupuina ma le loto ua faagaetia. Mulimuli ane na toe faaogāina laau e taina ai pese ua atagia ai le faigamalaga a Redmond i taimi o le avatu o le loto atoa i le tapuaiga.

O le faatinoga o pese i le tapuaiga, poo pese e manatua ai taimi faigatā, poo se solo, poo se pese i le tapuaiga, e le tāua lea, peā le lagona e tatou le tāua o upu o le pese ua usuina, e iloa ai lo tatou faatuatua i le Atua o lē ua tatou viia o ia ma lona suafa.

**Tatalo:** Aumaia i ai matou le agaga o le tapuaiga, o le agaga e manatua ai lou alofa i ai matou, poo le a lava o mea faigatā e tutupu mai, ia malaga ma le faatuatua, i aso uma o lo matou ola. **Amene'**

**Mafaufauga loloto:** Mafaufau i pese e pei ona tatou masani ai. Vaai atili i upu i ou lava taimi, faitau ma le faagesegese, e oo mai le feau fou mo o'e i lenei faitauga.

**Aso Tofi Iulai 19, 2018 “Faasoa, tofusia, faaolaola”**

**Giving, receiving and growing**

**Tusi Faitau: 1 Korinito 14: 26 -32**

**Matua: 1 Korinito 14: 26,** *‘O lenei, le au uso e, pe faapefea? Pe a outou potopoto, ua tofu outou ma le pese, ua i ai le mataupu, ua i ai le gagana, ua i ai le faaaliga, ua i ai le faamatalaga; ia faia mea uma e iu ai i le faamafanafanaina.’*

E faapea le molimau a John Bitch, o lona olaga na faavae mai i tu ma aganuu ua faataotoina i tapuaiga, e faigata foi ona liliu ese mai ai.

O ia na faavae mai i le Anelekana peita’i, o lenei ua faifeau i le Lotu Metotisi. O ona lagona e le saisaitia o ia i le olaga faatapuraiga, ma e fiafia foi tagata e mulimuli i lana tapuaiga, ma fiafia i ai o lona loto.

O tagata e fa’asoa i ala taua e faia ai le tapuaiga, faaogā tala ma fa’atinoga, faapea le aulotu e galulue faatasi, ma mafaufau i suiga lelei e faatino ai le tapuaiga. Ou te talitonu i auala fou e luita ai lo matou nuu peitai, ou te faanoanoa ma faailoa le agaga o faaaliga o perofetaga, o le gagana o le laulaufaiva, faapea le faaliliuga o le Upu ua le maua i la’u tapuaiga e pei ona faia i Korinito.

O le manatu o Paulo i faatinoga o le galuega a le uluai ekalesia, o ni tagata ua valaauina e fesoasoani i faatinoga o le foa’i i le lotu, ae faapea foi le galulue faatasi i le tapuaiga.

I lenei galuega taua, ua faamatala ai e Paulo le feagai ma meaalofo faale agaga, ia le gata i le tautala o le faailoa atu o le alofa i le tautala, a ia faatupu teleina le tino o le tapuaiga i le a’oa’o atu le agaga o faaaliga ma perofetaga, ma pesega e faapea ona lagonaina ai le afioga a le Atua fetalai mai, pe a latou tapua’i ma mafuta faatasi.

**Tatalo:** Le Alii seia e faatupuina le meaalofo o le agaga e maua ai e tagata ma tupu tele ai le faatuatua ma le mautinoa o lou alofa faasoa.

**Amene**

**Mafaufauga loloto:** Poo e faatino ma aafia i galuega a le Lotu, e ala i le tatalo, ma le faitauina o le afioga a le Atua?

## **Aso Faraile Iulai 20, 2018 “Faagaetia” Inspired**

**Tusi Faitau: Luka 1: 39 – 56**

**Matua: Luka 1: 46b – 48,** *‘Ua vivii atu lo’u loto i le Alii, ua olioli foi lo’u agaga i le Atua lo’u Faaola, auā ua silasila mai o ia i lana auauna fafine ua faamauloina; auā e amata mai nei ona faaamuia mai ia te au o tupulaga uma;’*

I le amataga o le vaiaso sa, sa tatou feagai ma Sakaria – le ‘Benedictus’ o le pese ua lauiloa e tagata Kerisiano, e faapea foi ona tatou maua mai ia Maria o lana pese lau iloa, o le ‘Magnificat’ o loo taoto i le pese a Hana.(1 Samuelu 2:1-10)

O le matagofie o nei upu ua tatou iloa ai o le olaga o Maria ma lona tuputupu ae.

Afai o o’ē ose tama, e amata ona a’oa’oina oe ina ua e aulia ou tausaga e 5, e te o’o atu i le sefulu o ou tausaga, ua a’oa’oina oe i le tulafono faa Iutaia, ma ma’ea o au a’oa’oga i le sefulu valu o ou tausaga peitai, afai o o’ē ose tagata atamai, e te maua lava nei a’oa’oga uma mai lou tinā, faapea tinā o lo outou nuu.

O le tala i le tatalo a Hana ua faafogaina e le Alii lana tatalo ma aumaia ai le tama, na faapea ai le tatalo a Hana, ma le loto faagaetia i le Atua. “ o lona olaga atoa o’u te tuuina atu mo le Alii”.(1 Samuelu 1:28)

E tele pese tāua ua ou fiafia ai, o pese tāua ina ua avea a’u ma tagata matua e lagona ai le moni ma le loto faagaetia i pese ua faamatala mai i le Tusi Paia.

A o o’u faalogologo i ai i nei pesega, ua siitia lou agaga e vivii ma pese ma avatu le faaneetaga i le Alii ma lo’u loto atoa.

Ua aumai e le Alii le Upu fiafia i tagata ua tusia pese, e fiafia ai tagata ma faagaetia ai o latou loto. E faapea le pese fiafia a Maria ua pese ai ma le loto ua faagaetia.

**Tatalo:** Faafetai Iesu i tagata tusi pese ua latou aumaia o pese e faagaetia ai o matou loto, a’o faaaau pea la matou savaliga ma le faatuatua. **Amene**



**Mafaufauga loloto:** Faitau le Tusi Paia, ma tusi lau tatalo e faailoa ai le faafetai ma le faagaetia o lou loto i lenei taeao.

**Aso Toonai Iulai 21, 2018 “O mea uma lava e mānava”**

**All that has breath**

**Tusi Faitau: Salamo 150**

**Matua: Salamo 150: 6,** *‘Ia vivii atu i le Alii o mea uma lava e manava. Ia outou vivii atu i le Alii.’*

O nei faitauga mai le Salamo 146-150 o Salamo “o le Aleluia’.- ‘Hallelujah Psalms’ ‘Ia viia le Alii’, auā e faaiu pese uma i le Aleluia. Ma o se mea tāua lea e faai’u ai o lenei tusitusiga a le Salamo. O le lu’i i le tagata e faapea ona manatua pea.

O le mea tāua lea, o le agaga o le Atua e galue pea ma e tataua ona faailoa, ma faatino tusitusiga a le Salamo, i le faamaligi mai o lona agaga ma avatu viiga i le Alii ia tatou tusitusiga, peā tatou tatalo, ma mafaufauga, ina ia manatua le viiga i le Atua.

O le tusitala a le Salamo ua faailoa mai, Po o fea, aisea, pe faapefea ona faatino, poo ai e faatinoa i ai le tapuaiga? Ua silafia e le Alii le mea e tataua ona faatino e i tatou uma.

O le Alii e lē fa’apitoa i Malumalu po’o ni nofoaga faapitoa e faia ai le tapuaiga, ae o le tapuaiga e taumasuasua i viiga i aso uma i soo se mea e faatinoina ai o lau auunaga ma le faatinoga.

O le viiga i le Atua i mea na faia, faapea i tatou i faatinoga i le kitara, poo le pese leotele, faapea le tāina o laau pese, atoa ai ma le siva tatou te faailoa ai le silisili ese o le Alii.

O nei mea uma ua tatou faailoa ai lo tatou alolofa i le Alii. O le tapuaiga e ao ona tapua’i i le Atua ma le loto fiafia.

**Tatalo:** Seia e faaolaina i matou e tapua’i i so’o se mea o lo’o matou i ai. O le viiga ua tuuina atu i lau Afio ma le loto faafetai. **Amene**

**Mafaufauga loloto:** O le a se galuega ua e faailoa atu i ou tagata ma faatupuina ai le tapuaiga?

## Kolose

### 1 'O le soifuaga atoa o le Atua ua faa-iloa mai'

#### 1 'The fullness of God'

(saunia e Michael Jagessar)

**Aso Sa Iulai 22, 2018 "Ia faafetaia ma ia maua o fua lelei"**

**Being thankful and bearing fruit**

**Tusi Faitau: Kolose 1: 1 – 8**

**Matua: Kolose 1:3-4,** *'Ma te faafetai atu i le Atua, o le Tamā o lo tatou Alii o Iesu i a ma talosaga e le aunoa mo outou, auā ua faalogologo i maua i lo outou faatuatua ia Keriso Iesu, ma lo outou alofa i le au paia uma lava;'*

Po o ai lava na tusia le tusi ia Kolose, o lenei tusi ua ia faailoa atu le tamāoa'iga ma le silisiliese o le Alofa, ma ua valaauina le tagata na te faailoa, 'le alofa tunoa ua maua ma talitonu i ai'

I le tusitala, o loo ia iloa le silisili ese o le Atua agalelei e ala ia Keriso Iesu. O le alofa ina ia tatou aua'i faatasi i le alofa ma le galulue fa'atasi. O le Kerisiano fa'amaoni. e tatau ona amata atu i le alofa. O nisi mea uma ua faapoopo atu, ae a'uga mea uma i le alofa.

O le fēitaga'i, ma le lē nofo fetausia'i o tagata o lo'o amata ai le tusi. O loo atagia ai le lē fīafīa o le tusitala ma tali atu i ai latou ua faamuamua le loto o le tagata lava ia, ma faamuamua o ona manatu, o le filosofia, e faapea, 'o a'u mea, o a'u mea ou te pule ai'. Peitai, o le alofa e tatau ona faasoa i tagata uma, a'e le na o tagata lauiloa e pei o Kaisara.

O le isi faafitauli o loo atagia i le lenei tusi, o le a'oa'oga ina ia fua tele mai'.

I a'oa'oga a le tusitala, o le faatuatua ma le alofa, e tatau ona aliali mai i fua lelei e tupu mai i le faatuatua.

O le uiga lea o le tusitala ma lana tatalo, ina ia avea le faapotopotoga a le au kerisano ina ia fa'auau, ma ta'ita'ia le olaga e pei ona faia e Iesu, ma ia fua mai o fua lelei e ala i galuega lelei.(f.10)

E faigatā ia a'oa'oga, e faafetaui ai le malosi o le malō o Roma ma la latou ta'ita'iga.

I faia'oga uma o le Tusi Paia, o le fuatele mai e o faatasi ma le faatuatua. O le faauou ma le agasala, ua avea ma tupua o mea leaga uma ua noatia ai le tagata. O uiga ia o Kaisara, ua gase ma faava'atui'a ai le faatuatua.

**Tatalo:** O le tatalo ina ia faatamāoa'iga o tatou loto faapea upu ma faatinoga. Au maia le malosi, o'u te savali ai ma le loto tele, ma faia o lou finagalo. **Amene.**

### **Aso Gafua Iulai 23, 2018 “O le lē mapu i le tatalo”**

#### **Sustaining prayers**

#### **Tusi Faitau: Kolose 1: 9 – 14**

**Matua: Kolose 1:9,** *‘O le mea lea o i maua foi ma te lei mapu ai lava i le tatalo mo outou, talu le aso na ma faalogologo ai, ma te aioi atu foi ina ia atoatoa ona outou iloa lelei o lona finagalo i le poto uma atoama le mafaufau faaleagaga’*

Na faapea le faailoa mai e le Tusitala, o lona olaga atoa o le lē mapu i le tatalo i le Atua, ma manatua tagata uma e oo i ona ā'iga o uso ma tuafafine, o uō ma le mafutaga ma le au Musalimi, e faapea foi tagata uma e manatua a'u ma lo'u aiga, i a latou tatalo, a'o avea a'u ma moderator o le United Reformed Church( 2012 -2014).

Ua ou lagona le faamamā avega i le fa'atautaia o la'u galuega ma le mautinoa, o le talosaga o lo'o le mapu le tatalo ua manatua ai i maua ma lo'u ā'iga e tagata.

O le olaga tatalo o se laasaga tāua na te tauaveina le tagata i mea uma na te faia.

Mo tagata Kerisiano uma, ua fa'ataoto mai e le tusitala le taiala tāua mo tagata uma: *‘ina ia atoatoa ona outou iloa lelei o lona finagalo i le poto uma atoa ma le mafaufau faaleagaga’*

O le faamoemoe o i tatou ua ta'ita'ia tagata ma tau leleia o latou olaga ma fiafia i ai le Atua, ma ua fua mai i galuega lelei e viia ai le Alii(f.10). O le tala i le loto ua toe fuata'ina e le agaga o le Atua..

O le tatalo a le tusitala, mo i latou uma e faaauau i le tatalo e faapea foi i latou ua manatua o ia, o le tatalo ua tuuina atu i le Atua i le agaga ma

le faamaoni. Ia mau'a o tatou loto i le Alii, o lē ua ofoina mai lona soifua ato'atoa mo tagata uma, tatou te viia ai o ia, ma fua mai i galuega lelei.

**Tatalo:** Tatalo ina ia oo atu le mana o le Alii i tagata uma o le lalolagi. Tatalo ina ia maua le agaga i o tatou loto tatou te faia ai mea lelei uma, e viia ai le lona finagalo. **Amene.**

**Mafaufauga loloto:** Ia faia sau lisi mo i latou uma o loo e talosia, faapea nisi ua le manatua, faapea fo'i le faapotopotoga o e ua mafatia ma sauaina.

**Aso Lua, Iulai 24, 2018 “O mea i le lalolagi atoa ma mea o i le lagi”  
On earth and in heaven**

**Tusi Faitau: Kolose 1: 15 -20.**

**Matua: Kolose 1: 19 – 20,** *‘Auā ua finagalo le Atua ia mau i totonu ia te ia le tumu atoatoa; ina ia faaleleia e ia o mea uma lava ma ia, ina ia lelei i le toto o lona satauro, o mea i le lalolagi atoa ma mea o i le lagi.’*

E le tu'ua i tatou i aso uma e le Alii. Ia aua ona misii ia te oe le upu, 'all' 'o le Alii e mafuta ma tatou i aso uma'. Ua faafitu i nei tusitusiga ona faailoa le silisili o le Atua ua aumaia o lona tamāoa'iga atoatoa ia Keriso Iesu. O le mea lea o i tatou ua iloa le mafutaga ma le Alii ma avea ma tagata ua mafuta faatasi ma ia i aso uma. Ua fusia faatasi e le Atua mea uma e ala ia Keriso Iesu.

O le tusitala, ua faailoa le loto atuatuvaale o tagata Kolose. E faapea foi le atuatuvaale o o tatou loto, tatou te fia maua le mautinoa o le Alii o loo tauaveina i tatou i suiga fou ua alia'e mai, faapea le malosii o le suiga o le tau, faapea mea ua tutupu mai i va o malō.

O le valaau a le tusitala ina ia manatua le silisili ese o le Atua e ala ia Keriso Iesu, na te faapotopotoga ona tagata ma tauaveina lo tatou ola. Ia avea Iesu ma taula e taitaiina ai la tatou faigamalaga'

Ma ia e manatua le loto fete'ena'i. Ia e manatu i le tamāoa'iga o le Alii ma le tupu tele mai i fua lelei e mautinoa ai lo tatou faasinoala, o Keriso o loo mafuta mai i aso uma. O Iesu o lē ua faailoa mai le Atua

atoatoa, o le upu sili ua tete'e atu ai i alii sili o le lalolagi ma le malosi o pulega faa- kaisara, auā ua faaumatia e le Atua silisili ese, ma avea o Ia ma pule aoao i mea uma na ia faia.

**Tatalo:** Le Alii e, seia e mafutaina i matou e lou alofa i aso uma o lo matou ola. **Amene.**

**Mafaufauga loloto:** Ia mafaufau i mea o loo mo'omia i lo tatou ola ua ave'esea e pulega sauā, i le tatalo ma le faatinoga.

**Aso Lulu Iulai 25, 2018 “O le tala lelei a le auauna” Gospel servant Tusi Faitau: Kolose 1: 21 – 23**

**Matua: Kolose 1: 23b,** *‘... o a’u foi o Paulo ua fai ma auauna i ai’.*

O loo o’u manatua pea saunoaga a nisi, i le aso ma faia ai lau tautinoga i le Alii i le tausaga 1980. O le upu ua faailoa mai ma taia ai lou loto, ‘o le auauna mo le tala lelei’ Pe a mafaufau i le olaga faa-faifeau ma le lē mautonu o o’u manatu, e uiga i le tuuina atu o le olaga atoa i ala o le Alii.

O le taimi talavou, na ou manatu ai e suia le olaga i mea leaga uma ua siosiomia ai peita’i, e ui ina tele taimi na faava’atuia ai, a’e na feagai lou loto ma le fia iloa o le uiga moni o le avea ma auauna o le tala lelei a Keriso Iesu.

O le agaga fiasia ua faagae’etia – i le avea ma auauna o le tala lelei. Ua tusia ai le olaga na le maua ai le olaga atoatoa o le alofa tunoa o le Atua, e faaolaina ai le tagata. O alii o le lalolagi, ua avea ma faataitaiga o mea e le tonu lona faatinoga.

O le mea lea, ia faatumauina le mafutaga a tagata lolotu ma le faatuatua ma le faamoemoe i le auauna a le tala lelei. O le Atua alofa, e leai se tagata e ave’esea lena alofa mai le Atua.

O le faailoa mai e le tusitala, o ala o Iesu o le poto ua faailoa mai i le upu, o le alofa ua mafuta faatasi ma tagata ma fua tele mai i faatinoga o le alofa.

O mea uma na faia e le Atua ua latou maua le tala lelei a le auauna, ma maua le faaolataga ia Keriso Iesu peitai, o uiga faale tagata ua faia pea

o latou loto, ma ua faigatā ma le tonu a latou filifiliga e pei ona faailoa mai.

**Tatalo:** Le Alii e, aumaia le mautinoa o lou alofa ia silisili i mea uma ua matou manatu i ai. **Amene.**

**Mafaufauga loloto:** Ia tu'uina atu o lou ola e faatino ai le olaga auauna ma fuatele mai.

**Aso Tofi Iulai 26, 2018 “O le vaai a le Atua – o le fiafia faapea le faateleina” God’s view – frustratingly expansive**

**Tusi Faitau: Kolose 1:24-29.**

**Matua: Kolose 1: 29,** *‘O le mea lea ou te galue ai ma finafinau e tusa ma lana lava galuega, o loo galue lava i totonu ia te au ma le mana.’*

Po ai lava na tusia leni tusi, o le galuega a Paulo o loo taoto i le silisili ese o le alofa o le Atua e ala ia Keriso Iesu. Mo le ‘au faatuatua, ua faailoa mai e Paulo le manatu, ‘O keriso ua faavae ai lana galuega’.

E ala i le galuega a Paulo, ua faailoa le alofa silisili ese o le Atua ua oo atu le tala i nuu’ese, o Keriso lea o loo ua ia te outou, o le faamoemoe i le manuia o ia te Ia, na te fuafua ma faia mea uma e tusa ma lona finagalo.

O le galuega a Paulo ua faatumuina i luitau tāua. O olaga o tagata ua liliuina i le mana o Keriso Iesu. O le galuega ua uunaina e Keriso, ae le o Paulo. O le mea e tatau ona silafia e tagata uma, e pei o Paulo ma nisi ua aumaia le tala lelei, e faapea foi ona tatou galulue faatasi e talai le tala, o le Atua ua faailoa mai o lona alofa tunoa e ala ia Keriso Iesu.

O le galuega a le Atua e le maua ai se faailoga tagata poo se feagaiga faale tulafono e vavae’ese ai tagata mai lona malo. O le galuega a Keriso e oo atu i tagata uma, ma fua tele mai.

**Tatalo:** Le Atua alofa e, ia faatupu le valaau i le alofa ma faapea ona matou faia o lou finagalo. **Amene**

**Mafaufauga loloto:** Mafaufau i a’oa’oga a le Ekalesia e uiga i le Faamanatuga, faapea le faaipoipoga faapea le feusua’iga. Poo atagia ai

le alofa silisili ese o le Atua, faapea le galuega a Keriso Iesu lo tatou faaola?

**Aso Faraile Iulai 27, 2018 “O upu faatusa i le malaga”**

**Metaphors for the journey**

**Tusi Faitau: Kolose 2:1 – 7**

**Matua: ff.6-7,** *O lenei, faapei ona outou talia o le Alii Keriso Iesu, ia savavali ai outou o ia te ia; ia mauaa outou ma ia atiina ae ia te ia, ma ia faatumauina i le faatuatua, faapei ona a’oa’oina o outou, ia faatele ma le faafetai.*

O tagata o le ala faimalaga, e moomia le savavali ma aga’i i luma, e faapea foi le moomia o le maua’a peitai, e lē tumau, a ia avea e pei o ‘maa ola’ e tatau ona atia’e, faapea le toe fetu’unai, e iloa ai le faailoa mai o ala o le Atua, e ala ia Keriso Iesu.

O upu e faailoa ai le faatuatua o le tagata faimalaga, e le gata i le taunu’uga ae faapea foi le faatupuina o le ola faatuatua faapea le taumasuasua i le loto faafetai. Faapei ona e maua Iesu o le Alii, ia faapea ona faaaauu lou mafuta faatasi ma ia.

O upu faaiuga lea ua avea ma taualuga o lenei tusi, e faapea foi lo tatou ola o loo ola ai. O i latou uma ua ia Keriso, ia manatua le valaau ina ia faaaauu le faatinoga, o le agaga ua faamumuina le loto o le tagata e aga’i ai pea i luma lava savaliga.

O le maua o Iesu, o le amataga lea o le savaliga. Ua lui ina i tatou ia ola ia Keriso.

Ua tatou iloa ala o le Tusi Paia, faapea a’oa’oga a le Ekalesia, ma a’oa’oga faa-faifeau i manatu faa-mataupu silisili. Peita’i, e taua tele lenei savaliga ina ia sili atu ma le faitauina o le Tusi paia faapea le filisofia faamataupu silisili, ina ia ola ma savavali ma le faatuatua i upu ua tautala i ai, ma ua mautinoa ai le olaga ma le taumasuasua o le loto faafetai.

**Tatalo:** Le Alii e, ua e aumaia le malamalama i o matou loto, seia e tatalaina o matou loto ma mafaufau ina ia olaina o lou alofa. Peā oo mai le loto faavaivai, seia e faamūmū lo matou faamoemoe. Pea tupu le fefe

ua le faataunuuina ai le tautinoga, seia e faalolotoina lo matou faatuatua ina ia tupu ai le alofa. **Amene.**

**Mafaufauga loloto:** Mafaufau i mea lelei ua aumaia e Iesu mo oe.

**Aso Toonai Iulai 28, 2018 “O leā se mea o loo noatia ai i tatou i le agasala?” What holds us captive?**

**Tusi Faitau: Kolose 2: 8 – 15**

**Matua: ff.9-10,** *‘Auā o loo mau i totonu ia te ia le tumu uma lava o le uiga Atua ua i lona tino; o loo ua faaatoatoaina foi outou ia te ia; o le ulu ia o alii sili uma lava atoa ma faipule.’*

Mafaufau i se mea o loo noatia ai oe, faapea ma lou ola, O le a se lagona i lena mea? O le tapua’iga i le ifo i tupua e le ose mea faatoa tupu, a ua leva ona nofofale ma tatou ma taofia i tatou.

I le Ekalesia i Kolose, ua faailoa mai e le Ekalesia i le fuaiupu e valu. ‘ua faapologaina i le potō le aogā e faasesēina ai, e tusa ma uputu’u a tagata, ae le tusa ma le finagalo o le Atua’, O mea ia ua fevaeaeaina ai i tatou ma fe’ese’esea’i ai.

O le tali atu i nei mafaufauga, ua faailoa e le tusitala i tagata uma o le Atua, ua faailoa mai lona silisili ese e ala ia Keriso Iesu e faapea ona tatou maua ai le potō sili ma le ola e faavavau. O le ola e le mafai ese tagata ona toe ave’ese oe pe afai ua e faatuatua ma talitonu ia Keriso Iesu.

Peita’i, pea tatou mafaufau i mea o loo taofia ai i tatou, e pei ona faailoa atu; o le tulai mai o suiga o le atina’e o le tamaoa’iga, o ta’ita’iga sāua faapea i latou ua faatupuina pea le fefe i tagata e aga’i ai i luma le olaga.

Poo ua tatou le o ese mai i le potō faafilosofia, ma le potō faale lalolagi, ua saisaitia ai o tatou manatu e Atunuu, ma faailoa mai o mea tau matautia, e faailoa ai le faamaonia o le atina’e o mea tau, ma le faateleina o fitafita ma vaega au?

Ae faapefea le tulaga i le ta’ita’iga o le tapua’iga i le Atua? Poo faapea foi ona tatou faia faaiuga e tusa ma le olaga o tu ma aga faale atunuu ma faaopopo atu o tulafono e le tusa ma le finagalo o le Atua?



**Tatalo:** Ia avea lo matou ola e molimau i le silisili ese o lau Afio. o le Atua alofa ua le natia se mea e ala ia Keriso Iesu, nei ma oo i le faavavau. **Amene.**

**Mafaufauga loloto:** Mafaufau i le manatu atū i le Kolose. ‘O le Atua ua faailoa mai lona silisili ese e ala ia Keriso Iesu.’ Poo e talitonu i ai? O le a se faatinoga sili ao sauni atu i feau i lenei aso?

## **Kolose**

### **2 Ua faaofuina ia avea ma tagata fou**

#### **2 Clothed in a new self**

( saunia e Terry Lester.)

### **Aso Sa Iulai 29, 2018 “Faatupuina” Growing**

**Tusi Faitau: Kolose 2: 16 – 19.**

**Matua: Kolose 2: 19,** *‘ua le taofi mau foi i le Ulu, ua tusia ai ma faamalosia ai le tino uma, i mea e soo ai atoa ma ua, o loo tupu ai, ina ua faatupuinamai e le Atua.’*

E i ai se laau totō i le faatoaga e fua mai i le lemon faapea le moli, poo le orange. O le vaaiga ofofofia ina ua fua faatasi mai lenei laau ma fua ‘ese’ese. Peā oo ina matua, ona faaāoga lea o nei fua i mea ua mo’omia.

O i latou uma e faia lenei fa’ato’aga, latou te faapo’opo atu i le tino o le la’au se vaega o se la’au ma faapipii (grafting) i le laau e tupu mai ai nisi laau ua fua mai faatasi i lenei la’au. E pei o le lemon, o le moli, faapea le mandarins, tangerines, clementines, mineolas, satsumas, limes, faapea grapefruits. O se va’aiga matagofie ona o le tele o la’au ua fua mai i le tino o le la’au e tasi.

E faapea le Kerisiano, o le mafutaga e ‘ese’ese mea e o mai ai peitai, ua tu’ufā’atasia i latou i le la’au e tasi, o le Alii lea o Iesu Keriso, ma faatupu ma faateteleina e le agaga o le Atua.

O le faitauina o le tusi ia Kolose i lenei vaiaso, ua tatou maua le olioli ma le faateleina o le matagofie o le la’au fuatele mai, olioli i le manogi ma le aua’i i lenei ola ua ofoina mai e Keriso Iesu. Poo faapefea ona fua mai o lenei la’au fou i lou loto i aso uma? O le a sau va’ai i Kerisiano ma le fua mai o la’au lelei ua atia’e i le la’au e tasi?

**Tatalo:** Le Alii e, seia e vala’auina i matou e mafuta faatasi ma lau afio e pei o se la’au na faia mai i le la’au e tasi. **Amene**

**Aso Gafua Iulai 30, 2018 “O le loto ua ofoina atu” Self-giving**

**Tusi Faitau : Kolose 2:20-3:4.**

**Matua: Kolose 3: 4,** *‘Pe a faaali mai Keriso lo tatou ola, ona iloa ai lea o outou faatasi ma ia i le mamalu.’*

O le faaolataga ia Keriso, faapea le faaolataga ia aso uma o lo tatou ola, e oo mai ma le ofotele ma le fa’agae’etia o le loto.

O le tamaita’i sa faatali lana pasi, ao pisi auala i fa’atauga a tagata. Na le manatu i pasi laiti ua valaau atu ma valaaulia e oso i luga o le pasi. Na ia lē talia le vala’au e ui ina iloa e o’o fo’i le pasi i le mea e fia o’o i ai.

I luga atu o ia, pe tusa ma se fogafale, o loo i ai le tagata o loo faia lana galuega, e ala i le taumafai e tu’u pusa simā i le uilipaelo peitai, ua mamulu ona lima, ma ua paū simā i le taufaasi’usi’u o le ‘au o le uilipaelo, ma ua faapea ona faata’alise atu i lalo.

O le alii sa fa’atauina ana laau, faapea nisi o oloa mo tagata, ua vaai atu i le taga simā ua faapaū mai, na faapea ona valaau atu i le tinā o loo tū ai iina, ina ia alu ‘ese ma le ala o loo pauū atu ai taga simā ma le uilipaelo.

Na le’i talia e le tinā le fautuaga a lenei alii peita’i, ua lagona le pa’i atu a le tagata ma ave’ese mai o ia i le mea o loo tū ai peita’i, ua se’e lona vae ma paū atu i le mea sa ou tū ai ma ua palasi mai i ai le simā ma le uilipaelo. Ua palasi mai ma lavea ai.

**Tatalo:** Faafetai Iesu ona o le olaga ua ua e foaina mai, mai nei mafatiaga ua paū atu ai. **Amene.**

**Mafaufauga loloto:** O le faaolataga e oo mai i vaaiga e le tatau ona oo atu i ai. O le a se mea e tatau ona tete’e atu ai, pe a oo ina ua latalata mai ia te O’e?

**Aso Lua Iulai 31, 2018 “O le ola fou” New life**

**Tusi Faitau: Kolose e 3: 5 – 11**

**Matua: Kolose 3: 10,** *‘a ua outou oofu i le tagata fou, o le ua*

*faafouina i le iloa, e faatatau ia foliga i le na faia o ia.*

O le ola fou ma le tagata fou! E le gata i le tinā ua faailoa atu i le ala ua maua le ola fou i le faaolataga na faia e le tagata na paū i ai le simā ma le ulipaelo, na faapea fo'i ona mafaufau i auala e faaolaina ai o ia ma lona ola.

Na manatu le tinā, e mafaufau ina ia maua le ola ma le olaga mautinoa, i le olaga o tagata o loo siomia ai o ia – o le faaola moni, ma le tagata na te lavea'i mai.

O le tinā ua a'afia le tuu'esea o ona talitonuga, ua leva ona ia iloa uiga o tagata, i le faiga o lavalava, le faatinoga o le ulu, le tulaga o galuega o loo galulue ai – o le va'aiga lautele ua iloa ai tagata ua lē avea ma upu lelei e faaolaina ai i tatou, a ua avea ma faata'ita'iga ua faato'ilaloina ai i tatou.

E faapea le tupu tele o le fiafia ma le ola taumasu'asu'a o le tinā, i le faaola mai e le tagata na lē mafaufauina, ua ia tuuina atu lona ola e faaolaina ai o ia.

O le tagata fou. E faapea foi ala a Iesu, O meaalofo a Iesu ua tatou maua, ma toefuataina ai o tatou loto i le asō.

**Tatalo:** Le Alii e, seia e faatumuina le olioli ma ia oo atu la'u fesoasoani i tagata uma. **Amene**

**Mafaufauga lolotu:** E faafia ona o'u faamasino atu i tagata ma a latou faatinoga, i galuega ma se mea e maua ai? E faapefea ona o'u fesoasoani atu ina ia maua le ola mo tagata uma?

### **Aso Lulu Aokuso 1, 2018 “Loto Faafetai” Thankfulness**

#### **Tusi Faitau: Kolose 3: 12-17**

**Matua:** f.15, *'Ia pule foi le filemu mai ia Keriso i o outou loto, o le mea lea ua valaauina ai outou e fai ma tino e tasi; ma ia outou saga faafetai.'*

Na ou molimauina se lauga a se tasi o tusitala iloga o le malō o Nigeria e suafa ia Chinua Achebe. O le lauga e fa'aeaea ai i le ta'ita'iga a se tasi na tete'e i le faailoga lanu i Aferika i Saute. O lona igoa o Steve Buntu Beko, sa iai foi le ta'ita'i iloga o Nelson Mandela ma lona toalua o Graca Machel sa pale mai i le tofiga faufautua i le Iunivesite o Cape Town. Ina ua valaauina mo lana saunoaga, na toso atu lona nofoa

fa'ata'avalevale ma tago atu i le masini faaleotele leo, ma amata loa lana lauga. E tusa ma le 15 minute o fai lana faafetai i lona avanoa, i e na valaauina o ia, atoa ma le faalapotopotoga, faatasi ai ma Mandela, Ahmed Kathrada ma nisi toa na latou ofoina atu o latou soifua mo le saolotoga o tagata uli. O se lauga e matagofie ma malū, e leai se tomumu po'o se sa'i na faalogoia, ae ua pei o se solo ua pa'i mai i ou lagona, ma o se lauga na fofoa mai le ta'ele o le fatu ma le agaga ma le loto ua fa'agae'etia. O se lauga na fafau mai i se konitineti ma ni tagata ua loa ona taotaomia ona o se faiga malō fa'akolone. O se atunuu ua ma'osi'osia ona o sauaga ma le mana'o tele i le tupe. O faailoga o le loto ma le agaga faafetai, o lo'o aumai ma faaali mai i ona mata ma fa'aleo e ona laugutu ma le gutu.

O le lauga na saunia, ua pei o se ata moni ua pa'i mai ia te i matou, ma ua matou taufai lagona ai le agaga vivi'i ma le agaga faafetai ona o se taumafaiga ma se tauviga o le tuana'i.

**Tatalo:** Faafetai, Faafetai, Faafetai, **Amene.**

**Mafaufauga Loloto:** Faafetai mo lenei aso, Faafetai mo mea'ai.

**Aso Tofi Aokuso 2, 2018 “Faamasino Amiotonu ma le sa'o”**

Justice and fairness.

**Tusi Faitau:** Kolose 3:18-4:1

**Matua:** f.4:1, *O outou alii, ia outou avatu mea e tatau ma mea e tusa i a outou pologa, auā ua outou iloa o ia te outou foi le Alii i le lagi.*

Sa ou nofo i le penisula (cupe) i Asia i Saute. O Tesema lava ia o le masina lea e faailoga ai le faamagalō. O le aso 1 o Tesema 1834, na avea ma aso e sa'oloto ai uma pagotā. Peitai ane, o pagotā uma na fosi e galulue faamasani i le isi fa'ausaga, na gata lā le sa'oloto o nai pologa i le tausaga e 1838. Na matuai galueaina e le kolone auā e fa'aaoga ai e matai o nei tagata pologa seia uma mai le tupe na totogi ai latou. E leai se malologa sei vagana ua le toe aogā lena pologa ma tiai loa i le lapisi. O nisi o ou tua'a, na maua so latou avanoa i se tolauapiga sa'oloto i se nofoaga e tā'ua o le auvae-mauga o le alofa tunoa ina ua uma ona faasa'olotoina. O le afiafi o le aso 30 o Novema, na tafu ai afi (bonfire) ma pepese pologa a'o talitali le vaeluaga o le sefululua, e amata ai lo latou sa'olotoga. O pesepesega ua lauloga i le atumauga mafolafola.

A'o tusi atu le Aposetolo o Paulo ia Kolose i kerisiano e iai a latou pologa, e iai le upu sa'olotoga po'o le fa'asaolotoina i le latou upu fai so'o. Peitai ane, na maoa'e se suiga na talosaga ma tu'u atu e Paulo i le au Kerisiano ma le latou silasila i pologā, aua o i latou foi o tagata ola.

**Tatalo:** Le Alii e, le Matai amiotonu e, faamagalo i lo’u le amiotonu ma lo’u le alofa, **Amene.**

**Mafaufauga Loloto:** O le pologa o se vaisū lea a e o lo’o manana’o e faatauga ma faatigā tagata ona o le mana’o tele ma le fa’ale-alofa. O le ā sou sao e taofia ai le faiga faapologaina o tagata.

### **Aso Faraile Aokuso 3, 2018 “Tautala ma le Alofa”**

**Speaking tenderly.**

**Tusi Faitau:** Kolose 4: 2-9

**Matua: f.6,** *Ia le aunoa a outou upu ma le alofa, ia faamāi i le masima, ia iloa e outou ona fai faatatau se tali i tagata e taitoatasi uma.*

Aferikana, o le gagana lona tolu leni e aupitosili lona fa’aogaina i Aferika i Saute. O ni tagata pologa Mosalemi na aumai fa’apagotā mai Europa, na taunuu i le tolotolo po’o le penisula i Aferika i Saute. Fai mai o se gagana o fesootaiga o i le va o pologa ma o latou matai. O le tausaga e 1970, na avea ai le gagana Aferikana, ma gagana taualoa mo tamaiti a’oga, ae lafoa’i isi gagana faa-Aferika o lo’o faaogaina i lea vaitau. O le taofia ma taotaomia o le tele o gagana faa-Aferika, na tutupu a’e ai manatu o le tete’e ma le ita o tagata, ma amata ai loa le mau e tā’ua o le Soweto i le tausaga 1976.

*“Ia le aunoa a outou upu ma le alofa, ia faamāi i le masima”* o la tatou faitauga lea mo leni aso. O le gagana o se mea e lelei po’o se mea e faatupu ma’i foi. O se vai malū e fai ma fofō. O le masima o le vaifōfō foi na e fōfōina manu’a o faapotopotoga ‘ese’ese ma aganu’u ‘ese’ese. O se faatūlima faatamali’i, se saunoaga teuteu, e fo’i fua le loto tigā ma mafolafola ai ni tiga, ma totogo a’e ai se moemoe fou.

**Tatalo:** Le Atua e, sei e foai mai ni upu malie, ma faaola totoga ma avea ma mapusaga i se agaga ua vaivai, **Amene.**

**Mafaufauga Loloto:** Ia avea le gagana ma so’otaga o aganu’u ‘ese’ese, ma ia ou maua le agaga o le fia iloa o isi aganuu oe asiasi mai i lo matou atunu’u.

### **Aso Toonai Aokuso 4, 2018 “Fusia faatasi” Holding together.**

**Tusi Faitau:** Kolose 4: 10-18

**Matua: f.11b,** *... na latou galulue faatasi ma a’u i le malo o le Atua, na fai foi i latou ma faamatalaloto mai ia te a’u.*

E tele ni igoa o loo ta’ua i le tusi faitau o leni aso. O nisi sa malaga fa’atasi ma Paulo, a’o nisi o e na faifai ia Paulo. E iai nisi na tauemu ma tete’e ia te ia, ma o lo’o iai nisi ua fai le latou fa’apotopotoga ma

ta'u "o le au peritome". A o'o ina tulei vaega e filifili po'o ai e auai ma mautu lagona, ma ua avea ma ala e ta'ape ai se faalapotopotoga, ae afai e manumalo le isi vaega, o le'a tele ni tausaga e tau fai ai se fa'aleleiga.

I lenei fetufaa'iga, ua matua matamata tetele ai mataupu felaua'i. Ua malomaloa le tau fa'aleaga ma le taufaifai, ua fai ma a'upega mo nisi. O ta'ita'i o lo'o folafolaina le suafa o le Atua, o la latou matafaioi o le 'a'apa atu i itu e lua, ma fa'amaopoopo mai ma fai se faiga e mafai ona tutu fa'atasi, au'a o le naunautaiga lea o le Agaga Paia. O le faatauaina o tagata e ala i o latou suafa, o le valaauina o uso a faigaluega, ma faailoa lo latou taua ia te ia. Ma ua faailoa mai e Paulo le auala e faatasi ai ma galulue faatasi, e ui lava o loo 'ese'ese loto.

**Tatalo:** Le Alii e, a'oa'o mai ina ia matou iloa ona fusia faatasi, e ui lava i lo matou le tutu faatasi e lagolago se mau e tasi. **Amene.**

**Mafaufauga Loloto:** O fea ea tatou te saili iai se toomaga pe'a fe'ese'esea'i manatu.?

**'Ata: o le vaifofō sili**  
**Laughter: the best medicine**  
Saunia : Malcolm Carroll

**Aso Sa Aokuso 5, 2018 "Ata: o le mea taua"**

**Laughter: it makes sense**

**Tusi Faitau:** Faataoto 17: 1-22

**Matua:** f.22, *O le loto fiafia, e fai ma vailaau aoga lea; a o le loto faanoanoa e mamago ai ivi.*

O le 'ata'ata, o le gagana a le lalolagi. O tamaiti uma o le lalolagi e ta'a'alo lava i latou. O le talitali'e ma ta'a'alo faatasi i nisi o taimi, e avea ma so'otaga, a'o se auala e fesoota'i ai mafutaga. O lo'o iai foi le 'ata'ata i le Tusi Paia. O se tusi o lo'o a'oa'o mai ai le Atua i a'i tatou, ae maise vaega ia e lua.

I lenei vaiaso, o le'a tatou faitau ai i upu e malie ai ma upu a le potu, mai ia Iesu ma Paulo. O le a maua tala mai le feagaiga Tuai, ma le asini. Afai e iai se tusi malie i le Tusi Paia, o le tusi a Faataoto. (Faataoto 21:9) Aisea e malie ai? O le tusi a Faataoto, o le tuufaatasiga o tusi anamua o vaega o le tusi a le potu. O tusitusiga malie ma le potu e faatupu manatu. O le a le uiga o le ola ma le oti i lenei olaga? Aisea e fa'auouo ai, pe fai foi ma fili le lelei ma le leaga? E tatala lava le tusi a le fai Evagelia o Ioane i le faamatalaina o Iesu o le "lokou" o le mataisau o le Atua. O Iesu o se mea mautu na fofoa i le tala'aga o le lalolagi. O le faolataga na ia saunia, na maua ai e le tagata le olioli loloto.

**Tatalo:** Avea lo matou olioli, fiafia ma talosaga e tupu ai se mea lelei, ae le o se alofaga, **Amene.**

**Aso Gafua Aokuso 6, 2018 “ E iai le faamoemoe aua ua galue mai le Atua” There is hope, for God has acted.**

**Tusi Faitau:** Kenese 17: 15-22

**Matua:** f.17a, *Ona faapaū fao lea o Aperaaamo, ua ata’ata, ma faapea ifo i lona loto, E fanau mai ea se atalii i le tagata ua selau ona tausaga?*

E le o taimi uma e malie ai, ma nofo lelei ai lau 'ata, ae peitai, e te 'ata faamaela pe a tofotofoina oe i se mea e te iloa e le'i tupu i lou olaga atoa. Ua ata'ata Aperaaamo ma Sara, i galuega mamana a le Atua i le talafaasolopito o le tagata, o le la galuega o le toe faia lea o se tamaitiiti. Ua ata'ata Aperaaamo i lona 100 tausaga, atoa ai ma Sara, mulimuli ane ua fanau le tama, “*Ua fai ane foi Sara, Ua fa'a'ata'ataina a'u e le Atua*” (Kenese 21:6). Mulimuli ane, i nai seneturi i luma ane, na tupu ai foi se ma'itaga i se tamaitai talavou o Maria lona igoa. O se maitaga na afuafua ae lei faaipoipoina, ma tupu ai le vevesi, ae ua avea ma pepe ua sili lona amana'ia i le tala faasolopito.

E iai le ese'esega o le 'ata a Maria ma le ata'ata a Aperaaamo ma Sara. O le 'ata a Maria o lo'o atagia ai le olioli, o le faamoemoe, ma le maofa i le valaau i se mea mata'utia, ma o se 'ata e mamā. I le amataga, o le 'ata'ata a Aperaaamo ma Sara, o lo'o iai le masalosalo, tauemu ma le le talitonu, e le o ata'ata uma e lelei, ae o le Atua lava ia ma lona fai mea lelei e faifai pea i aso ma taimi uma, mo lana tagata na fai.

O le asō, e atoa iai le 73 tausaga talu ona pa'ū le pomu i Hiroshima Iapani, ma fasiotia ai le tele o tagata. E le o se mataupu malie, ae o le lu'i o le tausiga o le filemu. E tatau ea ona o tatau masalosalo pe tatau ona iai se faamoemoe?

**Tatalo:** Le ALii e, o lou alofa e le mavae, ma au galuega e le mafai ona aveesea, a'oa'o i matou ia avea ma olioli loloto i totonu ia i matou, **Amene.**

**Mafaufauga Loloto:** O a'u o se tagata tausia le filemū. E mafai ea I lenei aso ona faapoopo lo'u naunau e siitia lou agaga fia tausii filemu?

**Aso Lua Aukuso 7, 2018 “O le ‘Ata ma mea Tigā”  
Laughter and adversity.**

**Tusi Faitau:** Iopu 42: 10b-17

**Matua:** f.12a, *Ua sili foi ona faamanuia e le Alii o le gataaga o Iopu i lona amataga;*

Pau lava lo'u mana'o na o se uō, ae pau le mea lea e aumai na o faufautua o le tala ia Iopu, e le o se tala e taliē ai (faamalulu atu i ai latou o social worker i soo se mea). O puapuaga ma faigata i tua atu o le oi ma le mapu i tiga o fotua'i mai. O lo'o aliali mai pea le to'esea, o le ola inosia ma le le faaitiitia o tigā o le olaga nei. O se mataupu ogaoga ua tauau ina leai se upu e faamatala ai, ma lagona ai le loto tigā ona e le faigofie le tauiviga ma tigā o le tino. E iai taimi e manatua ai le muagagana faapea **“o le 'ata'ata o le vaifofō sili lea, o nisi foi ua faapea mai, o le amiotonu o le vai malū sili lea.”** Ae i ai foi taimi o le vaifofō lava ia o le fofō sili lea. O le tele o taimi e fautuaina i tatou, ae o le fofō sili lava o le faalogo. Ae ui i lea o loo iai lava le 'ata'ata: o tausuga, o faleaitu ma le faasoa, e tau famamā ai avega.

O le soifuaga o le tagata ola, o lo'o iai le saolotoga ma le tiute o le tagata e fuafua ai le le alofia o le oti ma le masalosalo, pe'a o'o mai puapuaga. E tu'u avanoa le Atua i ai tatou, ae iai foi taimi e o'o mai ai puapuaga, o se mea ua ia silafia, atoa ma i tatou. E iai fiafiaga I aso fai so'o, ae ua avega o se alofaga i taimi o puapuaga. Ae o loo iai foi le isi fiafiaga loloto, pe a o'o ina faafesaga'i ma puapuagā ae tatou manumalo ai.

**Tatalo:** Le Alii e, fesoasoani mai ia te a'u ina ia manino la'u faalogo i puapuaga o uso, ma ia toto'a la'u faalogo i le Agaga Paia, **Amene.**

**Mafaufaga Loloto:** Le Alii e, o ai ea o le a e auina iai a'u e fai ma fa'amafanafana?

**Aso Lulu Aukuso 8, 2018 “Tafolā telē ma le lupe ua taitaiina sesē.”**  
**The whale SUV and the misguided dove.**

**Tusi Faitau:** Iona 3

**Matua:** f.10, *Ua silafia e le Atua a latou galuega, ina ua liliu ese i latou i lo latou ala leaga; ona salamō ai lea o le Atua i le malaia na ia fetalai mai na te faia ia te i latou; e lei faia.*

Ua tatou iloa nei e i ai manu o le foafoaga e tai tutusa o tatou uiga-o le 'ata'ata. O ni tu ma ni aga e ta'atele i manu, ae e maua i kolila ma isumu (tulou), o le 'ata'ata o le auala lea e fesoota'i ai manu ma faapotopoto mai i se nofoaga e tasi. Ae ou te le iloa se manu e iloa ona fa'atoese ma faamaulalo.

O le amataga o le tusi a Iona, o lo'o tā'ua ai mea ofoofogia ma e le masani ai, o se tafolā, o se i'a telē ua pei o se malae ta'alo, ua faato'ese, ma se lupe ua leiloa lona ala. (3:6-10). O le mau e faamautuina ai le



matagofie o lenei tala, o lo'o maua i upu tomua o le tala. Ina ua valaauina faamisionare Iona, fai mai le tusi a Eperu, **“Lupe, atalii o le amiotonu”**- e lua suafa e faasino i tagata o le Atua. O le fiafia ia o tagata o le Atua pe'a avea i latou ma misionare, ae maise tagata o lo'o i totonu lava o le latou li'o. Ae faa-lē fiafia pe afai e tala'i atu i nisi. 'Omai i le lotu,' o upu e le tataui se misionare ona ta'ua, auā o le galuega a le misionare o le ave o le lotu i tagata. O Iona o le tagata o lo'o tu mo'i tatou. O i tatou o e fiafia e 'alo ma oso ese ma le va'a, ma le fia mafuta i tagata. O le tala ia Iona, o loo atagia ai le faalologo ma usiusitai o mea uma i le Atua, sei vagana ai le auauna a le Atua. O Nineva o se aai tele, amioleaga ma o nuu ese, e le o se nuu foi e fiafia e lolotu. Ae o se nuu ua filifilia e le Atua e avea ma ona tagata. O le alofa lava ia o le Atua e mo tagata uma, o le telē o lona alofa e manumalo uma ai mea uma, e o'o lava i manu ua faamaulalo ma fa'ato'ese.

**Tatalo:** O le Atua o misionare, valaau le Atua mo i tatou ina ia fa'aauau le galuega faa-misionare, **Amene.**

**Mafuafauga Loloto:** O fea le Nineva e auina ai oe e le Atua?

### **Aso Tofi Aukuso 09, 2018 “Maua i lalo o le Mati”**

#### **Found under a fig tree**

**Tusi Faitau:** Ioane 1:43-51

**Matua:** f.46, *Ua fai mai Natanielu ia te ia, 'E mafai ea ona tupu o se mea lelei mai Nasareta?'* Ua fai atu Filipino ia te ia, *“Ina sau ia, ina matamata.”*

E lei faaiiina le fetalaiga a Iesu i se tala malie e ata i ai, ae tele lava ni ana fetalaiga e malie lava! Ua 'ote'ote mai kamipalau e faailoa ai lona soifua ofoina mai, le kamela ma le pu o le au ma nisi. O tala malie e 'ata'ata ai tagata e toatele lava. E foliga mai i soo se 10 minute lava o ni mafutaga, e faafitu ona talie tagata.

Na 'ata ea Iesu ma i tatou? A'o tutū Natanielu i lalo o le mati. O se faailo faaleagaga: o le faailoga ea o le mati o Isaraelu? Po'o Natanielu sa moe, pe na galue ae sosola ana uo ina ua latou faalogo i le leo o Iesu? Po'o ua toe saili atu Iesu ia Natanielu i lona le fa'aaloalo i lona nuu o Nasareta? Ina ua tali leleia e tagata Samaria Iesu, ua mananao Iakopo ma Ioane ia pa'u le toasā mai le lagi i luga o lea nu'u. Ua faaigoa e Iesu ia so'o o “atalii o le fai titili”. Atonu e iai taimi e manatu ai le au so'o i le faaiuga na talia ai e Iesu. Ioe, ua faamanatu mai e Iesu auā ua ia ofoina atoa mai lona itu tagata e mafuta ai ma i tatou. Atonu o lo'o i ai se vaega malie a le Atua tatou te le o iloa. O le tele o taimi e 'ata'ata le Atua i lo tatou vaivai, (o tamaloloa ma fafine ae faapitoa lava i tamaloloa.)

I le feagaiga tuai, o lo’o soisoi ai le Atua i le fiamalosi ma e faufau mea leaga. O le ā le manatu o i tatou o tagata ola, tatou te iloa ea mea uma, ma mafaia mea uma, ma mafaia ona ave a’e i luga? Ua pei i tatou o tamaiti ua savavali i se foleni ae tetele ofu. Fautua mai se tasi tusitala o G.K.Chesterton, ua le alu ese Iesu mai i ona so’o ona o lona tiga, ae ua na o le fialia ma ‘ata’ata.

**Tatalo:** Le Atua e, sei e faia se suiga i lo’u loto, ma la’u tali atu mo isi tagata. **Amene,**

**Mafaufauga Loloto:** E i ai auala tatou te talitalie ai lava tatou ia i tatou lava. O se masani faapitoa ua loa ona galo e taua o le alofa tunoa – faamaulalo.

**Aso Faraile Aokuso 10, 2018 “Ua gagana le tino” The body speaks Tusi Faitau:** 1 Korinoti 12: 12 – 27

**Matua:** ff.24b-25, *A ua faatatauina e le Atua le tino uma, ua ia tuuina foi le ava i le itu tino ua vaivai; ina ne’i i ai i le tino se maseiga, a ia fetausiai faatasi uma itu tino.*

E tutusa lava Paulo ma Iesu, e mafaia ona la otegiaina tagata. O Paulo lā, na te mafaia ona tutui le ote ma avea ai ma auala e fetagisi ai tagata (taga’i i le Kalatia 5:12) o lo’o iloga ona atagia ai le ma’ema’e ma ogaoga o le gagana ona o le tiga o Paulo. I le ekalesia i Korinoti, ua iloga ona faasusulu i ai e Paulo le malamalama ma lana ta’u atu e lē mapu ona o se fe’ese’eseaiga a le mafutaga ma lagona o tagata. Ua le faaitiitia le ‘ata a le faafoliga ma le lē faamaoni o totino ma ua sāvae tuvaelua.

O le tusi i mataupu o soso’o ai, o le 1 Korinoti mataupu 13, o le mataupu ua lauiloa i le alofa: o lo’o faaopoopo ai foi ma le mataupu i le faatuatua, faamoemoe ma le alofa, “*A o lenei, o tumau le faatuatua, faamoemoe ma le alofa, o na mea e tolu; a o le sili o na mea o le alofa lea*” (13:13). O le lē mamalu o saunoaga, ua toe vaaiā foi i lenei mataupu, pei o le mataupu na muamua atu. O se faaitaitaiga (o se faatoesega i ni ulugalii se to’asefulu afe ona o le sese o le faaogaina o le upu alofa, e le o le alofa mo ulugalii faaipoipo ua faatumulia i le alofa, ae faasino i le mafutaga ua toetoe a malepelepe). O le manatu lualuga, o le au kerisiano ua matutua i le upu, ma ua latou mafai ona tuu faatasi o lagona ma manatu, ua avea le alofa o Keriso, e tuu faatasi i le tino e tasi. E leai se mafutaga e atoatoa, o le tele o mafutaga e taumafai le ulu e ta’ita’i e faapena foi le lima poo le vae.

Ae o le talitonuga o Paulo, e tatau ona galulue faatasi itutino ina ia mafai ona tasi le tino o Keriso.

**Tatalo:** Le Alii e, aumai ia te au se loto fou, e mafai ai ona faamaopoopo le tino o Keriso, **Amene.**

**Mafaufauga Loloto:** O a ni auala e mafai ona ou faamaopoopo ai le tino o Keriso?

**Aso Toonai Aokuso 11, 2018 “Se’i o tatou fetagisi” Let us bray**

**Tusi Faitau:** Numera 22:21-35

**Matua:** f.30a, *Ona fai mai ai lea o le asini ia Palaamo, E le o lau asini ea a’u nei, ua e tietie ai talu ona e maua o a’u ua oo mai i le aso nei? O la’u masani ea ona fai faapea ia te oe?*

O le sasi o le tamaoaiga i le seminare. O lo’u sese o le faitau fa’alaua’itele o le tusi 1 Tupu e uiga i le igoa Iosefatu ma ou faaleo-seseina ai ia Iesefatu. Ua vave ona ou tapuni le Tusi Paia, ae ou toe taumafai e toe su’e le Tusi Paia, ae ua le maua lava le tusi o Tupu. Ua ou lagona le mā. E faapena foi se tasi tama a’oga ua sesē ona o le metotia faaonapo nei. Ua faapipii le mea faaleo tele leo i le kola o lona ofu ma fai lana lauga. Ua mae’a le lauga, ona galo lea ona ave’ese ma fai ai loa ma lana tatalo leoleoa, ae galo ai o lo’o faalogologo tagata uma. Ua faapea upu o le tatalo, ‘Le Atua leaga e’, ua tete’i le aulotu i lona loto ua aliali ona ua le ave’esea le masini, o le sasi ua aliali. Na i ai foi sa’u uō e suafa ia Aleni Tomasi, ua tatalo ma ua tā’ua ai auala ‘ese’ese e fetalai mai ai le Atua. E o’o lava i le fetalai mai i le asini a Palaamo.

Atonu, o lo’o mālie lea tala ona ua faaali le Atua i le manu, ae le faaali le Atua ia Palaamo le auuana a le Atua i le lalolagi. Ua tautala atu le asini ia Palaamo, ae foliga mai e le talitonu Palaamo. Mulimuli ane ua manatunatu Palaamo ma talia ai le tala a le asini. O se faamanatu foi lea mo fanau o i le Seminare ma faifeau, afai e mafai ona auala mai i asini le manavaga a le Atua, o le ā sa ta faaopoopo? Atonu e mālie, ae o tala uma a le Tusi Paia o lo’o taoto mai ai le faaolataga a le Atua. E foliga mai o ni mea laiti ma faatauva’a, ae faaogaina e le Atua e a’oa’o ai. O le tala lenei i le faaolataga ina ua le minoi le asini. Ae iai le isi asini i le isi tala. I le tala lea e le’i fo’i le asini po’o le avefeau mai le faataunuina o lana misiona.

**Tatalo:** Le Atua e, fesoasoani e faamautū lou valaauiina o a’u, **Amene.**

**Mafaufauga Loloto:** Ua ou fiefia ua ou iai i le faaolataga.

## O AINA TE AMANAIA? WHO CARES

### 1. O le Atua na te amanaia. – 1. A God who cares

Saunia: Edel McClean

**Aso Sa Aokuso 12, 2018 “O le Atua i lalo nei” God here below.**

**Tusi Faitau:** Salamo 65:9-13

**Matua:** f.9, *Ua e asiasi i le laueleele, ma e faasūsūina lava; ua e faalafulemuteleina ai; o le vaitafe o le Atua ua tumu i le vai; ua e saunia a latou saitou ina ua faapea ona e sauni i ai.*

E pei lava o le au faifa’ato’aga o le lalolagi, o tagata Isaraelu e telē lo latou amanaia ma faatāuaina o le ‘ele’ele. Afai ae le faasūsūina le ‘ele’ele, e lē tupu le fatu ua tōtō. A le ola le fatu, e le a’ai foi tagata. O le tamaoiga o le eleele a le Atua, o le ala lea e faatamao’aigaina ai e le Atua o ona tagata. O le loloto ma le mafanafana o le so’otaga o le lalolagi ma le ‘ele’ele, o lo’o faamautuina i le ola faaleagaga o tagata. Ua manino e lē gata o le Atua o le lagi, a’o le Atua o aso uma, na te aumaia le timuga ma le falaoa tatou te maooa ai. O le Atua na te faasoasoa ma faia suiga i le tau. O le Atua o lo’o galue i mea uma ma aso uma.

I lo tatou o ese mai nu’u ma o atu i taulaga, ua tuua o tatou olaga faifa’ato’aga. Ua tuua le mafanafana lea o le ola faalagolago i le Atua. Ua tatou faamuamua le Atua e a’oa’oina ia potō ai le mafaufau. Ua tatou faalagolago i le sailiga a le Atua i le potō salalau, ae galo ai le potō masani o aso fai so’o ua tatou masani ai i faatoaga. E asiasi mai pea le Atua. O vai o le meaalofo e faasūsū ai le ‘ele’ele, ma o le Atua e alofa.

I lenei vaiaso ua valaauliaina ai oe, tatou te vaavaai toto’a ai i le Atua – O le Atua na te amanaia i tatou.

**Tatalo:** Le Atua e, tatala lo’u loto ma lo’u mafaufau ina ia ou iloa le tele o lou alofa ia te a’u, **Amene.**

**Aso Gafua Aokuso 13, 2018 “Silafia ma iloa” Known and seen.**

**Tusi Faitau:** Salamo 139:1-6

**Matua:** ff.1-3, *Le Alii e, ua e suesue mai ia te au, ua e silafia lava a’u. O oe lava ua e silafia lo’u nofo i lalo ma lo’u tulai i luga; ua e silafia mamao mai o’u manatunatu. Ua e suesue i lo’u savali ma lo’u taoto, ua e masani lava ma o’u ala uma.*

Sa iai se maneta sa ou vaai iai o pipii i se pusa’aisa a’o faia se mafutaga. O Iesu o se malo faalilolilo i talanoaga uma. O le va’aiga, lenei o lo’o atagia ai Iesu le tagata lilo, o lo’o matamata mai ma mata’itū ma lūlū lona ulu pe’a o tatou fa’aletonu. E tali faapena le

Salamo ma le Atua e le'ō va'aia, ae o lo'ō faatalitali sei sasi ona galue mai lea ma fa'aioa mai lona to'asa.(sneaky God). Atonu o le ata lea e fa'atupu ai le usitai, ae leai se faatuputupulaia o le ola.

O upu masani o le Salamo 139, o lo'ō atagia mai ai le Atua alofa ma na te silafia i tatou uma. O se e malamalama ia i tatou i le saolotoga ina ia tatou tutupu ai, e le o le fefe ne'i pa'u, ae naunau ina ia faatuputupulaia le malamalama. O le Atua lea, ua na silafia o tatou tino ma agaga, ua na iloa mea tatou te toilalo ai ma manumalō ai. O le Atua lea e lē fa'atua'ōia lona alofa mo i tatou. Afai tatou te iloa i tatou pei ona iloa e le Atua, o le matuā mata'utia lava. I lenei lava aso, e ao ina ou talitonuina le Atua na te silafia ma alofa ia te a'u, ma faia suiga i lou olaga.

**Tatalo:** Le Atua e o le alofa ma le alofa mutimutivale, tatala mai lo'u loto ina ia mafai ona ou alofa atu i isi tagata, **Amene.**

**Mafaufauga Loloto:** O fea ea le vaega o lou olaga o lo'ō e lafi ai mai le Atua? O le a le tali i lou lafi?

### **Aso Lua Aokuso 14, 2018 “ Valaau e galulue faatasi ” Called to co-operate.**

**Tusi Faitau:** Esoto 6:1-9

**Matua:** f.6, *O lenei, fai atu i le fanauga a Isaraelu, O a'u o le Alii, ou te aumaia outou i lalo o avega mamafa a Aikupito; ou te laveai mai foi ia te outou ai a latou galuega, ou te faaolaina mai foi outou i le lima faaloaloa ma sala tetele.*

O le nofo ai i le lalolagi fesoota'i e ala i aupega tafa'ilagi, e le mafai lava ona fa'alafi lagona tigā ona o tagata ua olopalaina i lenei lalolagi. I le tele o tausaga, ua vaaia lava le tele o tagata ua sulufa'i i atunuu 'ese ona o le fiaola. E manatu pea, e to'aititi se numera o tagata sulufa'i o lo'ō ofi atu i atunuu i Sisifo pei o Amerika, ae o le to'atele o lo'ō alalaga mo se avanoa i atunuu o lo'ō i ai le saolotoga peitai, o lo'ō vaaia pea le 'alo o mata o le lalolagi i e o lo'ō mapuitigā i aso fai so'ō.

I le ta'amilosaga ma le vaaiga i le faigatā ona lagona o le siufofoga o le Atua, ma lona faamanatuina o le laveaiina o Isaraelu nai le pologa o lo'ō i ai. E manatunatu foi i le 430 tausaga talu ai e le'i iloga na tali mai le Atua! E vave lava ona mafai ona tatou faapea ane, o le pule faito'atasi a le Atua ma lona mata'isau. E le o so tatou tiute le fesili, pe aisea, ae ua na o se fesoasoani e taofia ai le tigā o puapuagā o feagai ma tagata i le taimi nei. E le o vaai i la tatou tali atu i o tatou puapuaga' po'o puapuaga foi o e o i le lalolagi, ae ao lava ona fesiligia le faamaoni o lo tatou faatuatua, ma e ao ina tatou manatua, na faataga e le Atua Mose e fai lana galuega ma fesoota'i atu i le Atua. E tupu la le

lelei o lenei mafutaga, i le usiusitai o Mose. Atonu ua leva ona faatalitali le Atua i le laau na mū, pe a ma le 100 tausaga ae toatele e pasi ane ae leai lava se tasi e avanoa. Ae atonu, o e pasi ane ua na o ni mafaufauga, ae atonu o a’u lea, ua tutuli o’u taliga e lagona ai le valaau a le Atua i le tagi mai a ona tagata.

**Tatalo:** Le Alii e, faafofoga mai i le oi a ou tagata, **Amene.**

**Mafaufauga Loloto:** O fea e galulue ai le ekalesia ma le Atua mo le sa’olotoga o pologa?

### **Aso Lulu Aokuso 15, 2018 “Fa’apopotoga a le Atua” God’s in-crowd.**

**Tusi Faitau:** Salamo 146

**Matua:** f.9, *O le Alii na te tausia tagata ese; e fai ma lagolago mo le ua aumatuā ma le fafine ua oti lana tane; a o le ala o e ua amio leaga e faapiopioina e ia.*

E le umi ona tatou malaga, ae tatou faia se faaiuga e vaevaeina ai i latou o e o i totonu ma fafo atu o le lalolagi. I totonu o lo’u atunuu o Aielani (Ireland) i matū, na ou faitau i se su’esu’ega e fa’ataua i tamaiti aoga e foliga mai e iloa e tamiti laiti isi ituaiga tagata faavae i ‘ato e fu’e ai a latou faatau. Ua faatuputupulaia le vaeluaga lea e amata mai lava i le itiiti. Vaevae i tama ma teine, popoto, valea, potopotoga i totonu ma fafo, lanu ma gagana. Ua oo lava i ekalesia. O i matou foi o Kerisiano e iai foi a matou vaevaega.

Ina ua laveaiina mai se kerisiano mai toafa sa afaina ai, sa fesili fa’ataata se tasi ma fai mai “Aisea e tuu ai ekalesia e lua? Tali, tasi o lotu ou te lotu ai, ae o le tasi ou te le tu vae ai sei o’o mai lo’u oti.

O le taimi e iai le manatu o nao a’u lava ma le Atua peitai, e iai le taimi e manino ai e sopo le Atua i o tatou tuaoi, e aunoa ma sou iloa. E manino lava faitauga o lenei aso. E silasila le Atua i tagata ese, aua e le o ni tagata ese i le Atua. E faatau e le Atua le tama itiiti ua tuulafoaiina, le fafine ua oti a latou tane, aua e tutusa tagata uma i le Atua, e le pei o isi tagata.

**Tatalo:** Le Alii e, faaleagaina pa pupuni o va a’i matou ma o matou uso faaleagaga. Ia e tōtō i lo’u loto le alofa atu i uso ma tuafafine, **Amene.**

**Mafaufauga Loloto:** O ai ea tagata ou te pupuni ai le faitotoa, e ao ona ou tatala le avanoa ma avea ma uso ma tuafafine ia Keriso.

### **Aso Tofi Aokuso 16, 2018 “Faamuta le loto ita” Curtil the curmudgeon**

## **Tusi Faitau : Levitiko 19 : 15 – 18**

**Matua:** f.18, *‘Aua e te tau ma sui, aua le faamoemoe lou ita i tagata o lou nuu, a e te alofa atu i lē lua te tuaoi ia pei o oe lava ia te oe; o a’u o le Alii.’*

I le galuega faa-faifeau, e ese le tiga o lenei mataupu i totonu o le Ekalesia. O le faatiga o le isi uso a Kerisiano i le uso. I isi taimi e le fuafua ai, ae o le tele o taimi ua matuā faufau lelei ina ia maua ai le tasi uso i le lototiga. Ua tootutuli nisi o le au faigaluega ua afaina ona o a latou upu, lanu, atunuu, ma ituaiga tagata, o a latou mataupu silisili, ma o latou talitonuga i mataupu o le Tusi Paia. O nisi ua afaina i telefoni mataga, ma uega tafa’ilagi ua faaalii tusitusiga mataga ona o le saolotoga. O nisi o faamatalaga faatupu ua faamalosia, i ave o le matagi ae le faamautuina i ni mau. O le tele o lo’u faalogo i nei tala faamoemoe, ona o lo’u faalogo nei tala faanoanoa, ona ou manatu lea, e lei a’oa’oina lelei nei tagata e alolofa lava latou ia i latou lava. E faigofie lava ona natia o tatou vaivaiga ma o tatou matogitogi, ae tatou te lafo ma tuu ai leaga i isi tagata. E faailoa ai o tatou vaivaiga ma sese.

O tagata uma ua o latou malamalama ma iloa o latou vaivaiga ma lo latou toilalo, e galulue ma le Atua e tau fonofonole masaesae o le uega. E saili i le tofa manino o le Atua e fonoa ai le faaletonu. A o’o foi la ona afaina le aso, e tatalo ina ia maua le manino o le Atua e laveaiina ai le uso ua leiloa.

O le faapogai o lenei mataupu o le faasinomaga lava. O le ekalesia o le tino o tagata agasala ua alofagia e le Atua. E tele le afaina pe a tatou tetee le amiotonu e uiga ia tatou agasala. O lo tatou tetee foi i le moni o le upu a le Atua e afaina ai o tatou tagata. Ina ua ou faalogoina le naunautaiga e faavevesi lou tuaoi, ona ou toe manatua lea, o a’u o le uso, o i matou o tagata agasala, na alofagia e le Atua.

**Tatalo:** Le Atua e o le alofa ma le alofa fua, sei e faaloloto lou alofa ina ia ou talia soo se tasi ou te feiloai i ai, **Amene.**

**Mafaufauga Loloto:** I lau lava ekalesia, o fea o loo e vaai ai le tiga o tagata lotu. E faapefea ona e fesoasoani i le tagata agasala?.

**Aso Faraile Aokuso 17, 2018 “Lē mautonu paia” Divine dizziness  
Tusi Faitau: Iopu 38 : 25-29**

**Matua:** ff.25-27, *‘O ai e vaevaeina o alāvai mo uaga, ma le ala mo le uila o le faititili? Ina ia to mai le ua i le laueleele, e le o i ai se tagata;*

*ma le vao, e le āina e tagata, ina ia mālie ai le mea ua taaligoligoa ma le mea ua gaogao; ina ia faatupuina ai foi le vao iti.'*

E iai taimi ou te to manatunatu ai i nofoaga sa ou asiasi i ai. Ou te taumafai e fatufatu taamilosaga o le lalolagi i lo'u mafaufau sei oo ina oo mai le niniva i lo'u mafaufau. O a'u o se fuafanua a le lalolagi. Na ma feiloai ma le faifeau o le mataupu silisili ma faailoa mai lona fiafia i lea mataupu. Fai mai le faifeau, o le mataupu o le faafanua o le lalolagi, ma le mataupu silisili, e uso lelei. O le fesootaiga o le tofa manino i le fausiaina ma le faafouina o fale ma nofoaga mo tagata. O loo faia i lona fiafia ma lona olioli, o loo fau ma faafou faavae i lana tofa atisi e faaali ai lona aao malosī ma lona faia ma le silisiliese.

O le tusi faitau o lenei aso, o loo faamanatu ai ia Iopu le Atua fetalai, ma o loo galue pea o ia. Tatou te mafaia ona faamatalalaina le galuega a le Atua i le 7.5piona o tagata o loo galue ai i le taimi lava lenei. O loo galue le Atua i tagata uma lava. O se manatu e lagona ai le loto maulalo ona o le silisiliese o le Atua. O le Atua ua le gata mo a'u, ae tutusa lava lona alofa mo a'u, ae maise le 7,499,999,999 o uso ma tuafafine. E maofa ai lava le mafaufau pe a manatu atu i le 7.5 piona o tagata o loo tau vaavaai ma faatonotonu, ae galo ai o le Atua ma lona alofa e leai sona tuaoi, ma e aofia ai ma au i lona alofa tunoa. Na fetalai le Atua ia Iopu, e te le malamalama i galuega a le silisiliese, ma e le mafai lava e se tasi ona faamatalaina le silisiliese o le Atua. O lona silisiliese lea ma lona alofa ua tatou ola ai. O le faatuatua ma le faalagolago i le Atua, aua e pule lava le Atua, ma o le taamilosaga a le lalolagi tatou te le pule ai, ae pule ai lava le Atua.

**Tatalo:** Le Atua e, faailoa mai ia te au le loloto ma le matautia o au galuega, ina ia maulalo lou loto, ma ia ou iloa la'u vaega i lau foafoaga, **Amene.**

**Mafaufauga Loloto:** Ou te fia saili ina ia ou iloa le loloto o au galuega.

## **Aso Toonai Aokuso 18, 2018 “Opoopo faatasi e le Atua”**

**Enfolded in God's Embrace**

**Tusi Faitau : Salamo 131**

**Matua:** f.2, *'E moni, na ou ffilemu ma ou faalogo, faapei o le tama ua te'a ma le susu o lona tinā, ua tusa a'u ma le tama ua te'a ma le susu.'*

E ese foi le maoa'e ma le malosī o faasalalauga ma le tauto pepelo, o suiga e maua pe a e faatauina se oloa. Faataitaiga, o ni moliga'o, fasi moli, ma pine faiulu. O le agaga maualuga o nei faatosina, i lou faamalieleina pe a e taulimaina nei oloa. O le naunautaiga, ia talia ai le manao ma maua ai le filemu, ae le umi ma maua ai le loto tiga. Pau le



mea e maua ai na'o le manao tele ma puapuaga. O le tama ua tea ma le susu o lona tina, o le tama lea e sili ma loloto lona atamai. O le tama e tofotofa ma e fia o'o i mea uma, e ulavale ma faalogogata, ae a o'o mai puapuaga ona vave lea ma iloa ona toe foi i matua, le aiga ma le Atua.

O le tele o taimi ua pei i tatou o tamaiti laiti e tau fafaga, e iai taimi tatou te manaomia ai le pa'i mai o le Atua, ae tatou taumafai e tete'e atu le mafanafana lea o le alofa o le Atua. *“Le Alii e, ua ou le loto faamaualuga, ua le faasiasia o'u mata, ou te le masani ma mea faasilisili ma mea ua sili ona faigata ia te au.”*(Salamo 131: 1).

O le upu moni ma le faamaoni, oi tatou isi o loo aafia ai pei ona taua i le Salamo 131. Tatou te faananau e saili le filemu ae tete'e foi o tatou loto e olaina le filemu lea. E naunau o tatou loto e saili le Atua i le nofoaga filemu, ae o isi taimi ua tatou le fiafia foi i le mea filemu, ae le pe le leitio, ma lau telefoni feaveai, ma tatou pisi lava i isi mea o le olaga. A'o tatou pisi i mea e fa'ananau iai o tatou loto, o lo'o faatalitali lo tatou Atua. O loo tapuai ma musumusu mai le Atua poo afea e uma ai lo tatou pisi, ae sei faasoa ma tufa mai lona manuia mo i tatou.

**Tatalo:** Le Atua e, fesoasoani ma faasino mai ou ala, ma ia ou fultitua ai i mea sese, ae faasaga atu i lau Afio, **Amene.**

**Mafaufauga Loloto:** E faapefea ona ou iloa ua valaaulia au e le Atua i ala filemu?

### **O ai na te amanaia? – Who cares?**

#### **2. Pe a leai se na te amanaia – 2. When no one cares**

Saunia – Stephen Willey

### **Aso Sa Aokuso 19, 2018 “Faatauanaoina o le Atua”**

#### **Making demands of God**

#### **Tusi Faitau: Luka 18 : 1-8**

**Matua:** f.7, *‘Pe le faia ea e le Atua le faamasinoga mo e na ia filifilia, o loo alalaga ia te ia i le ao ma le po? Pe faatua'i ea o ia ia te i latou?’*

O le tala ia Iesu e lu'i ai tatou, tusa lava pe itiiti pe le taualoa o tatou leo. Sa feiloai ma si au uo o Katie na tiute i Siamani i nai tausaga ua tuanai, ma ia tu'u mai ia te a'u se fasi ma'a itiiti o le pa o Perelini, na vaeluaina ai Siamani i Sisifo ma Sasa'e. O se suiga e maofa ai le lalolagi, ua mafai e tagata mai Sisifo ma Sasa'e o Siamani ona feasiasia'i i aiga, uo ma pa'aga ua faitau tausaga e le i toe feiloai.

Ua saeluaia pa na punitia ai mafutaga. O le fasi ma'a o le pa o Perelini na aumai e Katie, ua avea ma faamanatu, e mafai suiga i faaiuga faava-o-malo pe a tatou faatasi i talosaga. Ua avea ai Siamani ma le atu Europa, ma faaitaiga o suiga lelei mo tagata lautele. E tele foi nisi suiga tetele na mulimuli ane, talu mai ia suiga, pei o le tulai mai o Nelesoni Mandella mai le falepuipui e agai atu i le avea ma peresetene o Aferika i Saute. Ia po'o le suiga malie o le vevesi o tagata nuu o le malo o Ireland i Matu. E ui a ina ua soloia nisi o pa ma feavaevaeiga o le tuanai, ae o loo faapena ona tutupu pea feavaevaeiga ma le le muta o fevesiaiga, o atunuu o le lalolagi i lenei vaitau. E ui lava i lea, e ao lava ona tatou mautu ma faaauau pea i le tatalo, mo le filemu, amiotonu male saolotoga o le lalolagi, ma le talitonu e mafai e le mana o le Atuaona suia loto ma'a'a e avea ma loto alofa.

**Tatalo:** Iesu e, o le toetu, foai mai le mana matou te mafaia ai ona tumau i le faatuatua pe afai e tauau ina le mafaia le galuega, **Amene.**

### **Aso Gafua Aokuso 20, 2018 “O auega a Iopu” Job’s lament**

**Tusi Faitau:** Iopu 3: 1-11, 20-26

**Matua:** ff.1-3, *Mulimuli ane ua tautala atu Iopu, ma fetuu i lona aso. Ua fai atu foi Iopu, ua faapea atu, Ia fano le aso na fanau mai ai a'u, ma le po na fai ane ai, ua to le fafine, o le tama tane.*

Ina ua uma le fitu aso o gūgū Iopu ma ana uo e toatolu, ona fai ai lea o ana upu tomua ma faateia ai i matou. *“Sa sili ai pe ana ou le fanau mai.”* O le a se manatu o Iopu i lona faatō o le Atua i le itula na fanau ai? Sa iai ea se manatu o Iopu ua sese ona aumai e le Atua o ia lenei lalolagi? O le vaauga a Iopu, o lo’o atagia ai ona lagona mafatia ma lona naunautaga, a’o lona leo ua manino.

O le taeao na faatali ai Simona i lana pule mo lana suega, e lei galue ai Simona. Ua amata le tiga o lana pule o Pita ona o le le manatu mamafa o Simona, i ona tiute ae maise le tiai galuega, ua tau o’o mai le lagona o le faate'a o Simona ma le galuega. Ua faalogo Pita i se valaau a le 911, e latalata ane, ma e foliga mai o se tasi ua fia pule i le ola, ae lei iloa o Simona lea. I lena lava aoauli, na tuu fesili ma tuu fesili Pita pe mafai ona suia le auala, e fofu ai le faafitauli o Simona. Ana ou iloa uiga ia o Simona, atonu e iai se suiga o le la mataupu. O le feiloai ma uiga mafatia o nei tagata, o le ā ea se tala po’o se mea e fai?

Mo Iopu, o le upu a ana uō, ao le tofotofoga a le Atua na save'u ai ona lagona mafatia. E le o tala uma o le tusi e o’o i se taunuuga lelei pei o Iopu. O mafatiaga uma e faaleo pe leai, e tetele ona aafiaga. O le tala ia

Simona ma Iopu, e faamanatu mai ia tatou e ao ona faasoa ma faailoa o tatou lagona. E tusa lava poo leā le tigā, faailoa pea auā po’o le loloto, e faafogaina lava e le Atua.

**Tatalo:** Le Atua e, ua matou tatalo ma manatua oe, ua lagona le mafatia ma le fia pule i le ola, sei e laveai ia te i latou, **Amene.**

**Mafaufauga Loloto:** E mafai ea e e ua mafatia ona toa mai ia tatou pe fou pea la tatou vaai faaleagaga.

### **Aso Lua Aokuso 21, 2018 “O le tagi mai mea loloto”**

#### **A cry from the depth.**

**Tusi Faitau:** Salamo 88 : 6-18

**Matua:** ff.8-9a, *Ua e ave mamao ia te au o e na matou masani; ua e faainosia a’u e i latou; ua punitia a’u, ou te le mafai ona ulufafo. Ua totō ou mata ona o le puapuaga; le Alii e, ua ou valaau atu ia te oe i aso uma.*

Na faapea mai se totino o la matou aulotu ia te a’u, ua le o toe fia feiloai mai tagata lotu ia te a’u. O le tagata lea, na maliu sana tama i se taavale lavea mata’utia lava. A vaai mai ia te a’u ona kolosi lea o le auala, ua pei a’u o se tagata leaga. Ou te lei faia lava se mea e ita mai ai fua? E sa’o? Ou te mana’omia la latou lagolago ma le fesoasoani, ae foliga mai, ua manana’o ou te alu ese, ua le toe manaomia a’u e le toatele oi latou. Ua tupu ai foi ma lou le fia alu ese.

I le tusi a le Lau Salamo, o loo manino mai lagona tiga, lagona o le le fiafia ona o lo’o taofiofi lagona faaali o le tagata. O le faailoaina la o lagona ia, e foliga mai a le mafai ona aumai i se gagana teuteu, ae ua aumai sao lava. I le Salamo lea e 88, o loo faailoa ai le sa’i o le fai Salamo, ma tua’ina le Atua i le leaga o mea uma. Atonu, o lenei mataupu o tau faapupula mai ai le faamoemoe i le Salamo 88, ma le tagata lotu, ua le mafai ona tatali le fia faailoa o lagona ma tigā. Ae tatau lava ona tu’uavanoa i le talanoa ma le fetuuna’i ina ia maua le fofō ma le manino. E ese le aoga o le talanoa, o le mau lea a le tinā mafatia.

Na fa’auau pea le faaailoa atu o le lotu mafatia ma le tigā o le fai Salamo, i le faigata o le olaga pe’a taumamao ma le alofa tunoa o le Atua. Sa tuulafoa’i ea e le Atua le fai Salamo? E pei e foliga mai o le mea moni lea o lo’o tautala ai le fai Salamo, ae o loo ia taua o lo’o tatala pea e le Atua le auē lena, o loo tatala e le Atua e faailoa lona tiga

i le lalolagi. E tuu feagai mea uma. E afe ma afe tausaga o loo faaauau lava le avega a le fai Salamo. Tatou te iloa foi, o loo molimau pea le Atua mo ona tagata.

**Tatalo:** Le Atua e, sei e faamāmā le avega a lau fanau, **Amene.**

**Mafaufauga Loloto:** E faapefea ona manino la tatou faalogo e tusa ai ma mafatiaga o isi tagata?

**Aso Lulu Aokuso 22, 2018 “Fa'amalologa i le fanua-tanu”**  
**Healing among the tombs**

**Tusi Faitau:** Luka 8: 26-39

**Matua:** ff.38-39, *Ua aioi mai ia te ia le tagataua o i fafo ia te ia temoni, la te faatasi ma ia, a ua auina atu ia e Iesu, ua faapea atu, “Ina foi atu ia oe i lou aiga, ma ia faamatala atu i mea tetele ua faia e le Atua ia te oe.” Ona alu ai lea o ia, ua tulai i le aai uma i mea tetele na faia e Iesu ia te ia.*

Ona o le tulaga o lona siosiomaga, ua vaoia ai lenei tagata mai le feiloai atu i isi tagata. O le tagata sa i le fanua-tanu. Peitai, ona o Iesu, ua maua le avanoa fou ma faaolaina ai le tagata. O le aiga, o le fale, lavalava, lona mamalu, ma lona saolotoga, ua toe faafoi mai e Iesu. Ua toe maua le moemoe fou, ua toetu mai e ua oti, ma ua toe ola. E iai aso ma taimi tatou te naunau ai i se faafouina. A o'o mai gasegase o le galogalo ma ua le toe manatuaina o mea na tutupu i le olaga, ona lagona lea o le tu'u fesili, pe tatau ea ona ola pea. Ae a le mana'o ina ia maua se fofō ma se toe faafouina o se molī mū itiiiti. O lenei faama'i, o le galogalo o mea i se taimi vave lava, o faamaumauga sa su'esu'e, o loo atagia ai e tumau lava lea fa'ama'i. O lagona ua galo ma ua le manatuaina tagata, o se vaega taua lea o le soifuaga. A o'o na tetele le faama'i, tauau ua pei ua le masani i gasologa o aso fai so'o.

E iai se aso, ua matuā ita lava si ou tamā. I nai aso na tuanai atu, na matou lolotu ai ma tatalo ae maise pese, i pese o le lotu. O lena vaitau, ua nofo i nofoaga o tagata matutua. O lo'o fa'auau pea le pese lotu, ua lagona le maasiasi o si ou tina, ae maise si o'u toalua, ma fesili loa i ai. Oā mai oe tama? Sa tali mai o ia, sa ou i le lotu ma pese i pesepesega. Ua ou lagona le fiafia, aua e ui lava ua na le manatua le mea o lo'o ia iai, ae faafetai o lo'o ia lagona tatalo ma pese.

**Tatalo:** Le Alii e, totō i lou loto se tatalo, pese, se solo e atagia ai le manatu autu i lau afio, **Amene.**

**Mafaufauga Loloto:** O le a se faiga e toe fa'afai mai ai e ua tu'ulafoaiina, aveesea, po'o ua tuli foi ona faafitauli, o loo feagai ma i latou.

**Aso Tofi Aokuso 23, 2018 “ Tauiviga na feagai ma Iesu ma perofeta” The struggles of Jesus and the prophets.**

**Tusi Faitau :** Luka 13: 31-34

**Matua:** f.34, *Ierusalem e, Ierusalem, o le fasioti perofeta, ma fetogi i maa e na auina atu ia te oe; po ua faafia ona ou manao e faapotopoto i lau fanau, e pei o le moa ona o faofatai i lana toloai i lalo i ona apaau, a e le mafafai outou!*

O Iesu lena, na malaga i Ierusalem, e laveai i tatou, na sasa ma sauaina, na fasiotia ona o lona tagata moni. Ao ma savalivali ma se tasi o a'u uo i tafā ala o Peretania, na fonō mai se tamaloa ia te a'u ma lalau mai tala leaga ia te a'u, ona o si a'u uo, o le tagata lanu. O e na tauvalaau mai e manana'o e tuuese'ese i ma'ua, ona e le fiafia i le lanu o si a'u uo. Ua ou ofo ona o le malosi o le faailoga lanu o tagata. Ua ou mulimuli ane fesili, po'o le a sona lagona ae tali mai, Ua ou masani lava i uiga o tagata ia te a'u!

Ua silafia e Iesu le manaomia o lona toto e tagata, ae na ia amoina lava le avega. Ua tagi Iesu, e le mo ia lava, ae mo perofeta na muamua atu, mo tamaiti, tagata matutua ae maise fafine ma e ua mama'i. O le tete'e ma le musuā e auai i le faaolataga a le Atua. Ou te lei tagi la i le tafā ala, ae ua ou ita, ua ou fia tulei ese i latou ona o lo latou faailoga lanu. O sou manatu, o tagata ia e ao ona ou alo ese mai ai ona o le tiga o le faailoga lanu, ma le faamasino fua o a'u uo. E mafai ea ona faia se faaleleiga i lo matou va ma nei tagata? E mafai ea ona faia se faaleleiga a si au uo ma nei tagata? Atonu e le tupu lea mea.

Atonu ua o'o mai foi ia te au le lagona lea o auega. O le auega, e tupu ai le moemoe fou mo i tatou uma.

**Tatalo:** Le Alii e, a'oa'o mai a'u ina ia ou iloa talia o auega a nisi ma fesoasoani atu mo i latou, **Amene.**

**Mafaufauga Loloto:** E faapefea ona tau'ave lau avega?

**Aso Faraile Aokuso 24, 2018 “Le amanaiaina ma faagaloina” Shunned and forgotten.**

**Tusi Faitau:** Salamo 31: 9-18

**Matua:** ff.14-16, *A e peitai a'u nei, ou te faalagolago ia te oe le Alii e, ou te faapea atu, O oe lava lo'u Atua. O lo'o i ou aao o'u aso; ia e laveai mai ia te au ai lima o e ita mai, ma e ua tuliloa mai ia te au. Ia malamalama mai ou fofoga i lau auauna; ia e faaola mai ia te au ona o lou alofa.*

Sa ou masani ona ou asiasi i se tina e suafa ia Penitito, e tausi mavaega i tausaga e tele. Sa ou alu e faailoa iai o lo'o momoli mai alofaaga o le ekalesia, e ui lava e seāseā omai e asiasi mai. Sa ou manatu ua faanoanoa ma mafatia ona ua le mafai, ona toe faia mea e masani ai, peitai e le o atoatoa ai lona loto. Ou te mautinoa e faigata i tagata ona vaai i le tulaga ua iai o ia. Ou te iloa, o ia o se tagata malosi, ma e tele mea e aoga ai, peitai ane ua ma'i i se tulaga tugā i le taimi o lona tausaga talavou. Ina ua aafia o ia i le stroke, e foliga mai ua mou atu ma lenei lalolagi. Sa ou le mautonu a'o faasino mai e Pita lona toalua lona potu ia te au. Ua vaai lona tino o taoto mai i le moega. O le a ea se lagona a'o vaavaai atu i tulimanu e fa o le potu, nao le toalua o taoto mai, ae o se tasi e asiasi atu? Ua 'ata'ata mai Penitito ia te au, e lei umi ona ou tu, ae ou manatua, ua ou i le mafutaga ma le tagata ua tupu lona faatuatua. Ua ou lagona le malamalama o le Atua i luga o lenei tina. O le alofa mutimutivale o le Atua, ua tafe i lona tagata. O le asiasiga lenei, ua ou lagona ai le faatauaina o a'u. O le lagolago mai o le alofa o le Atua i la'u galuega. Sa ou fai ia Penitito, e tutusa ta lagona mafatia.

Ona ou manatu lea, i tua atu o tiga, tuulafoaiina, tulieseina ma le lē amanaiaina – le pese a le fai salamo i le Atua, i taimi o puapuaga, ae o loo faailoa atu ai foi le matagofie o le talitonu i le Atua, ma lona alofa tunoa.

**Tatalo:** Le Alii e, alofagia e ua tausi i aiga ma le toese. Faaola iai latou, **Amene.**

**Mafaufauga Loloto:** E faapefea ona fesootai ma nisi ua loa ona le toe fesootai?.

**Aso Toonai, Aokuso 25, 2018 “Upu mai le asiosio”**

**Words from the whirlwind**

**Tusi Faitau:** Iopu 39 : 1-8, 26 – 40 : 2

**Matua:** ff.1-2, *Ua tali mai pea le Alii ia Iopu, ua faapea mai, O le finau ma le e ona le malosi uma lava, na te aoai mai ea? O le faaletonu mai i le Atua, ia tali mai o ia i lea mea.*

E le o toe tutusa aso pei o le 1970, o lo'o iai se popolega tele i tagata matutua, a'o agai mai le suiga i le lotu, aiga, uo, pese lotu ma suiga o le olaga. A o'o mai le matua ma ua loa le auunaga, ona leiloa lea e tagata. O le mafatiaga ma le tuulafoa'iina o Iopu na fesiligia ai e Iopu lona Atua. Ao tautala atu Iopu i le Atua, ae na tali mai o ia o le Atua foafoa. Ua sa'o ma ua taoto le faavae o le lalolagi. Le Atua na ia fetalai ma faamanino le pogisa ma le leai o se mea. Le Atua na ia faatulaga ma vaevaaina le gasologa o le taeao ma le afiafi. O manua ma tagata, le lagi ma le lalolagi. Le Atua na ia faailoa ia Iopu lona vaivai i lana lu'i.

Ua le mafai e Iopu ona su'e se sesē o le na foafoa. Ua maofa ai o ia. O le faaaliga fou lea ua fai ma faavae fou mo Iopu ma lona olaga. E mafai ea ona o tatou maua suiga fou mai le Atua, e ui lava o tatou taumafai e tumau i le lalolagi tuai? Faamata e mafai?

E mafai e le Atua ona fai suiga ia pe a o tatou talitonu ma le faamaoni i le Atua. E le toe faailoa e le manuia na muamua atu, peitai, ua faia e le Atua le mea ua silisili ona lelei. Le Atua lea ua faia mo Iopu le mea ua matagofie, ua faatupu le oa, ma ua faatuputeleina le faamoemoe.

**Tatalo:** Le Atua Paia e, sei e faia se loto fou. Sei e faamanuia i lo'u tuanai, le taimi nei ma lou lumanai, ma ia ou maua faamanuiaga o lau foafoaga, **Amene.**

**Mafaufauga Loloto:** O le a sou manatu i le suiga o lou olaga e le Atua i le taimi nei? Faapefea faamanuiaga a le Atua ua faamanuiaina ai oe i ala eseese?

### **O ai na te amana'ia? - Who cares?**

#### **3. O se nuu e fetausia'i – 3. A community of care**

Saunia: Liz Clutterburg

### **Aso Sa Aokuso 26, 2018 “E avea i latou mo'u tagata”**

#### **They shall be my people**

**Tusi Faitau:** Esekielu 11 : 14-20

**Matua:** *ff.19-20, Ou te foai atu foi ia te i latou le loto e tasi, ma ou foai atu le loto fou i totonu ia te outou, ou te aveeseina le loto fatu ai totonu i outou tino, ma ou foai atu le loto aano ia te i latou; ina ia latou savavali i a'u tulafono, ma tausi i a'u faamasinoga, ma latou faia; e fai foi i latou mo'u nu'u, e fai foi a'u mo latou Atua.*

Na fetalai le Atua i lana perofeta o Esekielu, a'o taape le fanauga a Isaraelu i Sasa'e tutotonu. Ua galo ia te i latou lo latou faasinomaga ma o i latou o le nuu filifilia o le Atua. O le perofeta a le Atua o Esekielu, ina ia faamaopoopo mai le nuu mavaevae o Isaraelu, ao le mea sili ia maopoopo o latou loto i le Alii, ma tasi o latou loto. Le loto lea e tasi e manatua ma atagia ai le foafoaga a le Atua. O le tino lea e tasi ma le loto lea e tasi, e tausi ai le tulafono ma tapuai ai i le Atua, ma iloa atili ai o i latou o fanau a le Atua.

O le manu lauti e le gata i nai vaiaso ua tuanai, ao lenei vaiaso, o le alofa i totonu o faapotopotoga, ma e faamamafa ma faa-'autu uma lava i le alofa. O le tino o Keriso e tasi, e faapena foi le alofa o le Atua ia Isaraelu. O le alofa foi lena o le Atua e maopoopo uma ai tatou ma alolofa ai iē na faia i lona faatusa.

**Tatalo:** Le Alii e, sei e liua lo'u loto ina ia ou alofa atu, ia pei o oe, **Amene.**

### **Aso Gafua Aokuso 27, 2018 “Nonofo fealofani” Living in unity**

**Tusi Faitau:** Salamo 133

**Matua:***f.1, Faauta, o le mea e matua lelei ma le matagofie lava, pe a nonofo faatasi lava o uso.*

E foliga mai e naunau le fai Salamo e faamanatu le “tasi” o tagata ona e le o se mea e faigofie. O se mea matagofie ma manaia o uso ae nonofo faatasi, ae o se mea e seāseā ona tupu. I le tala'aga o le ekalesia poo le tino o Keriso, e faigata ona nofo faatasi tagata uma, o le eseese o talitonuga, o faiga ma aga, o le mataupu silisili, ma ua ova ma le lua meleniuma e le o mafai lava ona maua le nonofo faatasi, ae na o le fevaevae'i. Ua aveva ma ala ua le manino ai la tatou vaavaai atu i faamanuiaga. O le talitonuga, o le tagata lava e punitia ai lana vaai i le Keriso.

Ao faatuputupulaia le potu o lenei lalolagi, e faapena foi le faatuputupulaia o le muimui o le tagata i le ekalesia. E le aoga i le ekalesia le femisaa'i ma le ita o le isi uso i le isi uso, ae faasoa ma faailoa mafuaaga e tiga ai le tasi i le tasi ma fofō le faafitauli.

Na ou aoga i le aoga faa-faifeau e a'oa'o ai le agaga o le malamalama i mataupu silisili eseese a le au kerisiano. E le taua le eseese o talitonuga, ae aoga lava i le mea e tasi, o le tino o Keriso. Ua ou lagona le fiafia i le eseese o talitonuga, aua e auala eseese mai le finagalo o le Atua i tapuaiga ma faiga e o'o atu ai le upu i le toatele o tagata. Ua aoga le tatala o taofi mo a'u, aua lea ua o gatasi lotu masani, ma lotu fou i



ona po nei. O le tutū faatasi e faalatele le galuega a Iesu, e ala lea i le talia e ekalesia eseese aemaise o le faiga o a latou tapuaiga, ina ia mafai ona faatuputupulaia o le maopoopoga o le tino o Keriso.

**Tatalo:** Le Atua e, foai mai le mana matou te tutu faatasi e atia'e ma faia lau galuega, **Amene.**

**Mafaufauga Loloto:** E faapefea ona tutu faatasi lau aulotu?

**Aso Lua Aokuso 28, 2018 “Fafaga a'u mamoe ma tausi la'u lafu.”**  
**Feed my sheep and tend my flock**

**Tusi Faitau:** Ioane 21: 9-19

**Matua:** *f.17, Ua fetalai faatolu mai o ia ia te ia, “Simona e, le atalii o Ioane, pe e te alofa mai ia te au?” Ua tiga Peteru, aua ua ia fetalai faatolu ia te ia, “Pe e te alofa mai ia te a'u?” Ua fai mai ia te ia, “Le Alii e, ua e silafia mea uma lava, ua e silafia, ua ou alofa lava ia te oe.” Ona fetalai atu lea o Iesu ia te ia, “Ia e fafaga i a'u mamoe.*

O Iesu o le leoleo mamoe o se ata masani mo i tatou. O le lafu mamoe, o se nuu lotu ua leoleoina e se leoleo mamoe e ofoina atu lona ola e laveai ai le ola o le mamoe ua leiloa. E lua lava tiute o le leoleo mamoe.

O Simona Peteru na tuu i ai le galuega ma ia mautinoa o mulimuli tagata ia te ia. O le tiute fa'auau lea o Simona Peteru, o le leoleoina lea o mamoe, aua ne i se ese, a ia tutu faatasi ina ia aua nei leiloa se mamoe. O le uluai kerisiano, ua le na o se vaega o tagata taitoatasi, ae o le faapotopotoga o tagata e mulimuli faatasi i le Keriso, ma ia lagolago le isi i le isi aua le filifilia ma le feagai ai o i latou ma le galuega. I lau faapotopotoga kerisiano, o ai le ua fai ma leoleo mamoe? O ai na te tausia ma faainu faaleagaga le lafu mamoe? E iai le manatu, na'o taitai o le ekalesia. Ae a le tiute o tatou uma? O mulimuli ea lau vaai i tagata ua toesea mai lau potopotoga i vaiaso taitasi, ma e saili i a'i latou? O e tufa ea ni tusi faitau mo e galulue ina ia tupu ai le fia faitau? O ē faamalosi ea i tagata i lo latou ola faaleagaga? O le fagaina o le lafu o le galuega faifaatasi.

**Tatalo:** Le Atua e, a'oa'o mai ina ia mafai ona ou leoleo ma fafaga lau lafu mamoe, **Amene.**

**Mafaufauga Loloto:** O le a se matātā e ona faalelei ai le avea ai o oe ma leoleo mamoe?

**Aso Lulu Aokuso 29, 2018 “Atia'e tupulaga o taeao”**  
**Building the next generation**

**Tusi Faitau:** Salamo 48

**Matua:** *ff.13b-14, ...ina ia outou talatala atu ai i le tupulaga atali; aua*

*o lenei Atua, o lo tatou Atua lava ia e faavavau faavavau lava; o ia lava na te ta'ita'iina i tatou e oo lava i le oti.*

O se tasi o mataupu sa a'oa'oina ai au o le galuega faamsionare i le 19 seneturi. E toatele o e na auina atu e le gata i Peretania, a'o atunuu tala atu o Peretania, na ofoina atu o latou tagata mo le Atua ma lana valaau, ua valaauina ai i latou.

I le faitau atu i le tusi ma mea sa tutupu i a latou galuega, ona ou vivii lea i le Alii ona o le faigata o le galuega. O nei tusi e tusa ma le selau tausaga talu ai, ae o lona taua ma lona aoga mo au e le faaitiitia. E iai taimi e faamatala mai ai e le Atua lo tatou valaauina e ala i lana Tusi Paia. I le tala faasolopito o Isaraelu, o loo atagia ai taimi ao fa'aaunu'ua ai i Papelonia, o latou perofeta ae maise le le usitai i le Atua, ae maise le Mesia.

I le feagaiga fou, o loo atagia ai le feagaiga fou na faia e Iesu ma ua maopoopo ai tagata uma. E lua afe tausaga e sosoo ai ua faaopoopo ai ma i tatou i le faaolataga lea a le Atua. O le au kerisiano, o loo taua e le fai Salamo, o tupulaga lena o le lumana'i. O tupulaga uma na mulimuli ane na taitaiina uma lava e le Atua. O auga tupulaga uma na latou tofo i le alofa mutimutivale o le Atua. Ua tele pisinisi ma le tamaoaiga ua pologa ai tagata, ma ua galo le alofa o le Atua, ua galo o i tatou o le tino e tasi, na tausi ma alofagia e le Atua i seneturi ua tuanai. E le na'o le tupulaga nei, ae o tupulaga uma na tausia ma alofa i ai le Atua.

**Tatalo:** Le Atua e, o auga tupulaga, fesoasoani mai ina mafai ona o matou mulimuli i ou ala i lenei tupulaga, **Amene.**

**Mafaufauga Loloto:** E iai ea se misionare na ia faia se galuega lelei mo lou nuu lotu? Afai e iai o ai?

### **Aso Tofi Aokuso 30, 2018 “Agalelei e le o faaleoina” Caring behind the scenes**

**Tusi Faitau:** Galuega 6:1-7

**Matua :***ff.6-7, Ua latou tuu atu i latou i luma o le au aposetolo; ona tatalo lea, ma faaee o latou lima i o latou luga. Ua tupu foi le afioga a le Atua; ua matua faatoateleina le au soo i Ierusalem; ua anaana foi ositaulaga e toatele lava i le faatuatua.*

O le matagofie o le galulue faatasi o le au faatuatua, o le eseese lea o ituaiga valaau e faaogaina ai le tagata mai le Atua. Afai o i tatou uma o tagata faifeau ma faievagelia, o le a le mafai ona fautuaina le ekalesia. I le amataina o le ekalesia, na manaomia ai faifeau ma faievagelia, auā le faasalalauina atu o le talalelei, ma a'oa'o atu ina ia iloa ona feofoofotai

le alofa o le isi i le isi, i totonu o faalapopotoga, ina ia aua nei feteena'i tiute aua lava le faatuputeleina o le ekalesia.

Ua silafia e le au aposetolo, o lo'o ia te i latou meaalofa e mafaia ai ona faia mea uma peita'i, ua latou saili i o latou lotoifale mo nisi e tausia manaoga o tagata lotu. O nisi ua tofia ma filifili e tausia i latou ua oti a latou tane, o fanau leai ni matua atoa ma e mama'i. Oi latou foi ua tumu i le agaga, ma e taua la latou galuega, o e ua tumu i le faautauta, alofa ma ua olaina le talalelei ia Iesu. O e ua ave la latou faamamafa i lauga o le pulela'a, lauga i le koneferenisi, tusitusi ma faailoa ai lo latou potu, ae galo e o lo'o galulue ma le punoua'i mo le manuia o tagata lautele. Ua valaauina i tatou e le Atua ma tagata uma, e le sili le taua o le tasi i le tasi, e le faatuaioia foi lona alofa ua na o se vaega o tagata, ae o le alofa o le Atua na te amana'ia ai tagata uma.

**Tatalo:** Le Alii e, faafetai i lou amanaiaina o e vaivai ma faatauva. Tatalo ina ia faalateleina la matou vaai e auauna ai i tagata uma, **Amene.**

**Mafaufauga Loloto:** Manatua ane e alolofa ma galulue pea ina ia faailoa ma taualoa la latou auaunaga.

### **Aso Faraile Aokuso 31, 2018 “Amanai le vaivai”**

**Considering the weak.**

**Tusi Faitau:** Roma 14 : 13-23

**Matua :** *f.22, Ua mau ea lou taofi? Ia ia te oe lava ia i luma o le Atua. Amuia le ua le faamasinoina o ia e ia i le mea ua manatu o ia e tatau.*

O le fevaevaeaiga, e foliga mai o le manulauti lea i le talafaasolopito o tagata o le Atua. E ui lava e taumafai e tasi le tino o Keriso, e malosi lava le fevaevaea'iga i le nuu o le Atua. Sa vevesi le uluai ekalesia i le mataupu silisili o le au kerisiano mai Iutaia, ma i latou o tagata nuu ese. O aso nei, ua vaevaeina i tatou ona o galuega, tulaga ma tupe maua.

E eseese la ma le malo o le Atua, o lo'o valoia mai le feagaiga fou. O loo ua faamanino e le aposetolo o Paulo i le tusi faitau, o le malo i le lagi e le o faatatau i meaai ma mea e inu, ao le agaga ma le amiotonu. Ou te manatu, o lana upu foi lea i ekalesia i le 21 seneturi. O le lotu lava ia o se nofoaga e talia ai tagata uma, peitai ua tatou fau pa faaleagaga, ma ua faatuputeleina lo tatou le talia oi latou ua taua tatou te le tutusa ma masani. E atagia i 'aiga ma toana'i. Ua le auai lava le isi i le to'anai ona ua le lava le faasoa. E iai se ekalesia i Lonetone ua

faamalosiā tagata lotu ia auai, tusa lava pe itiiti se mea e maua pei o se pepa keke. E iai lo latou talitonuga o mea uma lava e mafai ona tufatufa atu, atonu e mafai ona mafuta ma e pei o i tatou. Atonu tatou te le mautonu ma mafuta ma i latou tatou te le masani, ae e ao ia'i tatou ona tatou tatalo i le Atua, na te tapenaina i tatou ia aveesea pa pupuni ina ia avea ai i tatou ma tino e tasi.

**Tatalo:** Le Alii e, foai mai le malosi e mafai ai ona tineia pa pupuni ma fofō manuanua o le fe'ese'esea'i, **Amene.**

**Mafaufauga Loloto:** E iai ea se faiga e te faia e faaleaoga ai le agaga o le faailoga lanu, ma le tete'e atu i faigata o lou fia auai i le ekalesia?

### **ASO TOONA'I, Setema 1, 2018 “E tupu pea le alofa.”**

#### **Love builds up**

**Tusi Faitau: 1 Korinito 8:1-13.**

**Matua (f.12):** *A faapea foi ona outou agasala i le 'au uso, ma faatausua'i lo latou loto fuatiaifo vaivai, ua outou agasala ia Keriso.*

E i ai le talitonuga masani, e faapea: 'E mafai ona tatou filifilia ia tatou faigauō, a e lē mafai ona tatou filifilia i o tatou lava 'au aiga.' E lē faapena ona filifilia le mafutaga i le Tino o Keriso. Ua lē faapena foi ona filifilia po'o ai lo tatou 'au aiga ia Keriso.

O le mata'upu o le aso ananafi ua faaalua ai o le ola fevaevae'i, o le mataupu 'autu lea na feagai ma le ulua'i Ekalesia Kerisiano, ma o le mata'upu foi lea o lo'o fa'aaauaina i le ulua'i tusi a Paulo i le ekalesia i Korinito. Tatou te lē filifilia po'o ai tatou te galulue faatasi i le faatinoga o a tatou tapua'iga, a e maise o a tatou fuafuaga faatino faale-ekalesia. O le Atua, ua na o le Atua lava le pule aoao. O lo tatou tiute, o le fausia lea o le mafutaga faatasi ma i latou ua 'auina mai, e aunoa ma le faafiti i so'o se faigata e feagai ai. O le to'a itiiti ma le to'a gaogao o se mafutaga, o le faateleina foi lea o le faigata ona faafiti ma fulitua i e ua faatasi mai.

A e ui i lea, ua foa'iina mai e le Atua ona tagata ia tatou mafuta faatasi, ma ua faaa'upagaina i tatou i le alofa tatou te alolofa atu ai, e faapei foi ona latou alolofa mai. O le ola fetausia'i o se mafutaga, e le tupu fua e aunoa ma le alofa. A tatou ta'utino i le alofa ma le fia mulimuli ia Iesu, o lo tatou ta'utino lava lea ua tatou alolofa i e ua alofagia e Ia (Iesu)---e tusa lava po'o a faigata e o'o mai, tusa foi po'o a 'auala sesē o lo'o mulimuli ai. Afai e feagai i tatou ma faigata ona o i latou ua tatou mafutaga ma 'auai i le malo o le lagi, 'aua ne'i o tatou manatunatu i le

alofa faale-tagata, a e ia ole atu i le Atua e foa'i mai lona "alofa" --- tatou te alolofa atu ai.

**Tatalo:** Le Alii e, ia faatupuina ia te a'u lou alofa, ma ia ou iloa ona faailoa atu lea lava alofa, i e ua matou mafuta faatasi i lou malo i le lalolagi. Ia avea lou alofa ma a'upega matou te lē fulitua ai i mea faigatā uma e o'o mai. Amene.

**Mafaufauga Loloto:** Faaavanoa sou taimi e te mafaufau ai i le faigata o e o loo outou mafuta faatasi. Tatalo i le Atua ona o i latou, ma ia faatupu le alofa i lo outou va faafeagai.

## Hosea

### 1 - Ua fetalai le Alii le Atua – 1 The Lord speaks

Saunia apoapoa'iga: Mandy Briggs.

**ASO SA, Setema 2, 2018: "Faalauiloaina o Hosea."**

#### Introducing Hosea

**Tusi Faitau: Hosea 1:1-9.**

**Matua (f.2):** *O le amataga o le afioga a le Alii ia Hosea. Ua fetalai mai le Alii ia Hosea, Alu ia 'oe, ia e fai avā i le fafine talitane, ma ia fai māu le fanau a le faita'aga, auā ua matuā faita'aga lava le nu'u, ua o 'ese i le Alii.*

Ana fai a e i ai se "Facebook" e talanoa mai ai Hosea, semanu tatou te iloa ai iina le faigata o le olaga sa soifua ai lenei auauna.

Ana fai o 'oe po'o a'u e fia faailoa atu se perofetaga, e le taumate tatou te 'auai faatasi i se solo tete'e, po'o le tusia o tatou igoa i se talosaga tete'e. E le'i finagalo le Alii ia ola Hosea na o ia lava, a e ia fa'aaoga lona soifuaga atoa i se olaga faaperofeta.

O lona faaipopo atu ia Komeri, le fafine e leaga lana amio, ua avea lea ma faailoga o le alofa o le Alii i le fanauga a Isaraelu ina ua liliu'ese ma tapua'i i atua faapaupau, o se faailoga o le ola i amioga lē tonu.

O le finagalo o le Alii e auala atu ia Hosea, a e a'afia ai ma lana fanau. Ua na lē faaigoa lana fanau ia Mika, Ropati po'o Sifeni, a e o igoa ua iloa ai lona olaga atoa faaperofeta, e faapei o igoa nei: o Isereelu (ua totoina e le Atua), o Loruama (o lē ua lē alofagia), ma Loama (e lē so'u nuu). E faapei ona mua'i ta'ua, "e faigata le soifuaga sa ola ai lenei auauna." E faigofie ona fai se faitioga e tete'e ai i le tusi o Hosea. Aua o se mafutaga ua lē faatuatuaina, e faigata foi ona faamoemoeina, tusa lava pe na o se ata faata'ita'i. E ono tutupu a'e ai ni lagona fete'ena'i po'o le faamanatu mai o le loto tigā.

Peitai, ia tumau pea ma onosa'i---auā a mavae tigā ma faigatā o se mafutaga, e toe tepa i tua i le tele a avanoa sa lotolotoi ai le alofa, e atagia ai le tele o filifiliga ma le loloto o 'auala lilo ua saunia e le Atua e faatino ai lona alofa i lana fānau ma ona tagata.

**Tatalo:** Le Alii alofa e, ina ua matou faitau ma manatunatu i le olaga faigatā o lau auauna o Hosea, ona matou faapea ane lea: Le Alii e, ia e ta'ita'i i matou ia tusa ma lau amiotonu. **Amene.**

**ASO GAFUA, Setema 3, 2018: “E faigata le alofa.” Tough love**

**Tusi Faitau:** Hosea 2:1-10.

**Matua (f.2a):***la outou finau atu i lo outou tinā, ina finafinau atu ia; auā e lē o la'u avā ia, e lē o lana tane foi a'u...*

O le ofisa ou te galue ai, i le New Room i le 'a'ai o Bristol, o lo'o ta'ua i le ata faasolo lauiloa a le BBC, o le “Poldark.” Ua talafeagai tonu le New Room e tusa ma le tala-faasolopito, ona sa fausia i le 1739.

Ua teuteuina le potu atoa ina ia foliga o se potu faamasino o le sefuluvalu seneturi tausaga ua mavae, a o soifua le toa (hero) lauiloa e igoa ia Ross Poldark. Na faamasinoina o ia i le soligatulafono o le taumafai e fasioti tagata, ma o'o ai ina tupu le faalavelave ua fulifaō ai le vaa.

Ua manatu nisi o le 'au su'esu'e i le Tusi Paia, o le vaega lenei o le tusi a Hosea o lo'o atagia ai le faamasinoga o le tatalaga o se feagaiga osia faale-ulugalii. O le feagaiga i le va o le Atua ma Isaraelu ua faamatalaina i upu e faatatau i le talosaga e faa'autū i le finauga e tete'e i le fafine lē faatuatuaina ma lona tinā.

E i ai ni mafaufauga e le logomalie e ono tutupu a'e, pe faamanatu mai foi ni tulaga e ono tutupu pe afai e molimauina se fafine ua mulilua i taimi o le Tusi Paia. Afai a e molimauina ma faamaonia ua nofosala, o le faasalaga lava e o'o i ai, o le fasioti i le fetogia i ma'a (silasila i le Ioane 8:1-11).

A e ui la i lea, e ao ina manatua o le faamatalaga lenei, ua na o se tala faatusa i le Atua ma lona finagalo e uiga i lona nuu lē faatuatuaina, o Isaraelu lea. Afai a e lilii 'ese le nuu ma amana'ia se tasi o “atua”---le atua e faapei o Paala---e to'asa le Atua moni ia te i latou, e faapei o se loia fautua i le faamasinoga.

O lenei “ulugalii” ma ta'utinoga o le alofa, ua o'o ina laasia le tumutumuga e gata ai. Ua leai se tasi faamoemoega e maua i nisi sa'iliga faale-lotu. Ua o'o mafaufauga o le loto, e sili ia pe a toe foi i taimi o le iai i le vaomatua. E ono tapua'i Isaraelu i nisi atua faapaupau, e faapei o le tane po o le fafine e mana'oloto i se tasi faauoga fou, a e o mafaufauga ia e toe ta'ita'i ai i le vaotu'ufua, o se nofoaga ua fulitua nei i ai.

A e o le Atua, lea ua latou liliu 'ese ai, ua finagalo ia latou iloa lenei laasaga---aua ua galo lava i le nuu na filifilia, o le Atua na ta'ita'iina manuia mai i latou se ia taunuu i le laueleele na folafolaina e tumu i le tamaoaiga.

**Tataloga:** Ia talosia nisi o aiga o loo feagai ma faigatā i totonu o fale faamasino, ae maise lava i latou ua faafeagai ma fe'ese'elega faa-ulugalii, tatalaga o feagaiga na osia, faapea i e o lo'o feagai pea ma sauaga i so'o se 'auala.

**Mafaufauga Loloto:** Pe mafai ona e fesoasoani i aiga o loo aafia i nei ituaiga o faigatā ma puapuagā?

**ASO LUA, Setema 4, 2018: “E iai le faamoemoe i totonu o le vanu.” Hope in the valley**

**Tusi Faitau:** Hosea 2:14-23.

**Matua (f.15a):***Ou te tuuina atu foi ia te ia ana tovine i lea mea, ma le vanu o Akori e fai ma faitoto'a e faamoemoe ai;...*

Na ma asiasi ane ma se tasi o a'u faauo i le aai o Krakow, Polani, i le tausaga 2006.

Na feagai tonu lo ma taunu'u i le taimi na asiasi ane ai Pope Benedict, o ia lea ua sui tulaga ia Pope Ioane Paulo II.Sa ma matamata i faasalalauga o faasologa i le TV o asiasiga a le Pope, a e maise lava i le nofoaga i Auschwitz, lea na fasiotia ai le faitau afe ma afe o tagata Iutaia i aso o le taua lona lua, WW2, a le lalolagi. E fa'agae'etia loto le tatalo o lenei Pope Siamani, e fa'asolosolo i le laina o ma'a faamanatu o e na maliliu i lenei sauaga mata'utia.

A o matou matamata ma va'ava'ai pea, na matou vaaia le nuanua ua pupula mai i le lagi i luga a'e o le Pope. O se va'aiga e faigatā ona fa'amatala ini upu, a e vaganā o le lagona talitonu i le iai o le faamoemoe. O le tusi faitau o le aso lenei, ua tautala ai Hosea i le vanu o Akori, o le fanua o le faamasinoga e pei ona ta'ua i le Iosua 7.

Na faatonuina ia tagata o Isaraelu ia 'aua lava ne'i toe solia se poloaiga i taimi o taua, peitai, o le tagata e igoa ia Akana ua le ususita'i a ua soli le tulafono. Na to'ilalo 'au tau a Isaraelu i le taua na soso'o ane ai, ua iloa ai o Akana ua soli le tulafono, ona 'aumaia lea o ia i luma o Iosua, ua fasiotia ai.

Na poloa'i le Atua ia Isaraelu, e faapea: o le aso nei i le vanu o Akori, o se ata faatusa lea o lo'o i ai le faamoemoe e toe faafouina. E ui lava ina lagona le tigā o aso ua mavae, a e toe faafouina lava le feagaiga, e toe lavea'iina le mafutaga e fiafia ai.

E foliga mai ua toe faafouina le loto naunau o le faufautane---o le ta'utinoga fou i le va o le Atua ma ona tagata, e ui ona sa leai se manatu

e toe o’o i ai. Ua tautala Hosea i le faamoemoe i talatu o tigã ma puapuagã, peitai, ua mafai nei ona toe teuteu ma faamatagofie i talatu o le tu’ulafoa’iina.

E i ai pea le loto atuatuvaile i le va feagai o le Atua, o ia lava o le faamasino tonu i lana fanau, e faapei ona faaalii i le tusi faitau o ananafi---o le Atua o le alofa lava ia, na te valaauina lana fanau ia toe fo’i mai. Ua faaalii i le aso nei, e manumãlõ pea le alofa.

**Tatalo:** Afai ou te tau mamao ma lo’u Atua, le Alii e, ia e alofa ma lavea’i mai i lo’u tagata vaivai ina ia faaolaina. **Amene.**

**Mafaufauga Loloto:** E faapefea ona e faamatalaina lenei fuaitau, “Ua manumalo le alofa i le aso nei”?

**ASO LULU, Setema 5, 2018: “Ositaulaga i mea faigata.”**  
**Turbulent priest.**

**Tusi Faitau:** Hosea 4:1-11.

**Matua (f.7a):** *E pei ona faato’ateleina o i latou, ua faapea ona agasala mai o i latou ia te a’u...*

O lē tasi o ata tifaga tau faa’ata ou te fiafia tele ai, o le “Tamã o Ted.” E i ai ositaulaga e to’atolu na lē taunu’u lo latou faamoemoe i le fia ‘ausia o ni matãti’a faapitoa, ina ua pa’ulia i se tama’i motu o Aialani faatasi ma se tama’ita’i teu-fale, ma le anoano o le ‘au maimoa o lo’o matamata ma taliẽ i ai.

O nei ositaulaga faale-Lotu ua ta’ua, o ni tagata fai fale-aitu i le ata tifaga. O le faatamã o Siaki e inu’ava ma laulauvavale, o le faatamã o Take e lē o se tagata e ma’ai le fai’ai, a e o le faatamã o Ted e ‘aitapa’a ma faalẽ-keakea. E ui ina eseese a latou amioga ma mea e fai, a e tupu lava le alofa i le vaavaai atu i ai.

Ua le foliga faapea ositaulaga i le tusi faitau o le asõ. Auã o i latou ia ua fai ma fili o le nofo filemũ. Na muamua lava faailoa le lē malie o Hosea, auã e masani tagata Isaraelu i uiga tete’e. Peitai, ina ua faifai tetele uiga ia, ona faailoa ai lea o le matuã lē fiafia e faatatau i le ‘au failotu.

I lenei luasefulu-tasi seneturi o tausaga, ua i ai faiga fou ua televave ai tala feavea’i, ma ua le toe natia ni uiga lilo e tutupu i ositaulaga, i toeaina, o rapi ma e ua ta’ua o tagata-paia, pe a fai e to’ilalo i faaososoga a le Tiapolo. E foliga mai, sa tutupu foi ia ituaiga uiga i ona po o Hosea, e tatau ona faalauiloa. O lea ua ta’u manino mai lava, i le fuaiupu: “E o’o ina gatusa lava o le nuu ma le ositaulaga; ou te taui atu foi ia te i latou a latou amio, ou te taui foi ia te i latou a latou mea ua fai.” (f.9).



O le lapata'iga lenei mo i latou ua faasino tonu i ai le tiute o le folafolaina o le finagalo o le Atua. I le faai'uga o lenei apoapoa'iga, e foliga ua faailoa atu e Hosea le i'uga e tusa ma mea ua latou faia---po'o ai lava i latou nei.

**Tatalo:** Le Alii e, ua le faigofie ona matou mulimuli tonu, ua faigata foi ona fai ma ta'ita'i. Foa'i mai le potu ma le faautauta i e ua fai ma ta'ita'i i so'o se tiute ma so'o se valaau---pe faale-mālō, po'o le atunuu, a e maise i le ola faale-faatuatua, **Amene.**

**Mafaufauga Loloto:** Pe faapefea ona e faamalosi i e ua tofia e fai ma ta'ita'i i le olaga faa-Kerisiano?

**ASO TOFI, Setema 6, 2018: “O le lapata'iga faa-perofeta.”**

**A prophet's warning**

**Tusi Faitau:** Hosea 5:8-15.

**Matua (f.9b):** ... *Ua ou faailoaina atu i itu aiga o Isaraelu, o le upu moni lava.*

Ua faasaga atu nei Hosea i le lapata'iga e sili ona malosi. Ua aliali mai ua o'o ina leaga Isaraelu, e māfua ona ua latou liliu 'ese mai le Atua. Ua tupu le faamata'u i taulaga (towns), a e maise lava i le itu i saute, o le mālō i mātū o Efaraima (Isaraelu).

O Kipea, Rama ma Petavene, o taulaga ia i le tuā'oi e mafai lava ona olopalaina auaua'i. A e o'o foi i le mālō i saute, o Iuta, ua lē o toe saogalemu, auā ua a'afia i le agasala lava e tasi. E o'o lava foi i le tupu malosi o Asuria, o Iarepa (Tiglath-Pileser III) lona igoa, e le mafai ona fesoasoani (e ui e mafai ona maua se faailoga numera muamua i le igoa pito tusaafia i le Tusi Paia).

E faapefea ona tatou faafeagai ma foliga o le Atua ua ta'ua i lenei tusi faitau? Ua to'asa le Atua ona o e sa alofa i ai ua fulitua mai ia te ia; ua finagalo ia toe foi mai, se ia latou faafesaga'i ma le olopalaina auā o le mea lava lea ua tatau ai, o le mea ua sili ona faigata, ia ua'i mai o latou lotu. E ui i lea, a fai e taga'i i isi faamatalaga, ona iloa ai lea o le finagalo o le Atua, ia toe liliu mai se ia toe faafouina ma avatu ia te i latou le manuia.

Se'i mafaufau ane lava i nei uiga faigata, pe a fai e aafia ai le mafaufau ona o le tagata sa naunau i ai le lotu a ua le faamaoni---e amata i le lotu ita, soso'o ai ma le fia taui atu, ma ua lagona le faanoanoa. Afai e lē o ia manatu, atonu ua tupu le lotu fia faamagalalo se ia toe faatino se amataga fou.

Ua atagia ma faaalua ia Hosea foliga uma ia o le Atua mo lona nuu o Isaraelu. O lenei perofetaga o lo'o vaavaai atu i taimi faigata na o'o ia

Israelu. A e tasi le faamoemoe pito taua o i luma, ia toe fo'i i le mafutaga faatasi ma le Alii le Atua.

**Talosaga:** Ou te faapea ifo i lo'u loto, "Na fai atu lo'u loto ia te 'oe! Ia outou sailiili mai ia te a'u." **Amene.**(Salamo 27:8).

**Mafaufauga Loloto:** Po o le a se fesoasoani e maua mai ia Hosea mo e ua mafatia i taua ma sauaga eseese i nei ona po? O le a sou manatu i le pogai ua lē mafaia ai?

**ASO FARAILE, Setema 7, 2018: "O le faamata'u i Sekema."  
Gossamer threads**

**Tusi Faitau:** Hosea 6:1-6.

**Matua (f4):***Efaraima e, se a ea se mea ou te faia ia te 'oe? Iuta e, se a ea se mea ou te faia ia te 'oe? Aua ua pei o le puao i le taeao la outou amio lelei, e pei o le sau foi i le vave ao ona mavae atu.*

Ou te lē o mautinoa pe sa iai se taeao po na e savali ane ai i fafo mai lo outou fale, ma vaavaai i se ofaga o le pogāleveleve. E masani ona 'ou vaavaai i ai i le faitoto'a u'amea i lo'o i fafo o lo matou fale.

E ma'eu le matagofie o le lalagaina o le 'upega, ma le feilafi o le suavai o loo pi'ipi'i i lau o le 'upega ona o le susū i le taeao po---a o'o ina mālūlū tele, ona malō lea ua pei o ni poloka aisa e foliga manaia. Peitai ane, a o'o ina susulu mai le lā i le taeao, ona liu suāvai lea ma ua tu'ua na o le 'upega---o le 'auala lea e maua ai mea'ai e ola ai, e le afaina pe i ai se isi ona aogā.

O le ata iloa gata lē nā o lo'o ta'oto i le tusi faitau o le aso lenei: o le ata muamua lava, o tagata Israelu ma la latou tali i perofetaga a Hosea. Ua iloa la latou agasala, ma ua latou iloa foi le poloaiga a le Atua i lana faaolataga ma le lavea'iina, o le faailoga o se amataga fou.

O le Atua na te silafia mea uma i le ao atoa ma le po, e atoatoa lona faatasi mai i so'o se tau ma so'o se vaitaimi; e le fesiligia lana tausiga i lana fanau. Peitai, e faapei o le lā ma lona susulu mai i le 'au pogaleveleve, e faapena foi le 'ave 'esea o le poloaiga mo se amataga fou, a e silasila mai fofoga o le Atua i ona lava tagata.

E lē fia silasila mai fofoga o le Atua i taulaga e faia ma le agasala. A e sa'ili mai le Alii i e ua faamaoni i le faamamaina ma le faafouina o latou loto: "auā o le alofa ou te loto i ai, a e lē o le taulaga." (f.6).

Ua faamanatu mai ia te a'u le faata'oto i le lūlū-saito, o lo'o tusia i le Mataio 13, o fatu la'au na lūlū i luga o le fanua e papa. Sa vave ona tutupu ma ola fatu laau, peitai, na vave foi ona pepē auā e leai se palapala lelei e ola ai; e le'i maua e fatu laau se malosi e ola ai pea ma tupu pe a susulu mai le 'a'asa o tofotofoga ma faaososoga a le alii o le lalolagi.

Pe faapefea ona tatou iloa o a tatou ta'utinoga, e faavae mai i se lagona ua tonu ma moni ona o le alofa faale-Atua?

**Tatalo:** E susulu mai pea le lā, e liu suāvai foi le sau o le taeao; peitai, ua na o le Agaga o le Atua e mafai ona fafagaina lo tatou vaivai i taimi tatou te sa'ili atu ai i le Keriso Toe-Tu. **Amene.**

**Mafaufauga Loloto:** Su'e ma sa'ili i le tusi pese, o loo tusia ai lenei pese: "Will Your Anchor Hold", na fatuina e Priscilla Jane Owens (1829-1907).

**ASO TOONA'I, Setema 8, 2018: "E vevela aua nei tago i ai?"**

**Too hot to handle?**

**Tusi Faitau:** Hosea 7:1-10.

**Matua (f7):** *Ua 'a'asa i latou uma e pei o se ogāumu; ua latou faaumatia o latou alii faamasino; ua pa'u'ū o latou tupu uma, e leai so latou e vala'au ia te a'u.*

O la'u galuega muamua lava i totonu o lo matou nu'u a o o'u talavou, "Galue i Aso Toonai", ou te galue fesoasoani i le fale-falaoa. Ou te taunuu ane i taeao uma, ua leva ona galue le alii palu-falaoa o Andy, i le paluina o falaoa ma tao faavela, e i ai foi ma tonati ma keke e mana'omia mo aso ta'itasi. E masani lava, e tataua ona matou fesoasoani ia te ia i le 'ave'esea o 'apa-tao-falaoa vevela mai le ogaumu. O lenei ituaiga o galuega, e tataua ona i ai ni totini alofilima e puipuia ai le 'a'asa o le ogaumu. E mana'omia le tagata matatiotio ma fa'aaoga lelei le mafaufau---aua e mu pe a faatamala.

I ona po o le perofeta o Hosea, sa fausia ogauma e faalāpotopoto, a e o le pito i lalo e tafu ai le afi. O foliga o falaoa-vela e salafalafa, a e tu'u i luga o 'apa vevela ma faata'atia i le avanoa ua saunia lelei.

O le paluga o falaoa e tataua ona faata'atia lelei ina ia vela ona itu uma. Peitai, o lo'o tusia e J.B. Phillips i lana tusi e faatatau i Perofeta e To'afa: "O Efaraima ua vela itu-tasi---e vela le itu e tasi, a e le'i vela le isi itu." (1963, itulau 40). O lenei tala faatusa, ua iloa ai le loto naunau o Efaraima (Isaraelu) ua mumu pei se afi, peitai, o lo'o mamao lava lo latou va feagai ma le Atua ona o a latou amio leaga.

Ua faatusa lenei ituaiga paluga o le falaoa, e ui ua i ai le fefete, a e lē o foliga lelei mai; o lona uiga ua fāoa (ave'eseina) le malosi o Isaraelu, a e latou te lē o iloa. E lē taumate ua i ai lo latou tupu, a e o le faalavelave, e le'i filifilia o ia e le Atua, a e leai lava se tasi o i latou ua valaau atu i le Atua mo se fesoasoani.

O le a la se tulaga mo Hosea ma Isaraelu i le lumana'i? O le a se uiga faatatau o lenei tala? O le vaiaso o i luma, tatou te feagai pea ma matagi sousou o le olaga.

**Tatalo:** E ui ina fesoua'iina ma aafia i matou i puapuaga ma faigata o le olaga nei, le Alii e, matou te faatalitali pea i lou fetalai mai matou te sao ai. **Amene.**

**Mafaufauga Loloto:** E faapefea ona avea le tagata Kerisiano e faapei o le fefete i le paluga o le falaoa vela? I e ua latou mafuta faatasi?

## Hosea

### 2 Totoina ma selesele – 2 Sowing and reaping

Saunia apoapoa'iga: Pevisé Leo

**ASO SA, Setema 9, 2018: “Ua selesele le matagi.”**

**Reaping the whirlwind**

**Tusi Faitau: Hosea 8:7-14.**

**Matua (f7a):***Na latou luluina le matagi, o le mea lea latou te selesele mai ai le afā....*

“O le po’u e i’u ina papala,” o le alaga’upu faa-Samoa, o lona uiga: “O sina manu’a itiiti e o’o ina faigatā ona pē!” So’o se mea tatou te faia, e i ai lona taunu’uga. O mea lelei po’o mea leaga tatou te faia i le olaga lenei, so’o se faatinoga e i ai lava lona taunuuga. A e o le i’uga, atonu e sili atu nai le mea sa mafaufauina, e faapei o le afā e sili le malosi nai le savili.

Ua lafoa’i e Isaraelu lo latou Atua, o le punāvai o le ola, a ua tulimata’i i manuia mai ia Paala. Na lapata’i Hosea o agasala ua latou faia i lea taimi ma le taimi, ua faapei o savili e agiagi solo mai i lea taimi, ma lea foi taimi. Ua galo le agasala ua faia, e faapei lava ona lē manatua le savili lea sa agi taluai.

Peitai, e auina mai e le Atua le faasalaga i so’o se taimi, ae a o’o mai, e faalogoina e peiseai o se afa, o le malosi na te faaleagaina uma fua o laau ua tatau mo le seleselega, o laau toto ma soo se mea sa i ai ua faaleagaina lava. I se isi faa’upuga, ua faafesaga’i ma faigata e sili nai lo tatou malosi.

A o aga’i atu pea la tatou faitau i le i’uga o le galuega faaperofeta a Hosea i lenei vaiaso, ‘aua lava nei galo, o le Atua o le punavai o le alofa na tamaoiga ai Hosea---o le alofa e tumau e le mavae.

**Tatalo:** Le Atua alofa e, se'i fesoasoani mai i lou alofa a e lē o lou to'asā. Se ia faamamā mai ia matou agasala, ma ia lavea'i mai i afā o le olaga nei. **Amene.**

**ASO GAFUA, Setema 10, 2018: “O le Alii o le ola.” Lord of life Tusi Faitau: Hosea 9:10-17.**

**Matua (f.13):***Ua totoina Efaraima i le mea matagofie, faapei ona ou iloa o Turo; a o Efaraima ua lē ta'ita'iina atu lana fanau i le fasioti tagata.*

Ou te manatua pea lo'u tuputupu a'e i Samoa i le fitu-sefulu (1970's). E lē galo le laufanua lanu lau'ava e si'osi'omia i le sami lanu-moana. E ola ane i totonu o le nuu ma fagogota i le aloalo, a e maise le galulue i faato'aga. E tumau le tau mafanafana ma le savili agi malu i aso faiso'o o le tausaga, e leai se faalavelave e faalogoina. E feagai mātua ma le va'ava'aiga o fanau i ala e tatau ma manuia ai, ina ia fai ma fanau tausa'afia i le vaai.

O a'oa'iga ma faatonuga e i ai taimi e faamalosi ai, a e le o se faasauā. Ua apoapoa'i mai le Poto o Solomona: “A'oa'o ia i le tama e tusa ma lona ala; a o'o ina toeaina lava o ia, e lē te'a 'ese ai.” (Faataoto 22:6).

O le a'oa'iga ma faatonuga o se vaega o foafoaga a le Atua. O le manatu ua ia Hosea, o le nuu o Isaraelu na fouvale ma lē a'oa'iina i le tatau ona auuuna ma usiusita'i i le Atua. Ua latou liliu'ese ma tapua'i ia Paala. Ua fesiligia e Hosea se ola e maua ia Paala, 'aua e leai se ola o i ai.

O ē fananau mai e tu'uina atu ina ia fasiotia. O Isaraelu e faapei o ma'itaga e faaleaogaina ma susu e lē susuina, ua na o le faamata'u i le leai o se ola e maua i folafolaga a Paala. O le uiga o Paala, “e leai se ola o i ai”, peitai, o IEOVA o le Alii o le foafoaga, e maua ia te ia le ola.

E le o le faamoemoe i le Atua o le faamasinoga; e finagalo le Atua i le loto ua salamo ma le faaleleiga. Ua finagalo le Atua ia le uia le to'ilalo ma le olapalaina ina ua fo'i mai ia te ia. Ua faamanatu mai i lenei aso, e i ai pea le avanoa e toe foi atu ai i le Alii mo ana faamanuiaga, a e le o le ave a e fai ma taunuuga o lona to'asa.

**Tatalo:** Le Atua agalelei e, o lou alofa tunoa ua faafouina ai le lalolagi. Ua matou tatalo ina ia a'oa'iina i matou i lou alofa, auu lava ne'i o matou pa'u'ū atu i le leaga. **Amene.**

**Mafaufauga Loloto:** O a nisi 'atua' o le tu'inanau o lo'o faaosoosoina 'oe, ina ia 'ave'esea 'oe mai le Atua o le ola?

**ASO LUA, Setema 11, 2018: “Tu’u ai pea ia timu.” Let it rain**

**Tusi Faitau: Hosea 10:1-15.**

**Matua (f.12):** *Ia outou lūlū saito mo outou ma le amiotonu, ia outou selesele mai ma le amio lelei; ia outou suatia lo outou fanua vaoā; auā ua o’o i ona po e saili atu ai i le Alii, seia afio mai o ia, ma faatotō ifo le amiotonu i luga ia te outou.*

Ou te manatua pea lo’u va’ava’ai atu a o galue lo’u tamā i le ma’umaga ma le togāfa’i i Samoa. Ou te manatua foi le lagona fiafia ina ua oo i le taimi ua lelei le ma’umaga o talo ma fa’i ua matutua, o se faamalosi loto lea i le ola galulue e pei ona faia e lo’u tamā ma o’u uso matutua. O lo’u tamā o se faamatua i le fai faato’aga lelei, ma o le tagata masani i le ola galue, o ia foi lea ua na iloa lelei le taimi e tatau ai ona toto le fanua aua le fesuaiga o le tau.

O aso o le faamalumalu mai o ao o le lagi, a e maise lava i timuga, o taimi lelei ia mo faato’aga, a e o le timuga ua ta’ua i le Tusi Paia, ua faatatau lea i le totoifo o faamanuiaga a le Atua, o ia foi na te ‘ave’esea ia faamanuiaga mai le tagata.

O aso o le to’a filemu ua mavae atu ia, a ua oo i ona po o Efaraima e si’i a’e avega i lona ua (neck). O taimi ia e saili atu ai i le Alii, ia faia le amiotonu ina ia fua mai le agalelei ma le alofa. Ona liligi ifo lea o faamanuiaga faapei o timuga i ona luga.

E faapea foi i o tatou tausaga, ia naunau o tatou loto i Afioga a le Alii, faapea i le mafutaga faatasi ma le Agaga Paia ia tatou faia le amiotonu. Ua molimau Paulo: “A ua nei tatou fapalapala i le amio lelei; aua o ona po e tatau ai tatou te selesele mai ai, pe afai tatou te lē faavaivai.” (Kalatia 6:9).

O le Agaga Paia na te ta’ita’iina i tatou ina ia lulu saito mo le faato’aga a le Atua, ma ia tatou va’ava’ai a’e i le lagi i le faamaligi ifo o faamanuiaga i a tatou faato’aga. O le mea lea, ia tatou totōina le fatu o le amiotonu!

**Tatalo:** Le Atua alofa e, ua na o lau afio e maua lo matou faapaiaina. Liligi ifo lou alofa ia i matou faapea ma galuega uma o lau foafoaga.  
**Amene.**

**Mafaufauga Loloto:** Pe e te iloa ni lauelele e lē lelei e tatau ona e fesoasoani i ai?

**ASO LULU, Setema 12, 2018: “Ua toe amata.” Beginning again**

**Tusi Faitau: Hosea 11:1-11.**

**Matua (ff.3-4):** *Na ou a’oa’oina Efaraima ia savali, o loo o tauta’ita’i ia te i latou i o latou lima; a ua le iloa e i latou ona ou faamaloloina o i*

*latou. Na ou tosina i latou i maea a le tagata, o maea alofa lava; na ou i ai ia te i latou e pei o e sii a'e le amo ai o latoiu 'aulamu, na a'u tu'uina atu foi mea e 'ai ia te i latou.*

Sa ou feālua'i i lea atunuu ma lea atunuu, mai i le tasi 'a'ai i le isi 'a'ai, a e maise foi o fale eseese e ulufale i ai i le 35 tausaga ua mavae. O le faatinoina o le fesuisuia'i ma toe amata i le isi nofoaga fou, e i ai ma le suiga o le 'ea, e faaopoopo ma le masani i isi tagata fou e o'o lava i le suiga o le si'osi'omaga.

O le mata'upu e sefulu-tasi, o lo'o i ai ni faamatalaga e uiga 'ese e tusa ma le perofetaga a Hosea. O loo molimaaina ai le loloto o le fesootaiga e ala i le mana o le Atua, i le mafutaga faatasi ma ona tagata. O mata'upu o loo i le amataga, o le faatasi mai o le Atua i nisi taimi, o le Atua e to'asa, o le Atua e faamasinoga ma faasala. Peitai, ua suia lea faasologa i le mata'upu leni. E ui lava o loo faaalua le alofa faatino i le va feagai o mātua-ma-fanau, a e o lo'o lilo pea ia Isaraelu lea uiga. E finagalo le Atua ia toe fuata'i, aua o le Atua e alofa i ana galuega na fai. O le Atua o le alofa lava ia, e silisili 'ese foi lona alofa i ona tagata. E mafai lava ona faato'ilalo e le Atua i ona tagata; peitai, e lē o lona finagalo lea. Na iloa e Hosea le loloto o le finagalo o le Alii, o le finagalo ina ia faafouina. Atonu e finagalo le Atua ia faamasino Isaraelu, ua lē o le nā, ua finagalo le Atua ia toe amata.

O se tasi o a'u uō faife'au ua atoa nei le 62 tausaga i le aso leni, ua lē o toe mamao ona penisione lea i le galuega. E sagisagi talatalanoa mai lava i se isi amataga fou e le o toe mamao; o le a faamuta le isi vaega, a e alo atu mo le isi vaega o lona olaga. Pe afai e amata faatasi ma le Alii, o le Alii lava e le suia mai le amataga o mea uma: o le Alii alofa.

**Tatalo:** Le Alii e, faafetai ona o lou alofa tunoa i le tagata agasala; foai mai le malamalama matou te sa'ili ai pea i se amataga fou i le mafutaga faatasi ma lau Afio, auā o oe lava o lo matou Atua ma le Faaola. **Amene.**

**Mafaufauga Loloto:** O lē fea mafutaga sa faaletonu, o lea ua toe amata faalelei? Po'o faapefea lau mafutaga ma lou Atua?

**ASO TOFI, Setema 13, 2018: "Ia tago i le mulivae."**

**Grasping the heel**

**Tusi Faitau: Hosea 12:2-9.**

**Matua (ff.2-3):** *Ua i le Alii le finauga ma luta, na te faasalaina Iakopo e tusa ma ana amio; na te tau'i atu ia te ia e tusa ma ana galuega. Na ia*

*tago i le mulivae o lona uso a o i ai i le manava; o lona malosi na ia mālō ai i le Atua.*

E i ai le alaga'upu faa-Samoa, e faapea: "E so'o le Moasope i le Moasope." O le 'Moasope', o le moa e i ai fulumoa faaopoopo i le tumutumu o lona ulu, ua na o le Moasope e fofoa mai ai se isi foi Moasope. E faigofie lenei taofi auā e tele ina foliga ia fanau i o latou mātua, i le tino po o le mafaufau.

Se'i toe sui le faamatalaga, e pei o lenei. O le upu Samoa, 'atalii', e fausia mai i upu e lua: (i) o le "ata" o lona uiga o le faatusa po'o foliga; (ii) o le upu "alii" o lona uiga o le tane (man). O lona uiga, "atalii" o le faatusa po o foliga o le tane (man); e faataua lea i le tamā.

Ua faatusa e Hosea ia Iakopo i lona tupu'aga faale-tagata. O Iakopo sa tago i le mulivae o Esau a o i le manava o le tinā, o le manatu, ia na maua faamanuiaga o le ulumatua (Kenese 25:22-26); o ona tupu'aga na fulitua i le poloa'iga a le Atua, a ua mulimuli ma tapua'i i atua faapaupau ma pulega a malo 'ese. Ua iloa nei, o lona malosi, na manumālō ai Iakopo i le finau i le Atua mo se faamanuiaga (Kenese 32:24-29); a o ona tupu'aga sa fai ma pologa i atua faapaupau. Ua faia le tagata i le faatusa o le Atua; o i tatou o lana fanau. O i tatou lava. so'o le tulaga tatou te i ai, e tataua ona atagia foliga o le PULE na faia i tatou. Pe a tatou lē mulimuli i ala o le amiotonu ma le finagalo o le Atua, o le tau i o le faasalaga.

O Iesu lava o le Alo Pele o le Atua le Tamā, ia tatou mulimuli i ona tulaga 'a'ao. E leai so tatou malosi e fai ai i tatou ma fanau-moni, vagana ua tatou tago atu i tulaga 'a'ao o le satauro o Keriso, o le auala lea e tasi tatou te maua ai faamanuiaga uma mai le Atua le Tamā.

**Tatalo:** Le Atua paia e, fesoasoani mai ia avea i matou ma au fanau moni. Ia matou maua le malosi ma le faatuatua e atagia ai le paia ma le mamalu o au afioga ma au galuega mamana. **Amene.**

**Mafaufauga Loloto:** O le a le ituaiga o tagata e i ai Iakopo i le tala ua tusia i le Kenese? O le a le ituaiga faata'ita'iga e a'oa'oina ai i tatou i le faatuatua?

**ASO FARAILE, Setema 14, 2018: "Ia filifili ma le amiotonu!"**  
**Choose wisely!**

**Tusi Faitau: Hosea 13:1-16**

**Matua (ff.5-6):** *Na ou iloa 'oe i le vao, o le nuu naumati. E pei ona fagaina o i latou, ua faapea ona ma'o'ona o i latou; sa ma'o'ona i latou, ona faamaualulugaina lea o latou loto; o le mea lea ua latou faagalogalo ai ia te a'u.*



E tele filifiliga i le olaga lenei. O le a le taimi ‘ou te ala mai ai? O le a se mea’ai mo lenei aso? O ai ou te faauō i ai? O fea ou te alu i ai pe a ‘ave o’u aso tafao? E le uma fesili, a e fai pea lava. Ua avea i tatou ma faigaluega o filifiliga e tele i aso ta’itasi. A e tofu le filifiliga ma lona taunu’uga.

E i ai le alaga’upu faa-Samoa, e faapea: “Ua ‘ai ‘ulu, tuana’i ta’isi.” O lona uiga, a o’o ina ‘ai le fuata ‘ulu (breadfruit), ona galo loa lea o ‘ta’isi’. O le ‘ta’isi’, o le kuka faa-Samoa o le talo e affi lelei i laufa’i ma tao i le umu Samoa. O le fuata ‘ulu e selesele i le va i taimi fuafuaina o le tausaga, a leai se fuata ‘ulu ona fiafia lea e kuka ta’isi talo; a e a o’o loa i aso o le fuata ‘ulu, faagalologo loa i le ta’isi.

O le faauigaina o lenei alaga’upu, e faapea: “E fiafia e talia fesoasoani mai tagata i taimi faigata, a e galo pe a o’o ina tele le tamaoiga ua maua.” E faapea ona faia e tagata o le Alii. A fetaia’i ma tigā ma puapuaga, ona fiafia lea e talia le alofa ma le agalelei o le Atua. A maua le manuia ma tele le tamaoiga, ona galo lea o le ta’ita’iga manuia a le Alii le Atua.

Peitai, o lo tatou faitau so’o i afioga tusia a le Atua, o le faamanatu mai pea lea o le faamasinoga a le Atua, e tele ina mulimuli mai ai ma le leo o le alofa, o le faailoga e i ai pea le faamoemoe o i luma. Na faagalo e Isaraelu lo latou Atua, a ua tapua’i i tupua ma atua faapaupau, ona faamasinoina ai lea e tusa ma le feagaiga na osia.

Na i ai le filifiliga mo Isaraelu, auā sa filifili ma le lē tonu. Peitai o lenei, ua tuuina mai le aso fou e tua i ai le faamoemoe o mo’omo’oga manuia o le lumana’i. A e o lona faataunuaina, e a o ona filifili i le faautauta ma le potu.

**Tatalo:** Le Alii alofa e, faafetai ona o le sa’olotoga i lou alofa-fua mai. Fesoasoani mai ia matou filifili ma le tonu, ina ia fai mo i matou le tofi i lou malo e faavavau. **Amene.**

**Mafaufauga Loloto:** Pe faapefea ona e filifili i lou ola i le aso nei? (Teuteronomie 30:15-20).

**ASO TOONAI, Setema 15, 2018: “E manumālō le alofa.”**

**A winning love**

**Tusi Faitau: Hosea 14:1-9.**

**Matua (f.7):** *O i latou o e nonofo i lalo ifo o lona paolo, e toe ola mai i latou e pei o saito, e fua mai e pei o le vine; e ta’ua o ia e pei o le uaina o Lapanona.*

E i ai le tala faa-Samoa mai anamuā e faatatau i le tupu’aga o le laau o le Niu. Na i ai se tama’ita’i e igoa ia Sina sa feoa’i ma le i’a o le Tuna. I

taimi o le tau afiafi a o susulu mai le masina, la te fe'ausi lava ma talatalanoa. Ua ta'u atu e Tuna ia Sina e i ai aso na avea ai o ia ma aloali'i (prince). Ua faasolosolo mai pea aso, ua tupu ma lapo'a Tuna, ua tupu foi lona alofa ia Sina. Ua o'o ina lagona le fefe ia Sina, ona solasola ai lea mai i lea nu'u ma lea nu'u. A e ua tau mulimuli ai foi ma Tuna o fea lava e alu i ai. Ona ta'u ai lea e Sina i le uso o lona tamā le mea ua tupu, ona alu ane lea ua faasagatau ia Tuna.

Na tugā le manu'a i le ulu o Tuna i le finauga. O lana toe manava lava, na ia faapea atu ai ia Sina, a 'uma lo'u ola ia tanu lo'u ulu e fai ma faamanatu o lo'u alofa ia te 'oe, e i ai le aso e tupu a'e ai le la'au ola, o lona fua e suamalie i le inu. E vaai foliga o Tuna i le fua o le laau, e lua mata ma le gutu. O le mea lea, o taimi uma e te inu ai (Sina) i le fua o le laau, o le faatinoga lava lea o lou kisi mai ia te a'u.

O lenei tala mai anamuā, ua atagia ai, "E manumālō le alofa" o le Atua, e faapei ona tusia e Hosea. O le alofa tau mulimuli lea o le Atua ia Isaraelu, so'o se mea e alu i ai na te tausia, ta'ita'i ma faatonu ia te i latou. Pe afai latou te lē faalogo ma lē usiusita'i, o le Atua e fetalai mai i faatinoga i mea faigata faale-natura. E ui i lea, latou te filifili lava e faagalo le alofa, a e tumau pea le alofa o le Atua.

So'o se a'oa'iga lava, e i ai faatasi ma le faamoemoe lelei. Na auina mai e le Atua lona Alo Pele i le lalolagi ia lavea'iina le tagata agasala. E le o le laau o le Niu, a e o le satauro o le faailoga o le Atua alofa. A o tatou mafaufau ma manatunatu i le perofeta o Hosea i lenei vaiaso, 'aua lava ne'i galo:, "E manumālō le alofa" o le Atua: O le alofa na te le tu'una i tatou i le leaga o le agasala.

**Tatalo:** Le Atua alofa e, faafetai ona o le manumālō o lou alofa, o lea ua manumālō faatasi ai nai lo matou vaivai ma le lē atoatoa. **Amene.**

**Mafaufauga Loloto:** E faapefea ona e iloa ua manumālō le alofa o le Atua i lou olaga?

**Ia faatulaga tutusa galuega o le olaga.**  
**1. Galue ma Mālōlō – 1. Balancing work and life**  
[Apoapoaiga saunia: Dafne Plou]

**ASO SA, Setema 16, 2018: "Galue ma Mālōlō." Work and rest**  
**Tusi Faitau: Kenese 2:2-3, 15.**

**Matua (f.3):** *Ona faamanuia atu lea e le Atua i le aso fitu, ma na faasaina ai; auā na malolo ai o ia i lana galuega uma lava na faia e le Atua ma na saunia.*

“O lo’u alii pule foi lea ua toe sa’ili mai i faamatalaga e fia maua vave lava.” O se faatigā ulu le na na aafia ai lea Aso Toonai matagofie. E o’o foi i afiafi o Aso Sa ma le matamata i polokalama faasolo a le TV, e faatiga taliga lava le tatagi so’o o le telefoni. E faapena foi i alii faifeau a o lauga mai ma folafola le finagalo o le Atua, e talosaga mai lava i le ‘aulotu se’i taofi le tatagi o telefoni feavea’i.

Faamata o le faailoga lenei ua tatou naunau tele e vaavaai i faaata (screens)? Pe lē o se tasi ‘ea lenei o le nofopologa faalēiloga ua aafia ai i tatou? E foliga ua leai se manatu se’i titina le masini, a e faaavanoa le mafaufau i nisi tulaga taua o le soifuaga ua si’omia ai i lea taimi ma lea taimi. Ou te faalogo so’o lava i faa’upuga faapea, “E mafai ona galo le ‘ato tupe i le fale, a e ‘aua lava ne’i galo le telefoni feavea’i (cellphone).”

A ou vaavaai solo i totonu o lo’u potu faigaluega, e lima (5) masini o loo iloa atu ai lo’u ata: masini fai kopi, komipiuta feavea’i, faamanatu o faasilasilaga, masina tusitusi, ma le telefoni feavea’i. O le fesili: E mafai ‘ea ona ‘ou faagalo teisi i ia mea? Atonu e le ‘umi se taimi....

O le a tonu lava le faamoemoe e tatau ai ona mafaufau i le Aso Sapatu o lona fitu ai lea o aso? O le faamoemoe tu totonu o a’oa’oga mai le Tusi Paia, ua faatatau lea i le ola galue ma le mālōlō. Pe lē mafai ‘ea ona toe faaolaola faamanuiaga o lenei aso? Se’i tatou amata ia le vaiaso fou i le mana’omia tele o lenei mata’upu!

**Tatalo:** Tatala mai ia o matou mata ma le faalogo i o matou taliga, le Atua e, i suiga fou o le lalolagi ua faafeagai ma o matou tupulaga. Ia faaolaola i o matou loto ma agaga le taua o le mafutaga vavalalata ma o matou uso a tua’oi, ona o Keriso Iesu lo matou Alii. **Amene.**

**ASO GAFUA, Setema 17, 2018: “Ua faaleagaina le fanua.”**

**Cursed is the ground**

**Tusi Faitau: Kenese 3:17-19.**

**Matua (f.17b):** *... O le mea lea ua malaia ai le laueleele ona o ‘oe; e te ‘ai ai ma le tiga i aso uma o lou ola.*

O le tinā o lo’u tinā e faamanatu mai pea ia te a’u, e faapea: O aso a o teine talavou, e lē mafai ona faatagaina e le tinā-matua lana fanau teine ia savavali i le mūgālā e aunoa ma se faamalulu. Na soifua mai lenei tinā i le aai o Montevideo, Uruguay, e nofo tu latalata i le matafaga. O le o ane o teine e tafafao i le matafaga, e lē o se tulaga faigofie.

E mana'omia ona la'e i 'ofu lima 'u'umi ma 'ofutino, ia fai ni pulou ma puipui le velasia o le ulu; pe a fai foi e savavali pe nonofo, e tatau lava ona faamalumu mai le mūgālā. E lē mana'omia le susulu mai o le la ma aafia ai le pa'u o le tino! "Pe aiseā, Tina?" o la latou fesili lea. "Taluai o lo tatou aiga, o le aiga o teine, 'aua ne'i faatusaina ma fefiloi ma teine o le nu'u."

Ua faaleagaina le laueleele ona o uiga lē pulea ma amioga e lē tatau. E to'atele ua faauigaina nei upu e peiseai o se aga'ese ua leaga ai tupulaga fai mai, ua faapei o se naifi ua na faamanu'aina ma faaleagaina le laueleele (faatama'ia, filogia, ma faaleaga i le siosiomaga), e le gata i lea, ua 'ave'esea ai foi se isi vaega tele o tagata soifua.

O ulua'i tagata su'esu'e mai Sepania na mua'i taunuu ma nonofo i Amerika, ua manatu afai o le a latou galueaiina le laueleele, e o'o ina 'ave'esea lo latou taua ma mamalu. O le mea ua latou faia, ua faanofopologa i tagata moni o le laueleele ma faafaigaluega i galuega mamafa. A e pe lē mafaia 'ea ona toe faalelei faatinoga ma mea sa faia i le laueleele, ae maise le manatu faatauva'a i isi tagata, ina ia maua ai se seleselega faamoemoeina e lelei?

E le'i mamao teisi, o se tasi vaega o tupulaga talavou i lo matou aiga, ua faapea mai: Ua matou fia se'e 'ese mai le taulaga, a e nonofo i tua atu o le aai, se'i o matou galulue ma atia'e le laueleele ma fiafia ai i fua o le laufanua. Ua latou mafafau i le galulue i faato'aga e aunoa ma le faaogaina o vailaau ma masini faanei onapo.

O se tulaga lelei pe a tatou galulue ma selesele e aunoa ma le faailoga tagata, a ia ola ma mafuta faatasi i le fealofani e ono tupu ai le fiafia i le to'atele!

**Tatalo:** Le Atua o le foafoaga, faafetai ona o le tele o fuata matagofie i le fanua. Ia fesoasoani mai ina ia matou iloa ona tausii lelei i au galuega o le foafoaga. Ia faatupu i o matou lotu le fiafia e faatino ma mulimuli i auala e faaleleia atili ai lo matou siosiomaga. **Amene.**

**Mafaufauga Loloto:** O a ni faatinoga tau faato'aga ua masani ai lou atunuu? Pe i ai se fuafuaga masani i la outou 'aulotu e faatatau i seleselega o fua o faato'aga?

**ASO LUA, Setema 18, 2018: "Ola pologa ma le ola sa'oloto."**

**Slavery and solidarity**

**Tusi Faitau: Esoto 5:1-18.**

**Matua (f.9):***Ia mamafa le galuega i tagata na, ma ia latou faia lava; aua foi nei latou faalogo i upu pepelo.*

Ua le fiafia tagata o loo nonofo tua'oi, ona latou te vaavaai pea i se vaega o tagata feoa'i, e o mai mai isi atunuu. O aso uma o ni vaiaso, e savavali faataamilomilo i le fanua, e fai vaega e ta'ito'alua pe sili atu foi. E ulufafo mai i totonu o se fale gaosi mea ua tele tausaga e le faaagaina. E feoa'i gugu e leai se tautala, e faapea lava pe a fetai'a'i ma nisi.

Na ou fesili ifo i lo'u loto, O le a 'ea lenei mea ua tupu? O le tasi aso, na savali ane i le auala tele le tagata'ese e faatau mea'ai suamalie i si tama'i faleoloa. "O ai 'ea 'oe? O le a le mea lea e tupu i totonu o le fale tuai gaosi mea?" o la'u fesili atu lea. "Matou te nonofo ai ma faigaluega ai i le fale." o le tali mai lea. "E tele itula ma 'umi le taimi matou te galulue ai, a e faaavanoa sina taimi puupuu e ulufafo mai ai mo sina tama'i savalivali, ua na o sina faamalosi tino itiiti lava."

E faapena tagata Isaraelu, e faapei o tagata faigaluega ma o latou lavalava e iloa atu lava le mamafa o a latou galuega. O ia ituaiga faiga mamafa ia, a e leaga mea e nonofo ai, a e maise mea'ai e le lelei, e o'o lava i o latou totogi e le o talafeagai ma le maua e mafaia ai ona faatino o latou aiā tatau. A e o lo'o vaavaai ma faalogo mai o latou tua'oi i le leai o so latou leo. Ua oo ina lotogatasi, ma faafesootai le ofisa o le malo mo se fesoasoani, ona tapunia ai lea o le fale gaosi mea, a e 'ave faapagota tagata e ona le kamupani ma tuu sa'oloto tagata faigaluega.

"Tuu mai ia o'u tagata e o," o le valaau atu lea i le Alii le Atua. Po'o fea lava o e i ai, afai o e vaai ma lagona, ua valaauina i tatou se'i tula'i e fesoasoani ona o e mafatia i le leai o se malosi e faatino ai o latou aiā tatau. Ia tatou faatinoina se avanoa e taofia ai le faasaua ma faiga le alofa o loo aafia ai se tasi vaega tele o le lalolagi ua le maua se sa'olotoga moni.

**Tatalo:** O le Atua o le Esoto, foai mai le lototoa matou te tetee atu ai i faiga faasaua e faapei o Farao i tagata o Isaraelu. Ia matou maua le avanoa e faatino ai o matou aiā tatau. **Amene.**

**Mafaufauga Loloto:** Saili ane po'o faapefea ona faafaigaluega tagata galulue i fale gaosi 'ie i lo outou atunuu, a e maise lava i atunuu ua lelei lo latou tamaoiga.

**ASO LULU, Setema 19, 2018: "O le Sapati i le aso nei."**

**Sabbath for today**

**Tusi Faitau: Esoto 31:12-17.**

**Matua (f.13b):** ...*Tou te tausi lava i o'u sapati, aua o le faailoga lea ia te a'u ma outou, e o'o ia outou tupulaga amul'i, ina ia iloa ai, o a'u nei o le Alii, o le faapaaaina outou.*

E faigata ona manatu i se sa'olotoga e maua i se aso e tasi ona o le tau'aveina o tiute i aso fai pea. E tele lava mea e fai e ui lava, e i ai le faaupuga i le taimi malolo: o faatauga i faleoloa, alu i le fale ta'alo, fonotaga ma e masani ma aiga, sa'ili ane polokalama i le TV sa misi i le vaiaso, sa'iliga ma su'esu'e i le fale-tusi, fe'au e faia i le aiga, kuka pe faamalulu mea'ai, talatalanoa ma le fanau e tusa ma a latou ta'aloga po'o le faailogaina o se aso fanau, alu i le lotu e tapua'i i le Atua, ma le anoano o isi lava mea e fia faia... E foliga ua misi i lenei auga tupulaga le manatu ane i le Sapati!

O le Sapati ua le na o se aso malolo ma toe faafouina le malosi, e pei ona faitauina i le Tusi Paia na faia e le Atua. A e aofia i le Sapati fuafuaga e tusa ma le finagalo o le Atua, ia filifili ona tagata e faailoa i ai faamanuiaga e maua i lea auga tupulaga ma lea auga tupulaga, pe afai latou te tumau i le faatuatua ma mulimuli i tulafono, a e maise ia tausia le aso ua faapaiaina ona o lona Suafa.

O i tatou ua talitonu ma faatuatua, ua valaauina ina ia tali atu, ia tausisi i le taimi ma ia faaolaola le ola faale-agaga ina ia tupu ai pea le faatuatua. A e faapefea ona tatou faatinoina lea tiute? Pe tatou te toe fausia 'ea nisi tulafono fou ma ni aiaiga fou ina ia faailoa mai ai le amio e a o ona tatou faia i le Sapati, e faapei ona tusia i le Tusi Paia?

Po'o le finagalo 'ea o le Atua ia tatou tausia le faatinoga o le Sapati i se faiga fou, ia tatou saili atu ini auala fou e faailoa ai lo tatou faatuatua, i le auuina atu i nisi, ma faasoa atu ai le moni o le alofa tunoa faapea ma le agalelei ua tausia ai i tatou? O le tausia o le Sapati o se faasinoga ia tatou tausia pea, a e le na o se aso e olioli ai ma faailoga le folafolaina o le tala lelei i se auala fou!

**Tatalo:** Le Alii o le Sapati, a'oa'o mai ia matou iloa ona faafouina lo matou faatuatua i a'oa'oga faale-agaga, ma ia matou folafola atu i le malamalama tonu e fausia ai manatu ma lagona o e ua le iloa lau Afio. **Amene.**

**Mafaufauga Loloto:** O fea e maua ai sau malologa ma toe faafouina lou malosi i lenei vaitaimi? E faapefea ona saunia 'oe mo lea faiga ma e faatinoina nei loa?

**ASO TOFI, Setema 20, 2018: "O le Iupeli ma le faamasinoga tonu." Jubilee and justice**

**Tusi Faitau: Levitiko 25:8-12.**

**Matua (f.10b):**...*ma tala'i ai le sa'olotoga i lo outou nuu i e nonofo ai uma lava.*

O le tau e to'u'ulu ai lau o laau i le 2016, na tupu ai se soligatulafono mata'utia i se tama talavou i Atenitina, e foliga ua sili atu lona ta'uvalea. O se faatinoga o le faamalosoteine, a o lona tino maliu ua lafoa'i e faapei o se lapisi. O e sa faaali taofi i luga o masini (twitter) na matua faailoa le loto ita, faanoanoa, ma faaali manatu e tatau ona faasala mamafa.

Na 'au faatasi faalapopotoga uma a tinā (tama'ita'i) i le atunuu, ina ia faatino se solo tete e pito to'atele. A e ia tatala i so'o se tagata ua lagona le sapaapaia o lenei faamoemoe. Na matua iloga lenei faatinoga i totonu o le taulaga, i aai tetele, ma le atunuu atoa. Na faasalalauina i le 'ea---#NotOneLess (#NiUnaMenos).

Sa faaoga le la'ei uliuli e faamanatu ai i latou uma na aafia i lenei ituaiga o soligatulafono---e to'atele ua maliliu i aiga, a e o le nofoaga e tatau ona saogalemu ai. A e faapefea la ona alagaina le sa'olotoga (Iupeli) i le nofoaga o lo'o tutupu ai sauaga, e le uma a e faifai pea?

Ina ua poloa'i le Atua ia Isaraelu ia faavae le tausaga o le Iupeli, sa manino lava le faasinoga i le ala e faatino ai. Ua o'o i ona po e tatau ai le faaolataga ma fausia le faamasinoga tonu i 'auala o fesootaiga filemu ai le tagata ma lona si'osi'omaga. Pe le o i tatou 'ea, o e ua soifua mai i lenei auga tupulaga, se'i mafaufau loloto i auala e faamanatu ai le tausaga faa-Iupeli? Taimi ia saogalemu ma maua le sa'olotoga mai sauaga faifai pea, ina ua maua le faamasinoga tonu ma le nofo filemu moni?

I le Levitiko, ua tatou maua ai le faasinoga manino o tulafono e ao ona mulimuli ai tagata o le Alii, ina ia ola ai ma le saogalemu i le fanua ua filifilia (25:18). O i tatou o tagata Kerisiano, ua valaauina ia tausia poloaiga a le Alii, ma ia taumafai e ta'ita'i o tatou nuu ma atunuu, ina ia maua faamanuiaga o le Iupeli e tagata uma.

Ia tatou ola i le mafutaga vavalala o le tasi i le isi, i le lagona ua ola saogalemu, ma ia iloa ona ava le tasi i le isi i le fesootaiga o le alofa. Ia ave le na ma faamanatu ua oo mai le Iupeli o faamanuiaga!

**Tatalo:** Se'i o tatou faalogo atu i le alaga o e ua mafatia ma sauaina: le Alii e, ia faamalosoteine mai i lau Ekalesia Kerisiano, ia matua naunau i le faamasinoga tonu, aua e faatino ai faamanuiaga o le Iupeli! A oo ina maua e tagata uma le ola sa'oloto ma ola saogalemu, o le a faigofie mea uma, e tupu foi le fiafia ma le olioli i au faamanuiaga. **Amene.**

**Mafaufaga Loloto:** Ia sapaapaia le faamaoni e tete e atu i le sauaina o tina (tama'ita'i), ma ia manatunatu i ni auala e fesoasoani ai i e ua mafatia ma puapuatia ona o soligatulafono.

**ASO FARAILE, Setema 21, 2018: “Vagana ua fausia e le Alii le fale.” Unless the Lord builds the house**

**Tusi Faitau: Salamo 127.**

**Matua (f.1a):***Afai e le atiina a’e e le Alii le fale, e galuhue fua i latou o e atiina a’e...*

I nai tausaga ua mavae, ina ua sauniunia le faasologa o sauniga mo le aso faamanatu, Aso Tatalo o le Lalolagi, na mafaufau ai Kerisiano Aferika i Saute, ia faaopoopo le faailoga o la latou aganuu e faataua ai le mafutaga faale-aiga ma le mafutaga faale-nuu: o le ipu u’amea tuu-teu e tolu ona vae. O lo latou manatu, o le ipu o le faailoga o le fafagaina, fesoota’iga ma le mafuta faatasi---o le ola ua faatamaoaigna.

Pe a fai e vaavaai i lenei faailoga i sona uiga faa-Kerisiano, ua manatu nei ta’ita’i, o le ola tapua’i i le Atua, e tolu auala o fesootaiga e pei o vae e tolu o le ipu, e fesoota’i atu le tagata tapua’i ma faalagolago i le Tolu-Tasi o le Atua. O le ipu ua faatumuina i ta’umafa lelei, pe a o’o ina tufatufa atu, o le faailoga lea ua valaauina ia mafuta i lona alofa tunoa, ia talitonu i upu o le tala lelei e faamalosi atili ai le talitonu ma faatuatua.

Pe a faalogologo la i ia faatinoga taua mai Aferika i Saute, ona manatu lea o le mafutaga a tinā i le faamanatuina o le, Aso Tatalo i le Lalolagi, i ekalesia ua faavae i faoa’a’ai o Buenos Aires, e leai ni a latou ipu u’amea tuu-teu i o latou fale, peitai, e iai isi auala e faatino ai mafutaga faale-aiga e talia le alofa tunoa o le Atua.

I le atunuu o Atenitina, e i ai le vai-inu ua ta’ua o le “mate”, o le vai ta’umafa e inu i taimi o mafutaga ma talatalanoaga, e fetufaa’i ai i se mafutaga mafana e le faatopetopeina. Ua le afaina lea po o se ipu u’amea tuu-teu i Aferika i Saute, po o se ipu “mate” foi i Atenitina, a o taimi faapena ua finagalo lo tatou Atua ia tatou fefaaso’a’i ai, ma le faamoemoe o le Agaga Paia e fusia o tatou lagona ia faatasi i le ola felagolagoma’i.

O le mafutaga feuluuluta’i o le tasi i le isi, ua finagalo lo tatou Atua e ‘auala atu ai le tala lelei, i loto ma finagalo, aua a aunoa ma le Agaga o le Atua, e le atoatoa lo tatou ola auauna ma tautua mo Keriso Iesu ma lana Ekalesia Kerisiano.

**Tatalo:** Le Atua alofa e, matou te faafetai i le musumusuga a le Agaga Paia, ua fai ma auala e faavae ai lo matou malosi e faatino mea lelei ma mea matagofie ua matou fiafia ai. Faafetai i le musumusuga a le Agaga Paia, ua fausia ai lo matou ola fia mafuta faatasi, e ala i lau Ekalesia Kerisiano. **Amene.**



**Mafaufauga Loloto:** O le a se faatusa o le faailoga mai Aferika i Saute, ipu u’amea tuu-teu, e mafai ona maua i aganuu a lou atunuu?

**ASO TO’ONA’I, Setema 22, 2018: “Tulemoe i le tifaga?”**

**Asleep at the screen?**

**Tusi Faitau: Faata’oto 6:6-11.**

**Matua (f.9):***Le paīē e, e te ta’oto se’ia afea? Se’i e tula’i afea ai lou moe?*

Ua amata ona popole alii/tama’ita’i foma’i i Atenitina i le lumana’i, ona ua faaopoopo le tino puputa o tamaiti. E tele itula ua na o le ta’oto’oto i nofoa faamalū, po o le moega foi ma matamata i ata i le TV, ma ‘ai mea’ai e maua tele ai le ga’o. A e o faapefea mātua? O le ata lava lea e tasi.

Ua tele tala ina ua faalē-fiafia i le tulaga ua i ai le olaga i nei ona po, ona ua faalagolago tele i le na o le tautala. A tupu mai se faalavelave, e muamua lava tapa i le telefoni, soso’o ma le vala’au i e masani. O isi ua faitio ma faapea ane, ua aga’i le lalolagi o tagata ina ola e faapei o ni “faatagata”, e feso’ota’i i masini e aunoa ma se mafaufau ini faatinoga, po o le mafaufau foi e feso’ota’i ma nisi tagata.

Po’o ua tatou ola ‘ea e pei oni ‘auivi mamate? E i ai ‘ea se tasi na te fafagu i tatou? E mafai ‘ea ona tatou folafola le tala lelei na o luga o le ‘ea, po’o na o TV? Ua na o ni mea-faigaluega e aogā. Peitai, na a’oa’o mai Iesu: Na lauga i le pulela’a i totonu o le sunako, na ‘auai ma mafuta faafesaga’i i le tino ma e sa ia fesoasoani i ai, asiasi, faamaloloina, ta’umamafa faatasi, nofo i le ‘auvai, talatalanoa, faalogologo, savali i le motu o tagata, ma faalogo atu i e ua mana’omia se fesoasoani, o lo’o vala’au mai i le fia ola.

O galuega na ia faia ua faailoa mai ai ni faatinoga e feso’ota’i ai ma le Atua, faafesaga’i ma tagata, i le faamasinoga tonu, le alofa ma le faamoemoe. Ia tatou tutula’i e mulimuli ia te ia (Iesu), vaai ma faalogo, atia’e ma faamaopoopo mafutaga ma isi i ala tatau ma lelei, ia atili olaola ai le iloa ona mafuta faatasi o le tasi i le isi i le alofa moni.

**Tatalo:** IESU e, fesoasoani mai ina ia matou iloa ona feso’otai atu i nisi o matou uso-a-tagata, ma ia mafai ona matou faatino uiga uma e pei ona e finagalo ai. Ia le na o le faalogo ma vaai, a e ia sili ona taua la matou faatinoga, ia tusa ma lou alofa. **Amene.**

**Mafaufauga Loloto:**O a ni faatinoga o loo faaaogaina i la outou Aulotu, e feso’otai ai i luga o ala ua saunia i le ‘ea? A e faapefea i le galuega tala’i, i ala e faatino ai ma mulimuli ai?

## Ia faatulaga tutusa galuega o le olaga

### 2. Galue – 2 Work

Apoapoaiga saunia: Erice Fairbrother

**ASO SA, Setema 23, 2018: “Valaauina e galue.” Called to work  
Tusi Faitau: Faata’oto 14:23-24.**

**Matua (f.23):***O i ai le mau i galuega uma; a o le upu a laugutu, na o le mativa e i’u i ai.*

O le solosolo lelei ma le manuia o le faalapotopotoga o tagata (nuu, atunuu, po o se malo), e faamoemoe tele i le galulue faatasi i le tamaoaiga ua maua, a e maise o le faaaogaina lelei o avanoa e galulue ai mo se tamaoaiga faasili.

O loo tusia i se tala-fatu, “The Grapes of Wriath”, ua faaalua ai le uiga o le faailoga-tagata sa aafia ai le ‘au aiga o Joad---ua le tuuina i ai se galuega ona o le faailoga-tagata. Ua aliali mai, ua le ona e leai ni agavaa, a e ona o le faailoga-tagata e tuu avanoa e saili ai se lumanai manuia o tagata uma.

E foliga faapea le tau’aveina o le galuega tala’i a le Alii, pe galue to’atasi po o le to’atele foi e pei o se ‘au aiga, o se faalapotopotoga tua po o se ekalesia, e avanoa tutusa tagata uma i le faatinoga---ia tala’i le sa’olotoga i le malo o le Atua i le lalolagi.

O lona uiga, ua tatou i ai i le lalolagi e faaaogaina ai le ola galulue e avanoa tutusa ai tagata uma, ia galulue felagolagoma’i ma faifai mea faatasi i le nofo filemu moni, e aunoa ma le faailoga-tagata i le tamaoaiga o loo mana’omia e tusa ma mana’oga faale-tagata---e tataua ona avanoa sa’oloto ai i tagata uma.

O le vaiaso lenei, o le a tatou faitau ma manatunatu ai i le poto faale-Atua ua tuuina mai i le tagata soifua, e le gata e maua ai le loto fiafia, a e o le faataunuina lava lea o le finagalo o le Atua na faia ai mea uma e oo lava i le tagata. O le olaga faale-Atua, o le olaga e galue: na te aumai le malosi e faaauuina ai pea i le faautauta tonu. Ua valaauina foi i tatou ta’ito’atasi ia maua lea faamanuiaga; e le gata i lea, ua valaauina i tatou ia faatino lea faamoemoe mo i tatou lava ma le lalolagi uma.

**Tatalo:**Le Alii e, ia e fesoasoani mai ia matou iloa ona galulue faatasi, i soo se auala, ina ia faataunuu ai ma ia faaauau pea---o i matou o auaua e faatinoina lou finagalo. **Amene.**

**ASO GAFUA, Setema 24, 2018: “O le finagalo o le Atua ia faafiafia tagata uma.” God’s business is for the happiness of all  
Tusi Faitau: Failauga 3:9-14.**

**Matua (ff.10,13):***Ua ou iloa le galuega ua tuuina mai e le Atua i tagata, latou te tigā ai. ... I le ma lea, ia ta’itasi le tagata ma ‘ai, ma*

*inu, ma fiafia i mea lelei i ana galuega uma; o le mea foa'iina mai lea e le Atua.*

Ua tatou faitau i lenei aso: o le ola galue o le mea-alofa, ua tuuina mai lea e fiafia ma faamalieina ai le olaga. O le saunia o mea'ai ta'umafa ina ia faateleina ma fiafia ai, o se tasi lea o vaega taua mai le amataga o le foafoaga mamana a le Atua. E foliga ua tatou le faatauaaina lea e faaauauina ai le ola, a e ua tatou galulue ia maua faafiafiaga o le olaga mai le foafoaga na faia e le Atua i le amataga.

Ua tatou faitau i le fuaiupu e sefulu (f.10), fai mai: "Ua ou iloa le galuega ua tuuina mai e le Atua i tagata, latou te tigā ai." Na ou ola mai i le ta'ita'iga faale-Tusi Paia ma mafutaga ma tagata-lolotu, o lo'u talitonuga a o talavou, e faapea: o le ola auuina mo le Alii e faatatau i galuega faale-lotu; ofo e tala'i atu le tala lelei, ola tatalo, lauga pe aveva ma ta'ita'i i mafutaga faale-lotu.

A e ina ua ou alu'ese mai o'u mātua, ma ola galue i galuega lautele, ona amata loa lea ona sui o lo'u talitonuga. Ua ou talitonu e i ai lava le Atua i soo se galuega e faia i aso ta'itasi mo le saunia o mea'ai e 'a'ai ai. O se faafiafiaga lea ma o le faamalieina foi lea i le ola ua foa'i mai, o se tasi lea o vaega o foafoaga mamana a le Atua mo le tagata.

I lenei taimi, o le "galuega" ua foa'i mai e le Atua mo a'u, ia 'ou tusitusi ma faamaumau faatasi ma nisi ua matou agavaa faatasi, ua fai lea ma o matou fiafiaga e galulue ai pea. O lenei agavaa e faatupu ai le fiafia e galue pea ma fiafia i ai, ma saga faateleina pea, se ia o'o ina vaeluaina le naunau i le "olaga faale-lalolagi" ma le "olaga faale-lotu." Ua aveva lenei mafaufauga ma faapogai ua ou manatu ai, o le "galuega" ua foa'i mai e le Atua, ua le tupu mai i le ituaiga o faatinoga lea e pei ona 'ou ta'ua i luga. O le finagalo o le Atua, e lē faapitoa i se to'atasi. O le finagalo o le Atua e mo tagata uma.

**Tatalo:** Le Atua e o le foafoaga, se ia e foa'i mai le malamalama matou te iloa tonu ai lau "galuega", e le gata ia te a'u a e faapea i e ua matou agavaa tutusa ina ia matou faia lou finagalo tonu. **Amene.**

**Mafaufauga Loloto:** Manatunatu ma mafaufau lelei, po o a ituaiga galuega e faatupuina le fiafia, e le gata ia te 'oe, a e faapea i ou tua'oi ma e ua outou faigaluega faatasi. O le a sou talitonuga e uiga i le "galuega" ua finagalo le Atua mo 'oe?

**ASO LUA, Setema 25, 2018: "O le galulue faatasi: o se faatinoga e taua."** Working together: a social priority

**Tusi Faitau: Failauga 4:6-12.**

**Matua (ff.9,12b):***E sili ona lelei o le to'alua i le to'atasi; aua ua ia te i laua le tauti lelei i la la galuega. ... O le maea foi e sātuaatolu e lē vave motusia.*

Na tusia i le nusipepa taluai nei se faamatalaga i se teine talavou e 17 tausaga na alu 'ese mai lona aiga. Sa na o ia e leai se na fesoasoani, ua mana'o e su'e sana galuega i le taulaga e ui ina le masani ai. Sa mana'o foi i se totonu e ititi ifo nai lo totonu faatulagaina. Ua na o le tasi le 'aiga i le aso ona o le faigaluega. Ona o le lē lava o lana 'ai na faatele ai ona fai ana mālōlōga pupu'u ina ia maua sona malosi e ola ai.

Sa faamoemoe i le Iuni a tagata faigaluega, a e ua vavae'ese tagata faigaluega ona o le solo-tete'e. E tupu so'o lava lea uiga e a'afia ai faalapotopotoga o Iuni a tagata faigaluega. O le mea lea, o le olaga faigaluega i galuega e faatuatuaina mo le tausaga lelei o le olaga, o se tulaga e tele ina manatu māmā i ai.

O le tusi faitau ua filifilia mo lenei aso, ua na faailoa mai o le ola galulue faatasi o se auala lea e mafai ai ona fesoasoani le tasi i le isi tagata, e lelei ai ma manuia ai tagata uma. I nai tausaga ua mavae atu nei, sa filifilia ai a'u e fai ma sui o le faalapotopotoga a le Iuni. O la matou tiute tau'ave, ia mafai ona tutū fa'atasi e tete'e atu i faiga e lē tusa ma feagaiga na osia mo le lelei ma le manuia o tagata uma. O le faatinoga lenei o le fuaitau ua tusia i le fuaiupu e sefulu (f.10) e faatatau i le ola felagolagoma'i--pe a fai ua vaivai le tasi, a e mafai ona lagolago mai le isi.

O le ata atoa lea o le faaa'oa'oga ua 'aumaia i le tala'iga o le Tala Lelei. Ua valaauina e Iesu ona so'o ia o mai ia te a'u (Iesu), faapotopoto faatasi i le mafutaga o e atia'e le mālō o le Atua i le lalolagi; o le mafutaga e ola faatasi ai ma ola felagolagoma'i o le tasi i le isi; o le mafutaga e lē manatu faatauva'a i e matitiva ma lē tagolima. O le faamoemoea taua lenei tatou te maua, pe a galulue faatasi i le faatinoina o le faamasinoga tonu a le Atua, e maua ai le sa'olotoga moni ma le amiotonu.

**Talosaga:**Tatalo i le Atua ia aumaia lona finagalo tonu e ala i a tatou ta'utinoga e faia ma le tonu ina ia nofo filemu ai le lalolagi.**Amene.**

**Mafaufauga Loloto:**Sa'ili po o fea tonu o i ai mana'oga o tupulaga---ua lē amana'ia ma lē maua ni galuega. Pe faapefea ona fesoasoani le mālō ma lo outou nuu i se suiga?

**ASO LULU, Setema 26, 2018: "Ia galue nei loa."**

**Working in the now**

**Tusi Faitau: Failauga 9:7-10.**

**Matua (f.10a):** *O mea uma ua iloa ona faia e ou lima, ina faia ia ma lou malosi; aua e leai se galuega, po o se mafaufau, po o se iloa, po o se poto i le tuugamau, ...*

E lelei le galue ma le faamalosi; o le ola galue e maua ai le ola ma foa'i mai mea tatou te manana'o i ai. O le upu moni, ua faaali mai: "inā faia ia ma lou malosi." A e le gata i lea, o le avanoa lea e saga faaopoopo ai le tele o au mea-totino, aua o le ola galue e maua ai le fiafia ma ave'esea le loto popole.

O se faamanuiaga le faatamaoigaina, o le apoapoa'iga 'aua ne'i avea le tamaoiga e auala mai ai se mitamitaga ua fai sesē. O se mitamita ua sesē pe a fai e manatu ifo o le tamaoiga e maua na o 'oe lava. E o'o ai ina faapea ane, o lo'u malosi lea e tumau e faavavau. Aua lava ne'i e faapea, auā o le ola galue faamaoni e tatau ona amata i le faafetai, e faafetai auā e mafai ona manuia nisi pe a e galue malosi. E te lē taumamao ma le Atua ina ua e maua lea agaga, ma e te lē tuu'eseina foi ou uso-a-tua'oi. Pe a maua le avanoa, ia faia ni mafutaga e faatatau i le talitonuga faale-Atua i e ua matitiva ma tuulafoa'iina, o tupulaga talavou ua sauniuni mo le folafolaina o le tala lelei---o iina e faatupu a'e ai le iloa ma le malamalama.

Pei sa faapea sa'u upu, ina ua fesili le tasi tama a'oga, pe sesē ona lua ni a'u taavale? Na o'o ina suia le mataupu na talanoaina, ma faapea ane: E lē o mea ua maua e sili lea ona tāua, auā e sili ona tāua, pe faapefea ona faaoga le tamaoiga ua maua. E lelei lo tatou fiafia i fua o a tatou galuega. A e lē o se manatu lelei le faapea ane: Semanū a tatou galuega---e pule lava i tatou---ua lelei ai isi tagata. Ua latou maua le manuia ona o tatou!

Ia tatou faamalolosi e galulue mo le manuia lautele, e faapei ona a'oa'o mai le Tusi Paia. Ia tatou maua foi le loto faafetai i mea lelei ua mafai ona faatino, e auala mai i lo tatou faamalolosi e galulue i le faamoemoe mo se manuia o tagata uma.

**Tatalo:** Le Atua e o le foafoaga, ia fesoasoani mai e faamalolia lo matou talitonu, o lau Afio o le puna o le malosi ma le tamaoiga. Ia matou lima-foa'i i au mea-alofa ua foa'i mai. Ia fai lea ma faafiafiaga i o matou loto. **Amene.**

**Mafaufauga Loloto:** Mafaufau ma manatunatu pe faapefea ona talia ma teu le tamaoiga ua foa'i mai. Ia tatou maua le loto fiafia e faasoa atu lea tamaoiga mo le manuia lautele.

**ASO TOFI, Setema 27, 2018:** "Teu ina ia tumau lona lelei."

**Lasting investment**

**Tusi Faitau: Mataio 25:14-29.**

**Matua (f.29):** *Auā o sē ua i ai ni mea, e foa'iina atu ia te ia e atili tele ai ana mea; a o lē ua lē i ai ni mea, e fāoa le mea ua i ai.*

O le to'atele, i so'u manatu, ua iloa ona teu (invest) tupe mo se faasiliga. Peitai, o le galuega faale-Atua e le fuaina pe faamatalaina i se malosi faale-tupe. O le 'a'ao foa'i, o le faata'ita'iga, e tāua i le tala lelei o le mea-alofa faale-agaga. Ua faaalua i le tusi faitau o le āso lenei, le aogā lea e pei ona ta'ua, e sili atu nai le mafaufau i le tamaoiga faale-tupe. A e faapefea pe a fai e teu e le malo sona tamaoiga i lenei auala? Faamata tatou te maua se lalolagi lelei? Faamata e maua e tagata uma se manuia? Faamata o le a le ituaiga o faasiliga e o'o i ai?

I lenei va i tausaga i Niu Sila, na feagai ai le atunuu ma mafui'e malolosi. E to'atele sa maliliu ai, na pa'u'u fale tetele ma faaleagaina le tele o nofoaga e faigaluega ai tagata o le atunuu, o fale o aiga ma pitonuu, o faato'aga ma le gatai-fale, na a'afia uma ma faaleagaina. Na a'afia le soifua o tagatanuu, o le mafaufau e o'o lava i le tamaoiga tau-tupe o le atunuu. E to'atele faalapotopotoga na tuuina atu a latou fesoasoani i e ua mafatia.

A e o se tulaga faagaetia loto, le agaga fesoasoani o le tasi i le isi, i o latou taimi ma nofoaga o 'au aiga ua faaavanoa e sulufa'i i ai, e le mafai ona faagaloina lea agalelei ma le alofa. O le taimi ua le mafai ona toe taofia le agaga ma "taleni" aua le fia faasoaso atu, o le faatinoga lenei o le tamaoiga ua faasalafa, i le loto malie ma le agaga fiafia. O se taimi na vaaia ai le tele o le tamaoiga, e le na o mea ua vaaia, a e ua sili i le loto.

O le tamaoiga faale-Tala Lelei e faasili le agaga foa'i ma le agaga o le mafuta faatasi, nai lo le naunau i talitonuga ma faatuatuga. O le valaau e atia'e le mafutaga o le fanau a le Atua i le lalolagi, o le "taleni" lea ua tuuina mai ina ia tatou teuina (investing). O le faatinoga e i ai le faamoemoe, ina ua talitonu ma faia le faamasinoga tonu. O le faatinoga e faapoopoina mai pea ma faato'ateleina i le mafuta faatasi. O le faatinoga foi, e ono fesiligia ai i tatou po ua faia e tusa ma lo tatou valaauina, nei ma le lumana'i.

**Tatalo:** Le Alii e, fesoasoani mai ia matou iloa ona teu lou finagalo i le potou ma le faautauta tonu, ia iloa ona alofa atu i e ua matitiva ma tuulafoa'iina, ia matou iloa ona teu "taleni" na e foa'i mai ia te i matou ta'ito'atasi. **Amene.**

**Maufauga Loloto:** O fea e tatau ona teuina ai lo'u malosi ma o'u taimi? Faamata e maua ai se faasiliga malosi, ma se aoga mo lo'u nuu?

**ASO FARAILE, Setema 28, 2018: “Ia faia ma le loto talitonu.”**

**Making trust possible**

**Tusi Faitau: Luka 12:22-34.**

**Matua (ff.22a, 31):** *...O lea ou te fai atu ai ia te outou, aua tou te popole i lo outou ola, ...A ia outou saili lona mālō, ona faaopoopoina ai lea o ia mea uma ia te outou.*

E leai se tagata na te tau’aveina le tiute o le faufautua, e faapea atu i le tagata ua loto vaivai, “ia e mafaufau”, e le mafai foi ona fai atu i se tamā o loo tausia se fanau e toa 6, “se ‘aua e te popole.” E maua i le lalolagi ua tatou nonofo ai le mativa, leai se galuega, popole vale, ma aafia i faigā mālō e iai le manatu faapito; a e o le tusi faitau o le aso lenei, e foliga o se fautuaga mo le tagata finafinau ma taumafai.

Ua faaalua i le tusi faitau o lenei aso, le tāua o le sa’iliga faale-agaga i totonu o le olaga lē atoatoa faale-tagata. A oo ina lē lava mea tatou tagolima i ai, afai foi ua tatou mafatia ona ua faaletonu fuafuaga sa faia, ona vaivai ai lea o le loto ma o’o ina fai ifo le faatuatua.

O ta’ita’i faatuatuaina e faapei o: Tinā o Terisa, o Katerina o Genoa, po o le Tinā o Aubert i Niu Sila, ua avea i latou e fai ma faata’ita’iga i le faamalosia o lo tatou ola talitonu i le Atua na te lē tuulafoa’iina le tagata ua talitonu, e ala i le fesoasoani i e ua mafatia, maua i ma’i faigata, ma e ua tuulafoa’iina. Ua latou galulue e faamalosia le tala lelei a le Atua i le lalolagi, e ala i galuega faatino: fale e nonofo ai, tausiga faafoma’i, fesoasoani i mea ua mana’omia atoa ma mea’ai. Ou te lē mautinoa pe i ai lava se tasi e sao mai i le loto popole, ona e i ai lava taimi i le olaga atoa e aafia ai.

Atonu na pogai ona fetalai Iesu, ‘ia aua tou te popole’, ona o loo a’oa’o mai ia sili ona talitonu a e faagalogalo i mea ua popole ai. Afai tatou te galulue mo isi, po o le taulamua foi e faailoa mea ua vaivai ai nisi, ona faatino ai lea o mea ua talitonu i ai.

Pe a oo mai taimi e aafia ai i tatou i mea e faapopoleina ai, ia manatua a’oa’oga a Iesu e faamalosia ai le ola ma le loto talitonu. E tumau pea faigata ma puapuaga o le olaga, a e o le a le mea e ao ona fai pe a o’o mai? mo i tatou e pei foi o isi? Ia tatou manatunatu ma mafaufau pea i ai.

**Tatalo:** O le Atua e mafuta mai pea i taimi o o’u mana’oga, ia faapena foi ona ou manatua mana’oga o isi. **Amene.**

**Mafaufauga Loloto:** Sa’ili le tulaga e oo i lo outou nuu, pe a fai a e taunuu ni tagata sosola ‘ese mai i o latou nu’u moni, ona o le fia maua o se sa’olotoga. Mafaufau pe faapefea ona fesoasoani i ai.

**ASO TOONAI, Setema 29, 2018: “Aua le sisi’o pe a fai e lē o fesoasoani.”No excuse for not contributing**

**Tusi Faitau: 2 Tesalonia 3:6-13.**

**Matua (ff.7b, 8a):** ... *Auā sa matou lē amio faatalanoa ina o ia te outou. Matou te le’i ‘a’ai fua foi se mea e ‘ai a se tasi, a ua matou galulue i le galuega mamafa ma le tiga i le po ma le ao, ...*

O le faailoga o le vaai mamao e mafua ai ona fuafua lelei nei. E i ai faalapopotoga ua faavae mo le fautuaina o fuafuaga aua se lumana’i lelei, ua latou apoapoa’i mai foi ia mataala ini faalavelave e ono tutupu. O fuafuaga vaai mamao e tatau ona i ai tagata ua agavaa latou te taga’i lelei, ina ne’i avea le faatamala o nisi e faaletonu ai fuafuaga ua uma ona faatulaga..

O le vaai mamao, o se tasi lea o taumafaiga ia saogalemu le lumana’i. Na ou tuputupu a’e ma le malamalama i le oo mai o mafui’e, o lo matou fale e latalata i le oganuu sa a’afia i le mafui’e taluai. O le faapogai lea, o lo’u tinā i po uma a e matou te le’i momoe, na te ‘aumai o matou lavalava e sauniuni ai mo so’o se taimi e toe tupu ai se mafui’e tele.

O aso nei, e lelei ona tatou nonofo sauniuni, ia i ai se ‘ato e tuu uma ai mea pito sili ona mana’omia pe a tupu se faalavelave faafuase’i. O i tatou o tagata mata’ala ma sauniuni, o le a lava se mea e ono tupu mai. O se tulaga mata’utia, ia manatua pea, o le olaga lelei o i ai nei, aua ne’i galo le mafaufau mo le lumana’i saogalemu, ia teuloto i le taimi nei.

O le ‘Au Kerisiano i Tesalonia, sa faaosoosoina ia faamuta ona galulue a o faatalitali le toe afio mai o Iesu. Na faamanatu e Paulo, e faapea: E o’o ia te ia, e le galo ona ola galue, auā o le mea tatau mo le tagata. O le Kerisiano faatuatua, ‘aua ne’i sisi’o ina ua le galue mo le manuia lautele.

Ia faapei o Paulo, o lo tatou ta’utino e faaauau le malosī, o se ta’utinoga foi lea mo tagata uma, a e amata i sau foa’i i lou lava tamaoiga e faatino ai mea lelei, i le faigāmālō po o le soifuaga lautele. O a tatou galuega, i mea tatou te faia, a e maise o fesootaiga e tutupu mai ai, o iina e vaai ai le uiga moni o le mālō o le Atua ma lona faavaeina i le lalolagi. Afai tatou te faaauauina nei le ola galulue mo mea lelei, o le ata lea ua tatou faaauauina le finagalo o le Atua na ia fausia ai le lalolagi mo le tagata.

**Talosaga:** Tatalo i le agaga o le loto maulalo i le, Tatalo a le Alii. **Amene.**

**Mafaufauga Loloto:** Mafaufau ma manatunatu i upu nei, “Ia o’o mai lou mālō,” ma le, “A matou mea’ai e tatau ma le aso.” E faapefea ona e fesootai ma au galuega o loo fai nei.



## Ia faatulaga tutusa galuega o le olaga.

### 3. Malologa – 3 Rest

[Apoapoa'iga saunia: Carla A. Grosch-Miller]

**ASO SA, Setema 30, 2018: “O le mapusaga o le loto popole.”**

**The end of anxiety**

**Tusi Faitau: Esoto 33:12-23.**

**Matua (f.14):** *Ona fetalai mai lea o Ieova, Ta te o atu lava ma a'u; ou te avatua foi le mapusaga mo 'oe.*

O le Faato'esega: O a'u lava ua na o se otaota i le mapusaga, e ui ina tele tausaga na feagai ai a'u ma le mataupu e uiga i le Sapati. I nai aso ua tuana'i atu, sa matou mafuta ma nisi o le 'au uso o loo fia maua se mafutaga faale-agaga, sa matou 'a'ai ma fegalegalea'i faatasi i le agaga o le to'amalie ma le filemu.

A e mo a'u lava ia, sa ou lagona le fia tu'umuli atu ina ua ou lagona le fia malolo. E masani ona ou galue malosi se ia o'o ina matuā vaivai lava. I nai tausaga ua mavae atu, na faafeagai ai a'u ma le tele o faalavelave na mafatia ai, ma o'o ina avefa le masaniga e galue mamafa ma mea ua o'o mai ai le vaivai ma gata le malosi, na o'o ai loa ina faanoi ua 'ou ma'i.

Na lagona le loto maulalo, aua ua o'o ina 'ou lagona le taua o le ola e fia maua pea. O lea ua a'oa'oina a'u ia iloa ona vaai ma faalogo, talitonu ma faatuatua o le ola o le mea-alofa ua tuuina mai mo le tagata. I lenei vaiaso, o le a tatou iloa ai le poloaiga mai le Atua, ia maua se mapusaga e faaauauina ai pea le ola.

Na matua lagona e Mose le atuatuavale; ona sa faafeagai o ia ma tagata faigata ma le lē faatuatuaina. Sa ia naunau ina ia faia mea tonu, ma e mana'omia le mafuta mai o le Atua e fesoasoani i mea na te faia. Ua o'o ina fetalai mai le Alii ma faatasi mai, e fesoasoani i mea ua vaivai ai Mose, ua faapea mai: “Ou te avatua foi le mapusaga mo 'oe.”

**Tatalo:** Le Atua e To'atasi, ua e silafia a'u e sili nai lo'u iloa o a'u lava. Foa'i mai le faatuatua moni e faalagolago ai i lou mafuta mai, ma ia matou talia lea mafutaga e fai ma o matou mapusaga. **Amene**